

Zân Zisasiyet yaŋaŋ Zânaŋ meluwaŋ mge.

Zânaŋ Kawawaŋgalen Zet Zapat Dolakŋaŋ Penan kapi kuye. Zân kapi Zisasiyet nembanaŋneyet tunguwinanŋatnaŋaŋ Kawawaŋgalen Zet Zapat Dolakŋaŋ Penan kapi kuye. Zemsiyet meniŋaŋ ma biwidanŋat kwitnaŋ Zebedi (Matiyu 10:1-4; Mak 3:13-19 ma Luk 6:12-16). Zânaŋ Kawawaŋgalen Zet Zapat Dolakŋaŋ kuyeen iŋnaŋat kwitnaŋ esemten kumti, “Neŋ Zânaŋ kuyap,” kegok ku zeye. “Egaŋ nembanaŋ nâmtikŋaŋ mamin,” kegok kuye. Zet kebon ke omba kukunaŋ makuwek. Egaŋ buŋam zapat kapi etaŋ ku kuye. Zapat meluwaŋ tuk ŋen kuyeyaŋ bamgat eknup.

Matiyumak Mak ma Luk ekŋenaŋ am manŋeen kwep kwepgat kumindawien. Zânaŋ buŋam zapat kapi apapalak papia kuye. Am sambe msat katan ekŋengat zapat kuye. Zet Zapat Dolakŋaŋ kapi Matiyumak Mak ma Luk ekŋenaŋ kuwien keyet katen yek. Egaŋ Zisasiyet yaŋaŋ penan deyetnaŋ kokotnaŋ ma egaŋ kuleki penan mimiyet koge keyet yaŋaŋ weyaŋ kuye. Zet ŋotekŋaŋ Zânaŋ kuyeen ŋen kapigok, Zisas ek Kawawaŋaŋ an peme koti am mama mimiŋin bekananengatnaŋ gilik zemindatimti mama ten am indandayet zenzenaŋ wan ilak koti kegok mmâge.

Zet noteknan teman Zângalen bunam zapat kenan kapigogan talip:

1:1-18. Zisas ewenan an kwi penan mange

1:19-51. Zân an tu zulutindende egan mulup-
man ewe tapme Zisasiyan yanbemti nem-
bananen indage

2-6 Zisasiyan am tunguwinan mulup yanbemti
mge

7-11 Zisasiyan menok notnan mti an nenan
bembe eknenmak zet mdândâ notnan mge

12-19 Zisasiyan gakikiyelen set im mege

20 Zisasiyan gakikiyengatnan wage

21 Nembananeyet zemgwanan notnan mimin-
damti kululun mowege

Zet mawanmak keyan naman am sokbeye

¹ Ewenan baen Zet egan yanbemti
Kawawanmak ilisakwep mamkwabunan
Zet ke Kawawanagak. ² Ke tipman baen
Kawawanmak ilisakwep mamti ³ Kawawan
zempeme kwitnan kwitnan sambe bepi mme
sokbemâge. Ek pinan kwitnan kwitnan igak nen
ku sokbemâge yek. ⁴ Zet ek mama keyet tojan
egalen busatnanan am mbusatnan bemindeye.

⁵ Âpme busatnanan tambu sosok kenan mepme
tambu sosogan kunzunji mege.

⁶⁻⁷ Âpme an nen kwitnan Zân. Ek msalen
kapi am busatnangat zapanan diindome am
ilindin busatnan tojan Zisas egat zapanan nâmti
nâmkipepeyet nâmti Kawawanan iknan zem-
peme koge. ⁸ Wa Zân iknan am mbusatnan
bemindendeyet ku koge. Egan belak an busatnan

tonaŋ tobe keyet buŋam zapatnaŋ etaŋ manzemaŋ. ⁹ An busatnaŋ toŋaŋ keyaŋ msalen kapi sokbemkawaŋ bemti am msalen mammbusatnaŋ bemindein.

¹⁰ Ek ke eweŋaŋ Bipmaŋmak mambunen msat kapi mme sokbeye. Ya egaŋ naman mamkwati msalen kapi amnaŋ masokbenupnok sepem sokbemenŋut am msalengatnaŋ ekŋenaŋ naman egat yaŋaŋ penaŋ ku weyaŋ eknâmâtâbien.

¹¹ Egaŋ Zuda msalen ke mame Zuda am ma iŋŋaŋŋat donnotnane ma eiŋbipmane mee penaŋ piyaŋ ek mtopemti wisat mpewien.

¹² Âpme am ek notn mpemti nâmkiŋpewien ekŋen Kawawaŋŋat nemunambaŋane bemti mamayet indapmukulem mimindeye. ¹³ Wa animbi Kawawaŋŋat nemunambaŋane penaŋ bemti mamaip ke animbiyaŋ mame nemba masokbeip sepem keboŋ yek. Ma angalen segat tikŋaŋaŋ ndabeme mamaip keyet penaŋaŋ yek. Kawawaŋaŋ ekŋenaŋ iŋŋaŋŋat nemunambaŋane bembeyet nâmindeme kogok ekŋenmagen sokbeye.

¹⁴ Âpme Zet egaŋ amnaŋ masokbenup keyet kataŋ sokbemti am ningat tuŋgupmnaŋ kapi mamtan. Mamti keŋ taoletmak ma zetnaŋ penaŋ penaŋak zem mamti menok sepem igak igak mme amnaŋ Kawawaŋŋat Nemunaŋ kwep etaŋ keyet mama mimiŋaŋ dolakŋaŋ ke ma windenaŋ temaŋ ke Bipmaŋaŋ miak peme koge ke ekbenn.

¹⁵ Zânaŋ egat zetnaŋ pigok zemkawaŋ beye, “Neŋ an iŋŋaŋ keyet buŋam zapatnaŋ diindowan, ‘An bamnan takozin egaŋ neŋ sehem-

nemti Amobotnan penan bein. Msat kululun ma nen mee pi sokbembepin tapma egan tipman penan baen mamkwage.’ ”

¹⁶ Egan ningat tiknan manâmnndein keyepmti ken taoletnangtat penanan iknangalen mama mimi dolak dolaknan sambe piyan elimiak nd-eye. ¹⁷ Moses egan Kawawangalen zii zet ke aikndaye. Âpme Zisas Kilaisiyangut ken taoletmak Zet Zapat Dolaknan penan timtot ndaye. ¹⁸ An nenan Kawawan sepeman bugan ku ege. Nemunan nen Bipmmak mamayap nen egalen zet zapatnan ke mkoti zemkawan bemindama nâmbien.

Zân an tu zulutindende anan iknangat yanan zeye

(Matiyu 3:1-12; Mak 1:1-8; Luk 2:1-18)

¹⁹ Zuda amobotnan eknenan Zelusalem mkaen tati sâpe sâpe bumbu an ekngat kandaninan mulup an mamaip eknen zemindeme Zânimagen meti pigok yankwesiwien, “Gen pe Kilais ma an kwi? Ze zemanê nâne.”

²⁰ Zeme egan keyegak iknangat yananan pigok penan zemkawan bemti diindoye, “Nen wa Kilais yek.”

²¹ Zeme eknenan naman ewe pigok yankwesiwien, “Âpme gen an kwi? Gen Ilaiza?”

Zeme egan pigok zeye, “Nen ek yek.”

Zeme eknenan zewien, “Âpme gen nin golan zenze an teman nen ninimagen kokogat damun matatnuwen gen kapi?”

Zeme egan pigok zeye, “Nen golan zenze an ke yek.”

²² Zeme ekñenan pigok zewien, “Geñ kwi penan? Ze weyan yañandi zeman nâne. Am zemndeme kotn am ekñen keyet pe zigok met zeman nâseip? Geñ gitangat penan yañdi zigok penan manzenik?”

²³ Zeme Zânan pigok diindoye, “Neñ golan zenze an Aizaya egañ zet pigok zeye keyet penan,

‘An ñenan msat tungupman mamti animbiyet pigok takuin, “Pi mamti amnan yomin zeme delan zeme kenin weyan Amobotnangat damuñ talit,” mandiidoin!’ ” *(Aizaya 40:3)*

²⁴ Âpme an ekñen Palisi ekñenan zemindeme kobienan ²⁵ naman pigok yañkwesiwien, “Nin tatnâmann geñ, ‘Neñ Kilais yek ma Ilaiza yek ma golan zenze an ñen yek,’ zenik. Kegok beme geñ kwilekiyet am tu manzulutindenik?”

²⁶ Zeme Zânan kapigok diindoye, “Neñ am tu etañ manzulutindeyap. Âpme an ingat tunguwinan sokbeyeyan mamain ek ke in ku maekmâtâlíp. ²⁷ An keyan bamnan gwaen takozin. An bekeboñ beke neñ bukaboñ kapiyan elewat temañ timpema ñep ku bewe.”

²⁸ Ekñenan meyañkwesiwienen ke Betani mka Zodan tu nembet daeset tazinen ke mebien. Zânan mka ke mamti am Zodan tuyen tu manzulutindemtan.

Zânan Zisasiyet yañan zemkawan beye

²⁹ Msat msame Zânan am tu zulutindemambe tati ekme Zisasiyan ninmagen takopme ekti ningat pigok dindoye, “An inde takozingat egit.

An kainde Kawawangalen Sipsip Nembanaŋ. Zuda am ekŋenaŋ yomin delaŋ zenzeyet nâmti Sipsip Kawawangat sâpe sâpe mambuip. Sepem kegogak Kawawanaŋ ikŋaŋgat Nemunaŋ takozin ke amgat belen beme msat sambe am ningat yom delaŋ zenzeyet kume gakiwe. ³⁰ Neŋ an keyet ilak eweŋan pigok diindowan, ‘An bamnan takozin ke Amobotnaŋ temaŋ neŋ ewe sokbembepiŋ tapma egaŋ eweŋan tipman penaŋ baen mamkwage.’ ³¹ Ek eweŋan Kawawanaŋ an yomengatnaŋ gilik zemndadagat ombempaye ke neŋ ku ekmâtâban yaŋgut Kawawanaŋ zet zapatnaŋ etaŋ zemkawaŋ bemname neŋ Israeŋ am in ondekindemti egat zapatnaŋ diindoma nâmti in egaŋ kokogat weyeyaŋ mulup mti mamayet nâmti inmagen tu zululut mulup kapi mimiyet zemneme inmagen yaŋbewan.”

³² Kogogapm Kawawanaŋ pigok dinonŋe, “Neŋ Emetak Teŋaŋ kululuŋengatnaŋ age sasakandenombe nemboŋ bemti ekmagen totapme ekbanik beme an ilak ke. ³³ Nen an ke eweŋan ku nâmatâtpewan yaŋgut Kawawanaŋ neŋ am tu zulutindendeyet mulup zet kapi naŋgeyaŋ pigok dinoye, ‘Nâlen Emetak Teŋaŋ toti dukŋanen tapme ekbanik beme an keyaŋ am nâlen Emetak Teŋ ke indamâbe.’ ³⁴ Neŋ yaŋaŋ kegok zemâtâtname ekbangapmti muluwaŋ kegok sokbeme ekti ek ilak Kawawangat Nemunaŋ penaŋ elak nâmatâtpewan.”

Zisasiyaŋ yaŋbemti nembane zulak zulak ilak indatiye

³⁵ Msat msame Zânaŋ nembraŋanet zut nit ndatimti msat keyegak koti tapmambenn.

³⁶ Tatnepemann Zisasiyaŋ keyegak kwawepme ekti Zânaŋ nigat pigok dinitdoye, “An zut, an da egit. Ek Kawawaŋgalen Sipsip Nembraŋ.”

³⁷ Zeme nempa zut piwan nânâŋak keyegak Zân pemti met Zisasiyet baman mâti mebun.

³⁸ Mepmalu Zisasiyaŋ gilik zem idikti pigok idayaŋkwesiye, “An zut, it kwilekiyet napmâti takolup?”

Ndayaŋkwesime nit pigok zewelin, “Labai, (E Ibulu zet âpme ningalen zeleset ‘an zikat indanda,’ kok zewanek.) geŋ mka pe deset mawenik.”

³⁹ Yaŋkwesimalu pigok dinitdoye, “It kopmalu neŋ met mkan zikat idama egit.” Zemti idati tapmetnepeme msat gasim beme ekmak ke tapmetneti tambu sutnan gilik zemti naman mkaŋidanen kobun.

⁴⁰ An zut Zânaŋ Zisasiyet yaŋaŋ zeme nâmti ekmagen mebun nitmagengatnaŋ nempa ŋen kwitnaŋ Endulu ek Saimon Pitayet datnaŋ.

⁴¹ Enduluyaŋ metneti meniŋaŋ Saimon aikti pigok dunduye, “Neŋ Mesaya, kwitnaŋ ŋen Kilais* manzeip ek ilak aiga.”

⁴² Kegok zemti meniŋaŋ Zisasmagen wati mepmalu Zisasiyaŋ ekti zeye, “Geŋ Saimon Zângaŋ nemuŋaŋ muŋ. Gâgât kwidi alakaŋaŋ neŋ Sipas gayap.” (Sipas kwit keyet yaŋaŋ “nanzaŋ”).

* **1:41:** Kwit zut keyet yaŋit kapigok Kawawaŋaŋ am yomengatnan gilik zemndatitiyet ombempeye.

⁴³ Msat msame Zisasiyan Galili msalen mesât tati Pilip selen aikti pigok dunduye, “Geŋ kopmane neŋmak medi.” Zemti wati mebun. ⁴⁴ Âpme Pilipmak Endulu muŋanet ekŋen mkanŋin kwep Besaidayetnaŋ.

⁴⁵ Metneti Piliwan Nataniel meaikti pigok dunduye, “Mosesimak golan zenze an notnaŋaŋ itnaŋaŋ baenen an kapi Kawawaŋaŋ nin yomen-gatnaŋ gilik zem ndadagat ombempeye keyet zetnaŋ meluwaŋ mbien ewan penaŋaŋ alak aikti ekmak tapmanup. An ke Zisas Zosepgat nemuŋaŋ Nasalet mkaengatnaŋ.”

⁴⁶ Zeme Natanieliyan zet dopmaŋ kapigok gilik zemti saye, “Geŋ nâmane Nasalet mkaen bukanda kwileki dolakŋaŋ ŋen sokbewe bein?”

Zeme Piliwaŋ zeye, “Kok zenikgat kopmane met zikat gama ekbak.”

⁴⁷ Zemti Nataniel wati Zisasmagen mepme Zisasiyan Nataniel ekti zeye, “An kapi Isael an penaŋ. Ek zet dâsuki ŋen ku manzein.”

⁴⁸ Zeme Natanielan zeye, “Zisas, neŋ pe de mama yaŋŋ nikbanangapmti kegok zenik?”

Zeme Zisasiyan zeye, “Piliwaŋ geŋ ewe met gaiikpiŋ tapme geŋ tep kwitnaŋ pik kandaŋan ke tapmane giga.”

⁴⁹ Zeme nâmti egaŋ Zisas pigok dunduye, “An zikat indanda, geŋ penaŋ sukwep Kawawaŋgat Nemuŋaŋ penaŋ Isael am ningalen Amobotnaŋ Temaŋ.”

⁵⁰ Zeme Zisasiyan pigok zeye, “Neŋ geŋ tep pik kandaŋan tapmane giga zeya keyepmti nâgât nâmkinpennenik? Nânik, pi ewe belak yaŋbemti

butnaŋ isikŋaŋ bugan ekdik. Âpme penan penan ewe bam sokbeme mamti ekmebanik!”

⁵¹ Kegok dundumti naman nembane ilinsakwep pigok diindoye, “Neŋ zet penan nen pigok diindoma nâit, bamgat in taekme kululun gwaenen nandem tapme Kawawangalen ensel eknenan Angat Nemunaŋ nenmagen motopme ekbep.”

2

Zisasiyan zeme tu penanaŋ naman wain beme nimbien

¹⁻² Ke mti manepeme kasup zut bemelak Galili msalen mka nen kwitnaŋ Kana manzeip ke animbi zut nen awembiŋ bemidesâgâti tu meu mee akume kopme bumti Zisas mamaŋ ma Zisas iknaŋ ma nembane nin nsakwep ndamandame tu meu nsâgât meti ³ meu tatnepemann meuyan ewe tapme wain tu ilak delaŋ zeme Zisas mamaŋaŋ ekti pigok zeye, “Wae, eknen pi ilak wain tu delaŋ zeme belak talipgat nâmbega.”

⁴ Zeme Zisasiyan mamaŋat pigok zeye, “Mange, wa mulup kapi nin tapminup yek. Nâlen mulup miminn kann ewe bam sokbemnawe.”

⁵ Zeme mamaŋaŋ mulup namba eknenmagen meti pigok zeye, “In tatnepeme Zisasiyan kwileki nen mimiyet diindome zetnaŋ gawepumti mseip.”

⁶ Âpme mka keyet ganzenan menzim tosiŋ temaŋ temaŋ ⁷ bekapi onzemindeme matatemien. Menzim tosiŋ temaŋ kwep bekeyet tu 100 lita mee kegok makasimpemtemien. Kasimpeme tapme sesewat mkayelen

amobotnanaŋ set bemindaye keyet kataŋ mâti kasup kataŋ selin belin manzulutemien. Menzim tosiŋ bekeboŋ sambe mka kataŋ mawemetan.

⁷ Kegogapm Zisasiyaŋ mulup an ekŋen pigok diindoye, “In tu omti menzim tosiŋ temaŋ taliwen kapi kasime towepmâlak.” Zeme mulup an ekŋenaŋ menzim tosiŋ temaŋ 7 pi tu omti kasime gak zemâge.

⁸ Omkasime delan zeme pigok diindoye, “In tu butnaŋ menzim isikŋaŋ kasimtimi met an meu damuŋ ke sait.” ⁹⁻¹⁰ Zeme omti mmepme tuyaŋ wain beme an meu damuŋ keyaŋ wain tu ke nim ekti kapi pe desetgatnaŋ mkolip ke ku weyaŋ nâmâtâti mulup nemba ekŋenaŋ Zisasiyaŋ zeme tu penaŋ omti mebien. Kegogapm ekŋenaŋ wain tu zigoset sokbep eyet yaŋaŋ ŋep nâmâtâbien.

Kegok mme an meu damuŋ keyaŋ animbiŋaŋmak bet butewun ke zeme kopme pigok dunduye, “Ningalen set temaŋ kapigok tazin, wain tu dolakŋaŋ penaŋ ke am ŋeŋaŋ indame nimiti tapmeŋgut naman bam bekaŋaŋnik ke maindame nip. Yaŋgut geŋ kileŋ mnak wain pembenan pi belak pemane tapme bekaŋaŋnik ŋeŋaŋ indamane niyo. Geŋ set dâsuki mti wain tikŋaŋ kapi aŋgalaŋ pemane tapmawaŋ bam mti kolip.”

¹¹ Zisasiyaŋ mka keyet yaŋbemti menok ke mti Amobotnaŋ main keyet yaŋaŋ am ekŋenmagen mkawaŋ beme nembaŋane nin windenjaŋgat yaŋaŋ ekti nâmkinpewenn.

¹² Keyetnan Zismak mamnotnane ma nembaŋane nin nsakwep Kapaneam mkaen ke tambu

msasa isikñan bugar topmambenn.

Zisasiyan sesewat mka temanen amnan omk-witi kwiti tapmme indikti indapmâge

(Matiyu 21:12-13; Mak 11:15-17; Luk 19:45-46)

¹³ Topmanepemann Zuda ningalen Angalalan Kendo elak bududuk beye keyepmti Zisasiyan Zelusalem mka teman Kendo ke eksâgât mowebenn. ¹⁴ Moti ekme sesewat mka temangât tambangumen amnan kwaweti Kawawangât sâpe sâpe bumbuyet makau ma sipsip ma sasakandanombe mee pi time kwawepme omkwiti kwiti mti mânep sisak dukñan bemti omañ main tapmmambien. ¹⁵ Tapmme

Zisasiyan indikti ñeñan penan zime egan tek timti mendenme katikñan beme mtati makau ma sipsip mee pi wuwap indawitikti indamâpme kunjzun kwawepmâpme mânewin timtati time mekopme sisakñin mtati gilik zempeme wenje.

¹⁶ Âpme am sasakandenombe mtabien ekñen indikti memendep mimindamti pigok diindoye, “In sasakandenomben timti toti melit. In Biengalen mka kapi mme ingalen bemkwiti kwiti mkanok ku bek.” ¹⁷ Zisasiyan moti kekok mme nembanane nin Kawawangalen zet zapat itnananen meluwan pigok mimiñan tazin keyet otnâmbenn,

“Gâlen sesewat mkayepm ñeñan penan zimetip.”

(Sam 69:9)

¹⁸ Âpme Zuda amobotnan ekñen Zisasmagen koti pigok yañkwesiwien, “Geñ kapigok penan tapminikgat pe Kawawangñ winde game egalen

windeen maminik beme geŋ menok ŋen mmane nin ekti yaŋaŋdi ekmâtâsenup?”

¹⁹ Yaŋkwesime egaŋ keyegak pigok zeye, “In sesewat mka teman kapi asekyaloŋme neŋ naman kasup tuk keyet keŋan etaŋ timtusu tusu mti walapma delaŋ zemâbe.”

²⁰ Zeme ekŋenaŋ Zisasiyet pigok zewien, “Yeŋsokŋne ekŋenaŋ nup kan 46 bepi sesewat mka teman kapi tawalatne walatne peme delaŋ zeye. Âpme geŋ bukapiyaŋ kasup tugat keŋan etaŋ walasât zenik?”

²¹ Yaŋgut Zisasiyaŋ zet ke wa sesewat mka teman keyet penaŋ nâmti ku zeye egaŋ iŋŋaŋgat sekŋaŋgat nâmti zeye. ²² Yaŋ maneti Zisasiyaŋ gakiyeyaŋ gilik zem wapme kan keyet nembaŋane nin sesewat mka teman asekti walalagat zeye keyet ma Kawawaŋgalen zet zapat itanaŋanen muluwaŋ mimiŋaŋ keyet penaŋaŋ ek-magen sokbeme ekti nâmkŋpewenn.

²³ Zisasiyaŋ Zelusalem mka teman Aŋgalalaŋ Kendoen mamti menok teman sepemaŋ igak igak mme am sambe ekŋenaŋ ke ekti Zisasiyet nâmkŋpewien. ²⁴ Yaŋgut Zisasiyaŋ am sambe ekŋen bekapi notnaŋaŋ keŋinan ŋenzinziŋaŋ tage e indik mâtâti ekŋen sambe keyet nâme notnaŋne etaŋ ku beye. ²⁵ Egaŋ am ŋeniyet yaŋaŋ nâsâti am ŋen yaŋkwesime ku dundume nâŋge. Egaŋ iŋŋaŋ am keŋin baen ekti yaŋaŋin eknâmâtâge.

3

Zisasiyaŋ Nikodimasmak zapat mbun

¹ Palisi an ekñenmagengatnañ an ñen kwitnañ Nikodimas. An beke Zuda am ekñengalen sesewat mka temañgalen an damuñ temañ ñen ek ke.

² An keyañ buzak tambuyet Zisasmagen moti pigok dunduye, “An zikat indanda, nin gâgât yañañdi nânup. Geñ an zikat indanda penañ Kawawañmagengatnan kwatobanan. Âpme geñ menok sepem igak igak maminik keboñ kapi an ñen Kawawañpiñ mamti mulup keboñ keboñ ke ñep ku mnak.”

³ Âpme Zisasiyañ zeye, “Neñ penañ sukwep pigok zema nâmbak: An ñenañ nemba okak masokbeip keyet katan okak ku sokbewe beme an keyañ Kawawañmak tusumti egalen zemâtâtâtgat katnanen mama keñan ke ku mebe.”

⁴ Zeme Nikodimasiyañ pigok zeye, “Weneñe, an temañ penañ bekeyañ naman zigaset mamañgat keñan toweti naman nemba okak sokbewe?”

⁵ Zeme Zisasiyañ naman pigok dunduye, “Neñ zet penañ sukwep pigok zema nâmbak: An ñenañ tuyañ ma Emetak Tenmagengatnañ mama alakñañ ke ku tiwe beme an keyañ Kawawañgalen zemâtâtât katnanen mama keñan ñep ku mebe.

⁶ Amgalen mamaen masokbep ekñen amgat sepem. Âpme Emetak Tenñ ammagen mulup mme mama ten matip ekñen Kawawañgat zapat mambeip. Ekñen ke Emetak Tenñgalen am penañ. ⁷ ‘Geñ neñ sokbembe alakñañ sokbembe,’ keyet zema geñ nâmane nukñañ penañ kumbek. ⁸ Tâgâ ek belak kilen ke kumbume kwisakñañ etañ kume

manânup. Âpme geŋ pe deset yaŋbemti met deeset mamezin e ku manânik. Âpme Emetak Teŋaŋ am ŋenmagen mulup mme mama teŋ matin ekmagen Emetak Teŋaŋ tâgâyaŋ mulup maminok mamin.”

⁹ Zeme Nikodimasiyaŋ nâmti zet dopmaŋ kapigok gilik zem saye, “Pe zigok penaŋ mti alakŋaŋ sokbembeyelen nâmti zet kapi tazenik?”

¹⁰ Zeme Zisasiyaŋ Nikodimas pigok dunduye, “Geŋ Israeŋ am eŋengalen an zikat indanda temaŋaŋ zet kapi zema geŋ kwilekiyet nâmane nukŋaŋ taben? ¹¹ Neŋ penaŋ pigok diŋgoma nâmbak: Neŋ kwitnaŋ kwitnaŋ sambe Kawawaŋaŋ zemâtâtname nâmban keyet zapatnaŋ ma Kawawaŋaŋ ammagen mulupmaŋ kawaŋaŋ sosok mamme egap keyet zapatnaŋ diindoma in sambeyaŋ ningalen zet ke nâme ewe pepesut beme ku manâmkinpeip. ¹² Neŋ kwitnaŋ kwitnaŋ msalen sosok masokbemâpme egip kapiyet palen bemzema in ku manâmkinpeip. Âpme neŋ kwitnaŋ kwitnaŋ kululuŋen gwaen masokbemezin keyet palen bemzema in zigok ŋep nâwiek? ¹³ An ŋenaŋ kululuŋen gwaen moti kwitnaŋ kwitnaŋ tazin ke ku ege. Angat Nemuŋaŋ neŋ kululuŋengatnaŋ toban keyepmti kululuŋen gwaen kwitnaŋ kwitnaŋ wein e nâmâtâpma delaŋ zemâzin.

¹⁴ Itnaŋaŋ Moses egaŋ msat tungupman nombe weŋaŋ aenaŋ weyaŋti tep palen kwasim pemti mwat onzempeme tapme ekbien. Sepem kegogak Angat Nemuŋaŋ neŋ ke tep palen palak palak masasok neme wema nomti mwat

onzemneme tapma ekbep. ¹⁵ Amnañ neñ nikti nâmkîñnemti mama kanzizit aiikgat kekok mbep.

¹⁶ Kawawañ egan msalen am sambe ingat gogot penañ mamimindein keyepmti egan ikñañgat Nemunañ kwep penañ ke ketalasimti msalen peme toge. Keyepmti am neñ nâmkîñnewep ekñenañ walelepiñ; mama kanzizit tiwep.

¹⁷ Kawawañañ Nemunañ neñ msalen neme toban ke wa am yominañgat dopmañ indandayet nâmti ku neme toban. Neñ am yomengatnan gilik zemti indatitiyet Bipmnañ zemneme toban.

¹⁸ An ñenañ Kawawañgat Nemunañ neñ manâmkîñnein beme yomañgat dopmañ ku tiwe. Âpme an ñenañ Kawawañgat Nemunañ neñ ku manâmkîñnein ek yomañgat dopmañ ilak titiyet damuñ matazin. Elak egan Kawawañgat Nemunañ neñ nâmkîñnenepiñ mamm keyepmti sepem kekok sokbemsawe.

¹⁹ E yañañ kapigogapmti tosa mgasik kapi tiwe. An ekñenañ busatnañ msalen kapi sokbeme buñam zapañnañ ekñenmagen mepme nâmtiñgut ekñenañ bamkumpemti ekñenañ mama mimi bekanañ mti tambusosogat zapañ mambeip. ²⁰ An ñenañ yom mamin beme egan busatnanen mopma yomm sosok sokbesem zemti busatnañgat mañgazin. ²¹ An ñenañ Kawawañgalen zet nâmti mañgawepumti main egan busatnañgat ku mañgazin. Âpme egan busatnanen mopme busatnañañ mama mimiñañ dolakñañ ke sosok mamkawañbein.”

Zânañ Zisasiyet yañañ zemkawañ beye

²² Ke maneti Zisasiyan nembajane nin ndatime Zelusalem mka pempti Zudia msat butnaset n̄en meti mambenn. Ke met ek̄nenmak mamti animbi tu mazulutindemtemenn. ²³ Âpme Zân egan̄ kegoak mka n̄en kwitnā Enon zeme ke Selim msaleset tu sambe penan̄ matatan ke mamti am tu manzulutindemtan. ²⁴ [Kan keyet Zân ewe mka katik̄nan̄ pepepin̄ tapme egan̄ belak mamti mulup ke mamtan.]

²⁵ Zângalen nembajane Zudayetnāmak Zuda an n̄enmak tu zululugat ²⁶ mdândâmti Zângat nembajane ek̄nenan̄ Zân̄magen meti pigok dun̄duwien, “An zikat indanda, gēn̄ an n̄en Zodān tu nembet daeset tapme zikat ndamane ekbenn an keyan̄ alak am tu tazulutindeme am sambe pi ekmagen etan̄ ondek mepmâpme delan̄ zein.”

²⁷ Zeme Zânan̄ nâmti pigok diindoye, “An n̄en Kawawānan̄ mulup n̄en zemdelan̄ zem sasapin̄ mme egan̄ mulup belak kēnan̄ galak ku mamin. ²⁸ ‘Nēn̄ Kilais yek, nēn̄ belak Kawawānan̄ an keyet zapatnān̄ zenzeyet n̄enan̄ zemneme koti zema nâmbien. Âpme in zet ke eneyet sakwep penan̄ kandabien.’ ²⁹ An n̄eniyet imbi zapat zempepenan̄ an keyan̄ imbi keyet apman̄ penan̄. Yan̄ egan̄ imbin̄an̄ kemak bet butemti kēn̄ olōnen mme notnane ek̄nenan̄ zapatnān̄ nâmti ekmak tusumti ilinsakwep olōnen mamip. Kēn̄ olōnen teman̄ penan̄ kebon̄ ke sokbemnanayelen kan elak alak penan̄ kapi sokbemnain. ³⁰ Zisasiyet kwizet būn̄amānan̄ palak̄nan̄ beme kopme nâlenan̄ naman uluk zemti towebe.

³¹ An n̄en msalen kapiyetnān̄ sokbembenan̄

egan kwitnan kwitnan msalen kapiyetnan etan ekti manzein. Âpme an kululunen gwaengatnan tototnan ek kwitnan kwitnan sambe kapiyet Amobotnanan tazin. ³² Egan kululunen kwitnan kwitnan sambe tazin keyet zapatnan zemengut am eknenan nâme dâsuki beme ku nâmkinpewien. ³³ Âpme an nenan zetnan ke nâmti mamkitik pein beme egan Kawawangat yanjan an zet penan penanan zemti main, e nâmâtâpewep. ³⁴ Kawawangat an zempeme toge an keyan koti Kawawangat yanjan manzemkawanbein. Keyepmti Kawawangalen Emetak Tenan winde omba penan same egalen windeen mulup mamin. ³⁵ Bipmanan Nemunan egomti kwitnan kwitnan sambe bepi egan damun mimiyet betnanen bemâge. ³⁶ Âpme an nenan Kawawangat Nemunan ke manâmkinpain beme mama kanzizit ewenan msalen kapiyegak yanbemti masokbemsain yangut am nenan Kawawangat Nemunan egalen zet ke ku gawepuwe beme mama kanzizit ke ku tiwe. Am kebon eknenmagen Kawawangalen welili ewenanak msalen kapiyegak masokbemindain.”

4

Zisasiyan Samalia imbi nenmak zapat mbun

¹ Zisasiyet zapatnan Palisi ekngat pigok kot zeme nâmbien: Zisasiyan am tu tazulutindein eyan Zânan am tu zulutindeye eknen indasebemindeye. ² (Zisasiyan iknan am tu ku zulutind-eye nembanane nin etan am tu zulutindewenn.) ³⁻⁵ Amnan Zudia msat pemti Galili msalen mesât

Samalia msat tunɣupmaset beke tapmetne metne Galili msalen mapataŋ zemtemien.

Âpme Zisasiyet zet sambe keɣok tazeme nâmti eɣaŋ nin nembaŋane ndatime Zudia msat pe-mann tapme Galili msalen gilik zemti mesât Samalia msaleset beke tapmetne metne mka ŋande ŋen kwitnaŋ Saika zeme ke patan zewenn. Mka ke Zekowaŋ nemuŋaŋ Zosep msat saye keyet ganzenan matatan. ⁶ Msat keyegak Zekowaŋ tu pusak timpeyeyaŋ maomnimtemien. Âpme Zisasiyaŋ set teepmaŋ kotne kotne tinsutnan penaŋ beme sebetnaŋ sukaŋaŋ beme tu pusak solonan ke moti totapmaŋge.

⁷⁻⁸ Ke tot tagom tati nembaŋane nin zemndeme mkaen tu meu kwitim tisât mepmann Zisasiyaŋ igak tu pusagen ke totati ekme Samalia imbi ŋenaŋ tu osâgât menzimaŋ kwindiŋti kot tuyen osât tapmme Zisasiyaŋ ekti pigok yaŋkwesiye, “Geŋ tu bugan bemti namane nimbi.”

⁹ Keɣok yaŋkwesime imbi keyaŋ pigok dunduye, “Israel ammak Samalia am nin zapat zenâ zenâ kwep ku mammnup. Yaŋ geŋ eneyet koti tuyet nâgât tatnayaŋkwesinik?”

¹⁰ Zeme Zisasiyaŋ pigok dunduye, “Kawawaŋaŋ geŋ kwileki ŋen taolet gasât tapm ma neŋ an tuyet tadiŋgoyap nâgât yaŋaŋ nânâpiŋ keyepmti tapminik âk nâmti ze nayaŋkwesimane neŋ tu zikatnaŋ kwapeŋ matazin keyetnaŋ gama nimbek.”

¹¹ Zeme Samalia imbi keyaŋ pigok zeye, “Amobotnaŋ tu kapi pusak beŋaŋ penaŋ baen

mambemtimkwatnup. Âpme geŋ tu oo menz-imdi ŋen ku tagain ke geŋ tu zikatnaŋmak e deset tazinaŋ omti nasenik? ¹² Ningat sokŋ Zekop egaŋ tu pusak temaŋ kapi timpeye. Mti iŋŋaŋ ma nemuŋane ma sipsip ma makaŋane ekŋenaŋ tu kwep kapi manimzulutemien. Âpme geŋ Zekop ek sebempemti naman tu dolakŋaŋ penaŋ ŋen zikatnaŋmak makozin ke desetgatnaŋ aikndasâgât tazenik?”

¹³ Samalia imbi keyaŋ kegoŋ zeme Zisasiyaŋ kapigok dunduye, “In tu kapi ometnimti ewe tuyet mti mene mene mamekotomnip. ¹⁴ Âpme nâlen tu tazeyap ke am ŋen sama nimbe beme egaŋ tuyet ŋen ewe ku atotoyelen. Neŋ tu sawap ke keŋanen baen tu yeeŋaŋ dolakŋaŋ zikatnaŋmak penaŋ kwati telepgat tati mama aiksame mambe.”

¹⁵ Zeme Samalia imbi keyaŋ pigok dunduye, “Amobotnaŋ, geŋ tu tazenik ke namane nimti tuyet ŋen ewe atotopiŋ mamambap. Mti tuyen pien mene mene mamekolap e alakŋaŋ ŋen ewe ku mekobap.”

¹⁶ Kegoŋ zeme Zisasiyaŋ pigok dunduye, “Geŋ meti apdimak wati kolit.”

¹⁷ Zeme imbi keyaŋ zeye, “Neŋ apmpin; belak mamayap.”

Zeme Zisasiyaŋ pigok zeye, “Geŋ, ‘Neŋ apmpin,’ e penaŋ zenik. ¹⁸ Yangut geŋ an 5 ekŋenmak mamkwati asekindemkwabanan. Ya alak pi ŋen wapmanik ke gitangât apdi penaŋ yek keyepmti geŋ, ‘Apm yek,’ zet e penaŋ zenik.”

¹⁹ Zeme imbi keyan pigok dunduye, “Amobot-nanŋ alagati neŋ gâgât yaŋaŋdi nâyap. Geŋ Kawawaŋmagen golan zenze an ŋen penaŋ.

²⁰ Âpme geŋ nânik, ekŋen yeŋsokŋne ekŋenan kalan kapiyet dukŋan motati Kawawaŋgat mandundum samtemien. Âpme Zuda am ingulak Zelusalem mka teman ke tati Kawawaŋgat mandundum saip.”

²¹ Zeme Zisasiyan pigok zeye, “Imbi, neŋ pigok zema nâmbak, in kan ke penaŋ sokbeme kalan kapiyet ma Zelusalem mkaen met ondekti Bien ku dundum sawep. ²² In keyet yaŋaŋ nânâpiŋ; be-

lak ek masesewatsaip. Âpme Israel am ningut egat yaŋaŋ nâmâtâti maminup. Kawawaŋ Zuda am ningat tunŋupmnangatnaŋ an ŋen am yomengatnaŋ gilik ze ndatitiyet peme kokogat zenzenaŋ

²³ kan kelak alak kapi sokbem tazin. Âpme egalen am maŋge penaŋ ekŋenan keŋinaŋ penaŋ Emeta-galen set esemten penaŋ tazin keyet katan mamti Bien dundum sawep. Bienaŋ am ekŋen keboŋgat nâme dolakŋaŋ mambein. ²⁴ Kawawaŋ ek an enzililiŋaŋ mamain keyepmti amnaŋ ek sesewat-sasâgât mbep beme ekŋengalen sesewawalin ke keŋinan baenengatnaŋ kwapme mama mimiŋin esemten penaŋ kemak tati sesewatsawep.”

²⁵ Zeme imbiyan pigok dunduye, “Mesaya ma kwitnaŋ ŋen Gilik zeleset Kilais makuip egaŋ sokbemti kwitnaŋ kwitnaŋ sambe keyet yaŋaŋ zemkawaŋ bemndandayet zenzenaŋ e neŋ nâyap.”

²⁶ Âpme Zisasiyan pigok dunduye, “An e sokbembeyet zenzenaŋ elak neŋ kapi tati zet

tadingoyapmak.”

²⁷ Kegok tazeme zemelak nin nembanjane ilak meu kwitim timti koti ekmann Zisasiyan Samalia imbi kemak zapat tapmme ekti nâmtemtem mbien. Mti imbiyet, “Gen pi kwileki tapmnik?” ma Zisasiyet Samalia imbiyet, “Zet kwileki tadundumann?” mee ke idayan kwesisâgât mbenangut nâmann nep ku beme belak pemann tage.

²⁸ Âpme imbi piwan tu menziman mee piwan peme weme belak windembemti mkaen meti am pigok diindoye, ²⁹ “In kopme neŋ Zuda an neŋ kotazingat met zikat indama egit. An keyan nâlen yomm sambe bepi sosok zemkawan bem namâlep. An ke Kilais sokbembeyet zenzenan wa ke mene?”

³⁰⁻³¹ Zeme nâmti am bee ilinsakwep Zisasmagen kosât ewe selen takopme kan keyet nembanjane nin pigok zewenn, “An zikat indanda tu meu bugan niya!”

³² Âpme egaŋ ningat zeye, “Neŋ tu meu sepe-man neŋ tatnain e in kunâip.”

³³ Kegok zeme nâmti nemba nin nnak pigok zenâmbenn, “Am pe kwiyan meu mkot same niwan?”

³⁴ Tazemann ndikti pigok dinndoye, “Neŋ Bienan mulupman mimiyet zemneme toban keyepmti egalen mulupman mdelan zesap keyan tu meunok penan bein. ³⁵ In pigok manzeip, ‘Meu muluwen ondemann kwati eyonga zulak zulak beme meu penan masokbein.’ Yangut neŋ pigok diindoma nâit, in teŋ zemwati mulup egit muluwen meu penan sokbembe teman ilak alak kapi

sokbein. ³⁶ Âpme an nenan mulup mti kenanen mapein kemak am nusi mti penanan maakumtin. Egelan ilisakwep muluwit keyet tosanen timti olojen teman mbalup. Sepem kegogak an nâmkijpepemak nenan an nen Kawawangalen Zet Zapat Dolaknan dunduye. Âpme naman nenan mukulem mme yomengatnan kenan gilik zemti kululun mobotgat zapat bemti main keyepmti an zut keyan muluwidangat tosanen ilizuzut timti olojen ilisakwep mbalup. ³⁷ Âpme nin set kapigok maminup: An nenan mulupman mti maondein. Âpme an nenan mukulem mti nusi kayak mti penanan timti time manje kwep mamozin. ³⁸ Âpme nen in nâlen muluwen meti mulup nembanne indamukulem mti eknenmak ilisakwep meu penan akum time temakwep mobogat nâmti zemindeyapgat melit.”

³⁹ Tazeme Samalia imbi piwan meti animbi sambe eknen pigok diindoye, “Nen yom kwitnan kwitnan mkwaban piwan egan zemkawan bemti namâpme delan zep.” Zet kegok zeme nâmti am sambeyan ek nâmkijpewien. ⁴⁰ Keyepmti Samalia am eknenan Zisasmagen koti eknenmak mamayet yan kwesime Zisasiyan nâme nep beme nin meti ekjengalen mkaen kasup zuletan nsakwep mam-benn.

⁴¹ Ke met mamti zet zapatnan diindome am sambe penanan ewe tusumti Zisasiyet nâmkijpewien. ⁴² Mti imbi Zisas nenan met aige ek ke pigok dunduwien, “Nin nenan gen zet zeman nânnan pi ilak nin penan dembuseknenan zetnan penan nâmti

nâmkinpenup. An kapi penan Kilais msat sambe am nin pi yomengatnan gilik zemti ndatiwe.”

Zisasiyan gapmangalen amobotnan nengat nembayan nen zawalen tapme mme alik beye

⁴³ Âpme Zisas nembayane nin kasup zut pi Samalia am eknenmak ke maneti naman gilik zemti Galili msalen mebenn. ⁴⁴ Mesât mepmambe Zisasiyan iknan pigok zeye, “Golan zenze an nen iknangalen mkanan notaknanen ke tapme iknangalen mange neneyan zetnan gawepumti egat nâme mobotnan ku mambein.” ⁴⁵ Âpme Zismak nembayane nin meti Galili msalen patan zemann Galili msalen animbi eknenan olojen mti ndazemtetime mkaen mobenn. Nin Angalalan Kendoyet Zelusalem mka teman baen met mamti ekmann Zisasiyan menok notnan mme ekbenn keyepmti Zisas ekti ndazemtetime mobenn.

⁴⁶ Ke nin moti keyetnan mane mane naman Kana mka msalen tu zeme wain beye mka keyegak met patan zewenn. Âpme Kapaneam mka keyet gapmangalen amobotnan nen mange egat nemunan zawat nuknan penan mti mawemtan.

⁴⁷ Âpme Zismak nin Zudia msalengatnan ewe Galili msalen kopmann zeme nâmti amobotnan piwan Kana mka msalen meti nembayan gakisât penan tapmme koge keyepmti Zisasi wati mebegat yanqwesim nânge. ⁴⁸ Âpme Zisasiyan pigok dunduye, “In kapi nen menok ma kwitnan kwitnan zikalinan mamananan sokbeme ekti zetn nâmkinpesât maâip.”

⁴⁹ Zeme amobotnan keyan pigok zeye, “Amobotnan Zisas, nemban gakisemmagat kopmane sakwep medi.”

⁵⁰ Zeme Zisasiyan pigok zeye, “Nemundi ilak alik beingat nepgat gitak met!” Zeme amobotnan keyan Zisasiyet zetnan nâmkinpemti mege.

⁵¹ Selen tapmepme sisilin nembane eknenan ek aiksâgât selen metaikti pigok dunduwien, “Nemundi alik bep.”

⁵² Zeme egan indayankwesiye, “Kan zuknan penan alik bep?”

Zeme eknenan zewien, “Sanenen kasup sutnan teman penan tapme kan keyet zawatnan yek bep.” ⁵³ Kegok zeme amobotnan keyan yanan pigok nâmâtâge. Kan keyet penan Amobotnan Zisasiyan zemnemti pigok zep, “Nemundi ilak alik bep.” Ke nâmti mam ip don notnane zemâtâtindame nâmti ilinsakwep Zisasiyet nâmkinpewien.

⁵⁴ Zisasiyan Zudia msalengatnan Galili msalen sek zut meti menok ke mme sek zulak beye.

5

Zisasiyan an nen Betesda tu lemunan weyanpeye

¹ Ke manepeme Zuda am ekpengalen kendo teman nen beme Zisasiyan Zelusalem mka teman mege. ² Âpme Zelusalem mka teman keyet kenan tu lemunan temanik nen sipsip set tokwakwat manzemtemien keyet solonan matatan. Âpme tu lemunan keyet nembet nembet mka mzalan

5 walapeme matatan. Ma Zuda eknengalen zelinaset tu keyet kwitnañ Betesda makumtemien.

³ Âpme mzalañ keyet keñanen am zawatmak ma am zikalin beñañ ma am setnañ wesin ma selin belin wesin bembenañ sambeyañ ke wemti tu titok mme ekti towewegat damuñ matatemien.

⁴ Ke tatnepeme kan notnangāt tu lemunan keyet palen Kawawangalen enselañ kululungangatnañ ñenañ tot titok mme ekti an kwiyañ ñenañ penañ mapalamti totan egañ sakwep sekñañ dolakñañ mambemtan.

⁵ Âpme an ñen setnañ betnañ wesin yañ kan teepmañ nup kan 38 pi notnañ eknenañ windenañ bemti towepme egañ olapme beme belak ke kwesin matatan.

⁶ Âpme Zisasiyañ an ke kan teepmañ penañ matatan ke ekti kemben penañ mti yañkwesiye, “Geñ dolakñañ bembeyet nânik ma yek?”

⁷ Zeme an wesin keyañ zeye, “Amobotnañ, an notn dolakñañ penañ kwiyañ tu titok mme sakwep nambepeme tu keñan towebak? Nen towesât ewe wati tiktik takuma an ñenalak sakwep palam tu lemunan toti ilak alik mambein.”

⁸ Zeme Zisasiyañ pigok dunduye, “Geñ sindi ambepelet timti met.” ⁹ Zeme keyegak an keyañ wawadak Zisasiyet nânâpiñ belak sinañ ambepeleti mkañan mesât mege kasup keyegak Sabat tagoñgo kan tapmambien.

¹⁰ Keyepmti Zuda amobotnañ notnañ eknenañ an dolakñañ beye ke selen aikti egat pigok dunduwien, “Alak Sabat tagoñgo kan sutnan milawadi ambepeleti wati kodik ke set dolakñañ penañ yek.”

¹¹ Zeme egañ pigok diindoye, “An weyañnep

egan pigok dinop, ‘Geñ wati sindi ambepelet timti met.’”

¹² Zeme nâmti an keyet pigok yañkwesiwien, “An wati sindi ambepelet met dingop an ke geñ kwitnañ nâmtadik?”

¹³ Yañkwesime an sekñañ weyayañañ keyañ Zisas dañañ ku nâmâtâge. E eneyet am sambe penañ tabien keyepmti Zisasiyañ sakwep am tungupmaset enzilimege.

¹⁴ Yañ ke maneti Zisasiyañ an ke sesewat mka temanen tapme aikti añañoo zet pigok dunduye, “Geñ sekdi ilak dolakñañ bep. Keyet geñ bekañañ ñen mbanikmagat eksemti mamambanik. Mineti nan nukñañ temañ penañ ñen dukdan mobeyet.”

¹⁵ Zeme an piwan Zisas weyañ ekmâtâti met Zuda amobotnañ pigok diindoye, “An weyañnewan kwitnañ Zisas.” ¹⁶ Zisasiyañ Sabat tagoñgo kan sutnan penañ an ke weyañpeye keyepmti Zuda amobotnañ ekñañ Zisasiyet nâme ñep ku beme kan keyet yañbemti Zisas kume gakikiyet zetnañ mbien. ¹⁷ Nenzinziñ mme Zisasiyañ pigok diindoye, “Bienañ am tagoñgoñepiñ indamukulem mammin âpme neñ sepem kegogak mamiyap.”

¹⁸ Âpme Zuda an ñeñañ ekñañ Zisasiyañ an ñen Sabat tagoñgo kan sutnan weyañpeye keyet ma Kawawañgat nâgât Bipm penañ nit mulup tagoñgoñepiñ mamilup zeye keyepmti ñeñin penañ zime kume gakikiyet zewien.

*Kawawañañ Zisas mulup sambe mimiyele
winde betnan beye*

¹⁹ Âpme Zisasiyan zet pigok diindoye, “Neñ penañ sukwep pigok zema nâit: Neñ Kawawaŋgat Nemunañ neñ keñnangalak mulup ku mamiap. Neñ Bienañ mulup mme ekti keyegak mamiap.

²⁰ Âpme Bienañ Nemunañ neñ ke manigoin keyet mti mulup mamiap katan egan weyañ zikat name mamiap. Yañ mulup mma maegip ke etañ yek. Temañ penañ ewe zikat name mma in ekti nâmtemtem penañ mbep. ²¹ Bienañ am gakikiengatnan mme mawalip. Keyepmti Nemunañ neñ kegogak an ñen gakikiengatnan mma wasât mbawen ñep mma wabep. ²² Âpme Bienañ ikñañ am mama titiyet ma walelet keyet zelin ku zemdelañ zewe. Mulup ke Bienañ nâgât betnnan etañ beme delañ zeye. ²³ Keyepmti amnañ Bipmnaŋgat kwizet buñamañ mamwalip sepem kegogak Nemunañ nâgât kwizet buñamm mwabep. An ñenañ nâgât kwizet buñamm ku mwabe beme egan Bipm zemneme koban an keyet kwizet buñamañ kegogak ku mwabe.

²⁴ Neñ penañ zema nâit: An ñenañ nâlen zet kapi nâmti An zemneme toban ek nâmkînpewe beme an keyañ walelet ku aikbe. Egan msalen kapiyegak gakiki ma yom dopmañ titi set e pempti mama kanzizit elak tiyeyañ mamain. ²⁵ Neñ zet penañ pigok diindoma nâit: Kan alak tatnuwen kapiyet keyepmti am mama mimi bekanangalen seleset mâti mamaip ekñañ neñ Kawawaŋgat Nemunañ nâlen zet nâmti nâmkînpewep beme naman mama kanzizit aikbep. ²⁶ Bien ek mama keyet ñotekñañ âpme Nemunañ neñ kegogak mamayet ñotekñañ bembeyet Bienañ nâmneñge.

²⁷ Neŋ Angat Nemunaŋ keyepmti Kawawaŋ Bipmnaŋ amgat zet zemdelan zenze mulup ke mimiyeŋ zemdelan zemneŋe. ²⁸ In neŋ zet zeyap keyet nâme setnaŋ ku mimiyeŋenok ku besem. Kan ŋen besâpmnen am zaimen am tawep ekŋenaŋ kwizetn nâmti wapmâpme delan zewe. ²⁹ Âpme am mama mimiŋin dolakŋaŋ mti mam-bien ekŋenaŋ mama kanzizit titiyet oloŋen palen wapmâbep. Âpme am mama mimiŋin bekanan ekŋenaŋ yominanŋat dopman timti teziŋ ŋandan towesât bembesipen wapmâbep.

Kawawaŋaŋ Nemunaŋgat yaŋaŋ mamsokbein

³⁰ Neŋ nananŋat keŋŋnanŋalak mulup ke ku mamiyap. Bipmnanŋalen zet keyet katnaŋ am mama mimiŋinanŋat katan zet muluwen indemti dopman esemtanŋak mutumindawap. Ke wa nananŋalen zet yek An zemneme koban egalen zet gawepumti mbap.

³¹ Neŋ nananŋat yaŋŋ nenak zema in nâme penaŋ ku mambein. ³² Nâgât yaŋŋ Bipm Kawawaŋaŋ manzemkawaŋ bemnein keyaŋ penaŋ bein. ³³ In Zân an tu zululut an ekmagen yaŋkwesime egaŋ zet penaŋ ŋotekŋaŋ ilak ke zemkawaŋ bemindame nâmbien kemak. ³⁴ Wa Zânaŋ nâgât yaŋŋ zemkawaŋ bemindaye ke nâgât kwizet buŋamm temaŋ bembeyet nâmti yek. In nâgât yaŋŋ nâmatâti neŋmagen keŋ gilik zenze aikti mama kanzizitgalen set ke mâti mebegat diindoye. ³⁵ Zân an tu zulutindende egaŋ lam temaŋnok bemti in mbusatnaŋ bemindeme sokŋan in kan isikŋaŋ bugan ke ekti

belak etan egowien. ³⁶ Âpme nâgât yanŋ bee Bienan iŋan manzemkawanbein. Ek ke wan Zân kebon yek. Ek windenŋ sepeman igak penaŋ. Egan neŋ mulupm ke mimiyet zem-neme koban. Mulup ke mima mulup keyan neŋ Kawawan iŋanŋat Nemunan e sosok mamim-sokbemnein. ³⁷⁻³⁸ Bienan nâgât yanŋ in ilak zemkawan bemindame nâmnembien. In ekmak dopman ek dopman ek ku mamip ma egan indik tati zet iŋan esemten penaŋ diindome ku manâip. Âpme in naman neŋ egan zemneme koti egalen zet manzemkawan beyap mee pi ku manâmkinpemneip. ³⁹ In Kawawangalen Zet Itnananen zet kapigok tazin ke maiŋti yanŋ maomkakalimti nâip. Zet keyet keŋan mama kanzizit aiksenuŋ zematimaliwan zet keyan nâgât yanŋ manzemâtâtindainen mama kanzizit neŋmagen titiyelen. ⁴⁰ Âpme in neŋmak tusum mamti mama kanzizit titiyelen e ewe wisalagak mamip.

⁴¹ Âpme wa neŋ amnan sekŋ mmobotgat am tungupman belak motati ku manzeyap. ⁴² Neŋgut ingat yanŋanin elak nâma delan zein. In keŋinan Kawawan gogot penaŋ ku mampeip. ⁴³ Neŋ Bienan iŋanŋat munduman zemneme toban keyanŋut in neŋ ku nâmkinpemneip. Âpme an ŋenan igak nânâŋak koti neŋ an kebon kebon zemengut in an ke sakwep manâmkinpemneip. ⁴⁴ Mti ilinak notnanan notnanŋat kwizet buŋaman mwat notnanan notnanŋat kwizet buŋaman mwat mmamti keyet nâme dolakŋan mambein. Kebon ke ingat kwizet buŋamin zigok mwabe? Naman

in zigoset nâgât nâmkinpewnewep? ⁴⁵ In nâgât pigok ku nâseip egan Bipmanmagen meti nin zemndowe neŋ egok neŋ ku mbap. In Mosesimagen mawetekummaip keyepmti Mosesiyan Bipmagen zemindowe. ⁴⁶ Egan zet kuye ke nâgât kuye. Yan in Mosesiyelen zet penan nâmkinpewiek ze elak nâgât nâmkinpewiek. ⁴⁷ In Mosesiyan zet kuye ke ku nâmkinpewien keyepmti naman neŋ zet manzeyap, kapi zigoset nâmkinpewiek?”

6

*Zisasiyan an 5000 bepi tu meu indame nimbien
(Matiyu 14:13-21; Mak 6:30-44; Luk 9:10-17)*

¹ Zisasiyan zet kegok zeme delan zeme Galili tundua kwitnan neŋ Taibilias manzemtemien tundua ke somti nembet daeset mebenn. ² Mepmann animbi sambe eknenan Zisasiyan animbi zawatmak ma wesin mee pi taweyanindeme ekmambiengapmti keyegak ndamâti mebien. ³ Âpme Zisasmak nin nembet moti ndatimti kalan duknan gwaenen moti totapmambenn. ⁴ Kan keyet Zuda am ekngengalen Angalan Kendo soknan beye.

⁵ Âpme Zisasiyan am mange teman penan kwaweti weme indikti egan Pilip pigok yankwesiye, “Pilip, am mange teman penan kapi nupmaman desetgat penan kwitimti am sambe kapi indamann nseip?” ⁶ (Zisasiyan, “Kwitnan kwitnan zigok msap e nâmtati,” Pilipgat belak tetipem ege.)

⁷ Âpme Piliwan wa penan penan zep mene zemti pigok zeye, “Nin mânep 200 Kina bukapiyan meu kwitimti am manje teman bekapi indamann isiksik bugan munzuti nseip mene.”

⁸ Zeme Zisasiyet nembanan nen Endulu Saimon Pitayet datnan egan Zisasiyet pigok dunduye, ⁹ “Zisas, anemba nenan nupmamanan 5 ma angalanen zut etan elenan weti tapme ekti aikolap. Âpme am sambe kamendepman bekabon bekapi bukapi zigok munzutindamann nep benak?”

¹⁰ Zeme nâmti Zisasiyan ningat pigok dinndoye, “In am eknen zemindeme sutnakwep totalit.” Zeme nin am zemindemann kwan sinan yati gwilelan totabien an 5000. Âpme imbimak nembamak eknen ku indamakukunan.

¹¹ Zisasiyan nupmaman ke mti Kawawangat wisikn zemti mutumti am tapmebienen indaye. Mti angala sepem kegogak meselemti am kalan ti indamepme nimâbien.

¹² Meu nimkingapme temepme Zisasiyan ningat pigok dinndoye, “Nime meu butnan totemelep e belak wemti walesemmagangat akume manje kwep molak.” ¹³ Âpme nin nupmaman 5 etan bukapiwan Zisasiyan mme sambe beme nimwianme butnan temege. Pi timti tise 12 kapi wepme gak zeye.

¹⁴ Âpme am eknenan Zisasiyan menok ke mme ekti pigok zewien, “Kawawanmagen golan zenze an teman msalen pi sokbembeyet zenzenan kelak an iknan kapimak!” ¹⁵ Zemti Zisas atamti

amobotnanjin onzempesâgât tazenâme egan wak kambu nâmti nâme n̄ep kumbeme igak buzak kalan̄an mowege.

Zisasiyan tundua paleset mege
(Matiyu 14:22-33; Mak 6:45-52)

¹⁶⁻¹⁷ Msat ilak gasi penan̄ beme nemban̄ane nin nnak tundua ganzenan toti wan̄ga n̄en mti Kapaneam mka msalen daen mesât nâmti towebenn. Towepmann msat tambuyeyepmtilak Zisas ke tapme nnak wan̄ga n̄en mti mebenn. ¹⁸ Tapmepmann tâgâ omba penan̄ kumbume tundua maman̄ omba penan̄ takume ekmambe tapmepmambenn. ¹⁹ Nin wan̄gaen moti ilak bejan̄ daen tu sutnan* kekok tapmepmann Zisasiyan̄ kalan̄angatnan toti nembu paleset ninmagen soknan̄ik tapmepme nin ekti, “Wa! we eknup,” zemti kingabenn.

²⁰ Kegok mmann ndikti kwizet kumti zeye, “Nen̄ nen takolapgat in ku kingalit.” ²¹ Zemti met patan̄ zeme nin betnamann wan̄gaen molak zem tapminepeme wan̄gayan̄ ilak msat mesât nâmti mebiennen ke met sakwep metage.

Am ekjenan̄ Zisasiyet timabien

²² Animbi sambe ekjenan̄ tundua nembet daen tatnepeme msat msame zewien, “San̄en tambuyet wan̄ga kwewetan̄ tapme ekmenn elak Zisaspin̄ nemban̄aneyan̄ etan̄ moti mepme indikmen.” ²³ Kegok zemti tatnepeme wan̄ga notnan̄ Taibilias mkaesetgatnan̄ Amobotnan̄ Zisasiyan̄ Bipman̄gat wisikn̄ zeme tu meu sambe sokbeme

* **6:19:** mael tuk ma zulak zulak

amnanj nimwianjen keeset kot patanj zemâbien.

²⁴ Âpme am ekjenanj Zisas ma nin ndatimati naman wanja keyet moti Kapaneam mka msalen meti tokwat ndatimabien.

²⁵ Timat meti met ndaaikti Zisasiyet zewien, “An zikat indanda, genj zuknan tu nembet daengatnan kopmanan?”

²⁶ Yanjkwesime zet kapigok diindoye, “Nen zet penanj sukwep zema nâit: Nen menok windenjenben inmagen mamiyap keyet nâmkijpennemti ku kolo yek. In meu sambe penanj aikindama nimti ekmien keyepmti nâgât tatokwatnatimalip. ²⁷ In kwitnanj kwitnanj walebe keyet mulupmanj ku mbep. Mama katiknanj keyelen meu keyet mulupmanj weyanj mbep. Mama katiknanjgalen meu ke Angat Nemujananj nenj indandayet Kawawananj iknanj nâmneme njep beme zemdelanj zemnenje.”

²⁸ Zeme zet dopmanj pigok gilik zemti sawien, “Nin mulup pe zibonj ke mmann Kawawananj ningat nâme dolaknanj bewe.”

²⁹ Yanjkwesime pigok diindoye, “An Kawawananj zempeme koge ke nâmkijpewep keyanj muluwin njoteknanj penanj bein.”

³⁰ Zeme ekjenanj zet pigok dunduwien, “Genj pe menok zibonj penanj mmane ekti nâmkijpempewanup? Ma genj pe mulup zibonj penanj mbanigat tazenik? ³¹ Nin yensokjne ekjenanj msat tungupman meu piñan mamti meunjin kululunengatnanj topme nimti mambien. Keyet Kawawanjgalen Zet Itnananen pigok

meluwan mamain nânup, ‘Kawawanaj meu kululunengatnaj aikindame manimtemien.’ ”

³² Âpme Zisasiyan pigok diindoye, “Nej zet penaj diindoma nâit: Moses egaj meu kululunengatnaj penaj ke ku indaye. Mosesiyan Bien Kawawangat dundume Bienaj kululunengatnaj meu ke belak sekjin etaj bandim mimiye maindamkwatan. Âpme alak meu penaj ke Kawawanaj iknaj am indapmukulem penaj mimiye nâmti kululunengatnaj peme toti alak ingat tunguwinan kapi tazin. ³³ Meu kululunengatnaj toti am mama maaikindain ke Kawawangagen meu penaj elak kapi tazin.”

³⁴ Zeme ekjenaj zewien, “Amobotnaj, gen meu zenik ke nin manndamambanik.”

³⁵ Zeme dopmaj pigok diindoye, “Mamayelen meu elak nej kapimak. Am nenaj nenmagen wetekumti mambe beme egaj meuyet ku mbe. Ma am nenaj nej nâmkijpemnewe beme egaj kegogak tuyet ku atowe. ³⁶ Nej pigok diindoma nâit: in nej zikalina ke niktingut ewe ku manâmkijpemneip. ³⁷ Bienaj am nâmindeme nenmagen makolip ekjen ke nej nep ku zemindema mekep. ³⁸ Nej kululun gwaengatnaj toban e wa msalen kapi nanangat nânânnangat etaj mamayet ku toban. An zemneme toban egalen zet gawepumti keyet katan mamayet toban. ³⁹ Bienaj am nâmdelan zemti nâlen belen bemindeye. Ekjen ke maneti walelet aikbiekma-gengapm nej indikdamun dolaknaj mti maneti bam kobawen ekjen ke ilindin gakikiengatnaj mamaen mkwatindewap. An zemneme toban

egalen nânâ ilak zeya kekok. ⁴⁰ Am neŋ nikmâtâti manâmkinpempneip ekŋen bam gakikiengatnan mwat indema mama kanzizit keyet toŋaŋ bewep. Biengalen nânâŋaŋ kekok penan tazin.”

⁴¹ Zisasiyan “Neŋ meu kululuŋengatnan” zeye keyepmti Zuda am ekŋenaŋ nâme bekanan beme zet mmot mtot sambe penan mbien.

⁴² Mti pigok zewien, “Zisas pi maman bipman Zosep ma Malia e nâmidenup. Âpme naman egaŋ zigoset neŋ kululuŋengatnan kwatoban pi tazein?”

⁴³ Zemti ilinak zet ŋunuŋ ŋunuŋ tapmmepme Zisasiyan indikti pigok diindoye, “In zet ŋunuŋ ŋunuŋ peme talak. ⁴⁴ Nâip, an ŋenaŋ ikŋaŋgat keŋaŋgalak neŋmagen kokot ke ŋep ku tazin. Bienan an ke nâmpemenŋut ŋep neŋmagen kokogalen. Âpme neŋ an neŋmagen kobe ke maneti bam kokot kananen koti gakikiengatnan mwat pewap. ⁴⁵ Golaŋ zenze an egaŋ Kawawaŋgalen Zet Itnaŋanen pigok meluwan mbien,

‘Kawawaŋan ikŋaŋ am sambe ikŋaŋgat yaŋaŋ zemkawaŋ bemindawe.’ (Aizaya 54:13)

Keyepmti an ŋenaŋ Biengalen zet ke nâmti keyet katan mambe egaŋ neŋmagen kobe. ⁴⁶ An ŋenaŋ Bien sepemaŋ bugan ku ege yek penan. Neŋ Kawawaŋmagengatnan toban neŋ etaŋ gulak nâmpeyap. ⁴⁷ Neŋ zet penan pigok diindoma nâit: An ŋenaŋ neŋ nâmpkinpempnewe beme egaŋ mama kanzizit tiwe. ⁴⁸ Mamayelen meu e neŋ. ⁴⁹ Yenŋokŋine ekŋenaŋ msat tungupman mamti meuŋin meu kululuŋengatnan manimtemien yaŋgut gakimâpme delaŋ zeye.

⁵⁰ Âpme meu kululuŋengatnan kwatoge ke an ŋenan nimbe beme egaŋ ŋep ku gakiwe. ⁵¹ Mama keyelen meu kululuŋengatnan toge elak nen kapi. Keyepmti an ŋenan meu kululuŋengatnan totot-naŋ ke nimbe beme ek mama kanzizit mameti mambe. Sesumban keyaŋ meunok bein ke msat sambe am indama nime keyaŋ mama kanzizit aikindaweyet indawap.”

⁵² Âpme Zuda am ekŋenan ke nâmti ilinak ŋenzinziŋ mti zewien, “An kapiyaŋ zigoset ikŋaŋgat sesumbanaŋ munzut ndame nin niniyet tazein?”

⁵³ Tazenâme Zisasiyaŋ indikti pigok diindoye, “Neŋ penan sukwep penan pigok zema nâit: In nâgât sesumbann ma sipm ke ku nimbep beme in mama kanzizit ku tiwep. ⁵⁴ An ŋenan nâlen sip sesumbann nimbe beme egaŋ mama kanzizitgat zapat bemti mame neŋ kobawen ek gakikiengatnan mima wabe. ⁵⁵ Nâlen sip sesumbann ke tu meu nemboŋ penan ⁵⁶ keyepmti an ŋenan nâgât sipm sesumbann ke nimbe beme egaŋ neŋmak tusuwe. Âpme neŋ ekmak tususu dolakŋaŋ mti mambalup. ⁵⁷ Bien Kawawaŋ ek mama toŋaŋ egaŋ ikŋaŋ zemneme toban. Neŋ ekmak mamayap keyepmti neŋ mama kanzizit timtalap. Kegogapm an ŋenan neŋ natnimbe beme egaŋ nâgât pembedaŋnnaŋgat mti mama kanzizit timti mamambe. ⁵⁸ Meu kululuŋengatnan toge wa e yeŋsokŋineyaŋ msat tuŋgupman mamti meu manimtemien sepem keboŋ yek. Ekŋenan meu ke timti manimkwatemienangut gakim mâbien. Âpme an ŋenan nâlen meu zeyap kapi nimbe

beme egan gakikipin kwesiñ kwesiñ mameti mambe.”

⁵⁹ Zisasiyan Kapaneam sesewat mkaen am Zet Zapat Dolakñan tazemzikat indametneti ikñangat zet zapatnan kapi zeye.

Am notnanan Zisasiyet nâme wisat beme bamkumpemti mebien

⁶⁰ Am notnan ek mâti mamtemien ekñenan zetnan ke nâmti pigok zewien, “Zet kapi pe zeme nâmann keñ penan ku bein. Zet kebon ke an kwiyan ñep apumti zenak?”

⁶¹ Zemti wisat zet mme Zisasiyan keñinan baen indikmâtâti pigok diindoye, “In zet zeya keyet nâme keñin penan ku beme wisat mnemti mesât tatnâip!

⁶² Âpme in tati ekme Angat Nemunan neñ gilik zemti naman munduman maneti tobanen keyegak mowepma in ke ekti pe zigok nâmbep?

⁶³ Nin mambipmma-gen masokbenup ke ekñenan mama msat palen kapi mamayelen mme masokbenup keyangulak Kawawangalen Emetak Tenan mama alakñan titiyelen keñnan mam mme sokbein. Keyepmti neñ zet zeya ke Kawawangalen zet in mama indandayelen ke diindoya. Âpme an ñenan zet ke nâmpinpewe beme egan Emetak Tenan mama kanzizit ke same mamambe.

⁶⁴ Âpme inmagen am notnanan zet keyet nâme penañepin beme ku nâmpinpeyo.” (Zisasiyan am zet zapatnan dolakñan kapi bamkumpewep ma maneti bam an zemkuwe e mee ewenanak indikmâtâpme mamtemien keyepmti egan zet kegok diindoye.)

⁶⁵ Mti zet butnan ñen pigok tusum zeye, “Neñ

kegogapmti ewenaj pigok diindoya an nen Bi-
enan kenaj mim elen belen bembepin mme egan
igak nânâjak nâlen nep ku kobe.”

⁶⁶ Zeme kan keyet am notnan eknen Zisas
mâti mamamtemien eknenaj ewe mâti mamayet
wisat mti bamkumpemti mepmâbien.

⁶⁷ Âpme Zisasiyan nembajane 12 nin pigok
ndayankwesiye, “In am notnanaj tapmelip
kegogak nemti mesât tatnâip?”

⁶⁸ Zeme Saimon Pitayan pigok zeye,
“Amobotnanj, nin gen gemti naman kwimagen
mebanup? Mama katiknaj titiyelen zetnan
gen etaj manzemâtâtndamane nânup.

⁶⁹ Nin genmak mamti pigok manânup gen
Kawawangat Nemunaj ten penaj e nâmgemti
manâmkinjpemgenup.”

⁷⁰ Zeme Zisasiyan nin pigok dinndoye, “Nen
nemba in 12 kapi indatimamayap yangut in-
gat tunguwinangatnan nen Sadanmak mamain.”

⁷¹ Egan Zudas Saimongat nemunaj Iskaliot
mkaengatnan keyet nâmti zeye. Zudas ke nemba
12 ninmagengatnan an nen ilak ke. Yan maneti
an keyaj Zisas zemkuwe.

7

Zisasiyet meniñane eknenaj ku nâmkinpewien

¹ Zelusalem mka teman Zuda amobotnan
mambien eknenaj Zisas kume gakikiyet zeme
nâme Zisasiyan ilinangalen msalen Zudia ke
mebepin Galili msalen mka isisiknaj sambe
tokwati mulup mamtan. ² Âpme Zuda am
ekjengalen mka mzalan isiknaj walati Mzalan

Kendo keyet weweyelen ilak soknan beye.
³ Âpme Zisas iknangat meniñane ekñenan
 koti pigok dunduwien, “Geñ Galili msalen
 pien mamti menok sepem igak igak maminik
 kegogak Zudia msadan gwaen meti mmane
 amdine ekñenan gikbep.” ⁴ An ñenan kwizet
 buñaman teman tisât nâmti mulup enzilimti ku
 mamin. Geñ mulup kegok msât yanbewanangat
 sosok sokbemti mulup mmane am msat sambe
 ekñenan gikmâtâbep.” ⁵ Meniñane ekñenan Zisas
 nâmkijpepepiñ mtopemti zet kegok zewien.

⁶ Zeme Zisasiyan pigok diindoye, “In Zelusalem
 mka teman moti mulup e ma e msâti kilenj belak
 mamolip. Âpme nengulak ke mobotgalen kan
 ewe ku beingapmti talap.” ⁷ Am ekñenan in belak
 ekñengat kandaninan zet nânân mame zigogat
 ekñenan kasa mimindawep? Nengulak ekñengat
 myunğunğunjin zemkawan bemindama keyepmti
 neñ kasa kasa mamimnaip.” ⁸ In Kendoyet ñepgat
 ilinak Zelusalem mka teman mowelit. Âpme neñ
 ke mobogalen kan ewe ku beingapmti sakwep ku
 mosap.” ⁹ Kegok zemti Galili mkaenak tage.

Zisasiyan Mzalan Kendoyet Zelusalem mkaen mege

¹⁰ Tapme ekñenan pemti mepme egan igak bam
 meti am keñan buzak buzak tatokwapmanje.
¹¹ Âpme Kendo beme Zuda amobotnan ekñenan
 am indayanğwesimti zewien, “Zisas ek de tazin
 zenâit?”

¹² Indayanğwesime am sambe ekñenan egat
 zapatnan omba mezem kozem mme palaknan

beye. Mme am notnanan zewien, “An ke an dolaknan.”

Âpme notnanan naman pigok zewien, “Yek, an ke am kenin mme mayungumtemezin.” ¹³ Amnan Zuda amobotnan ekngat kingati zet sosok sosok ku zewien.

¹⁴ Âpme Kendo tapmetnepeme sutnateman bemngut Zisasiyan sesewat mka temanen moti am Kawawangalen Zet Itnanan zemzikat indame ¹⁵ Zuda amobotnan eknenan nâmtemtem teman mti zewien, “An kapi ningalen zii zet zikat indanda anne ekngat kandaninan ku manggeyan egan zigok mti Kawawangalen Zet Itnanangalen yanang kapi dolaknan penan tazemâtâzin?”

¹⁶ Zeme Zisasiyan pigok diindoye, “Neñ Kawawangalen Zet Itnanan diindoyap kapi wan nanangat kenngalangak yek. An zemneme koban ekmagengatnan timti tazeyap. ¹⁷ Âpme an nenan zet kapi Kawawangangengatnan ma nenmagengatnan nâsât mbem beme egan elen belen bemti Kawawangalen zet ke gawepumti nenmagengatnan ke nep nâmâtâbe. ¹⁸ An nenan iknangat etan nâmti mulup mbe beme egan belak iknangat kwizet buñaman etan mwabe. Mme neñ An zemneme toban egat kwizet buñaman mwasât toban wa neñ zet ke dâsuki ku manzeyap. Zet penan penanak zemti kwizet buñaman mamwapeyap. ¹⁹ Mosesiyan zii zet mtotindaye ke inmagengatnan an nenan ke neselak penan gawepume delan penan ku manzein. Âpme in naman neñ zii zet ku mangawepuyap zemnome gakikiyet pi manzeip?”

²⁰ Zeme am sambeyan pigok zewien, “Gen kwiyan gosât manzein? Gen penan kenndanen we bekananjan totapme zet kilen kilen tazenik.”

²¹ Zeme Zisasiyan pigok diindoye, “Nen Sabat tagonjo kanen menok teman kwep mma ekbien keyepmti in nikti nâmtemtem omba penan mamimneip. ²² Nen pigok diindoma nâit, Mosesiyan in nemunine sekjin butnan antim indendeyet zemindeme mamip yangut ke Mosesiyan ikjan set ke ku yanbeye; ingat yensokjine ekjenan yanbewien. Yan mulup ke mamkwatne kwatnelak alak pilak nempa sokbembenin mâti Sabat tagonjo kanen eyo mamip. ²³ In Mosesiyelen zii zet ke gawepumti Sabat tagonjo kanen eyo nemunine sekjin butnan maantip. Âpme nen an wesin nen Sabat tagonjo kanen sekjan mma dolakjan penan beye keyet naman kwilekiyet nâgât nenzinjin mbien? ²⁴ In zet nâmâtâtâpin belak kilen ku manzemambep. In weyan nâgât yan nâmâtâlit. Nen Kawawanhalen nânân dolakjan set kwitnan kwitnan penanak manzemti mamiap.”

Zisas ek penan Kilais Kawawanmagengatnan toge zemti zem usulabien

²⁵ Âpme Zelusalem mka mton notnan ekjenan pigok zewien, “An damun ekjenan an kusât manzeiwan an ikjan kapi manze egit. ²⁶ Egan zet sosok penan am sutnan penan kapi tazeme amobotnanne ekjenan ekti eneyet ku zemkulumpeip? Ekjenan ek ilak Kilais e sosok ekti keyepmti belak nâmpeme tati tazein mene? ²⁷ Nin

an kapiyelen mkanan nteknan nep nânup. Âpme Kilais kobe ek nin yananan ma mkanan mee nep ku nâmpewanup.”

²⁸ Zisasiyan Zelusalem sesewat mka teman ke tati am iknangat yanana diindomambe nâme kegok zeme nâmti bim ndenan mwati pigok diindoye, “In nâgât yanana penana zigoset koban ke ku nâmâtâlîp. Nen nenak kenana nangalak ku toban. An zet penana penanak manzein An keyana zemneme toban nâip. Âpme in An ek ku nâmâtâpeip. ²⁹ Nen iknangmak manepema zemneme toban keyepmti nen egat nâmâtâpeyap.”

³⁰ Kegok zeme nenin zime wati mka katinan met pesât nâmbien yangut Kawawanan egat kanana beye e ewe ku koge keyepmti atatayet belin nuknan beme peme tage. ³¹ Âpme am notnan sambe tabien eknenana Zisas nâmkinpemti pigok zewien, “Kilais egana koti menok sepem igak penana mbe zenzenana elak an kapiyana set kwitnan kwitnan sambe bee mme delana tazein.”

Zisasiyan Bipmangalen gilik zemti mosât zeme eknenana kadatbien

³² Am eknenana zet kusuna kasak tapmme Palisi eknenana nâmti met sâpe sâpe bumbu an nenana eknenmak zenâmti sesewat mka temangalen antipdakutun zemindeme Zisas wati met mka katiknan pesât mebien. ³³ Âpme Zisasiyan pigok diindoye, “Nen kan isiknan bugan kapi inmak maneti bam gilik zemti naman An zemneme koban ekmagen mowebap. ³⁴ Âpme in nen

natimabep yangut nep ku naikbep. Nen met mambawen ke in ku kobep.”

³⁵ Kegok zeme Zuda amobotnanj eknenanj pigok zemti ilinak zenâ zenâ mbien, “An kapi pe deset buzak penanj mepme nin timabanupgat tazein? Ma ek pe Glik msalen Zuda am notnane eknenmagen met enzilim mamti iknanjat yananj dâsuki ke Glik am diindosâgât mene nâmti pigok tazein? ³⁶ ‘In natimati nep ku naikbep ma mebap ke in ku kobep,’ zet kebonj ke yananj penanj zigogat nâmti tazein?”

Zisasiyan Emetak Tengat yananj zeye

³⁷ Zuda am eknenanj Mzalan Kendo ilak tat delanj zesât mme sâpe sâpe bumbu an eknenanj mawanj kokogat dundusât towepme Zisasiyan tunjuwinan watati zet memendepmanmak pigok zeye, “Am nen tuyet maatoin beme eganj nenmagen koti tu nimbe. ³⁸ Kawawangalen Zet Itnananen tu ke Emetak Tengat nâmti zet zemak zemak miminanj keyet yananj kapigok, ‘An nenanj nen nâmkinpemnewe beme egat kenanen tu am mama maaikindain keyanj an keyet kenanen zikatnanmaknok kwati kwesinj matapmambe.’ ” ³⁹ Zet kekok tazin keyepmti am Zisas nâmkinpewien eknjengat Zisasiyan pigok zetik mimindaye, “In kapi tapme nen kululunjen mundum elimiaknanmak keyet kenanj gilik zem moti Emetak Tenj zempema inmak totmambe.”

⁴⁰ Am eknenanj zet ke nâmti ilinak Zisasiyet pigok zemebien, “An kapi penanj golanj zenze an nin egat kokogat damun matatnuwen ilak kapi.”

⁴¹ Âpme am notnanan pigok zewien, “An kapi penan Kilais Kawawanan iktan ombempeme kokogat zeye.”

Zeme am notnanan zewien, “Kilais ek Galili msalen kapi ku sokbembeyet zenzenan?

⁴² Kawawangalen Zet Itnananen zet pigok zenzenan,

‘Kilais ek amobotnan Dewitgat soknan keyepmti egan Dewitgalen mka notakan Beteleem sokbembeyet zenzenan.’ ” (*Maika 5:2*)

⁴³ Am eknanan Zisasiyet zet kegok zemti ilinak kalanbien. ⁴⁴ Mti am notnan eknanan Zisas atamti met mka katikan pesât mbienangut belak peme tage.

Zuda an nenan eknanan Zisas ku nâmkinpewien

⁴⁵ Âpme sesewat mka temangalen antipdaktum zemindeme mebien eknanan naman belak etan gilik zemti Palisi ma sâpe sâpe bumbu ekngalen an nenan eknenmagen mepme indikti eknanan pigok indayankwesiwien, “In zigogat Zisas wawapin belak pi kolip?”

⁴⁶ Indayankwesime eknanan zewien, “Egan zet manzein kegok ke an nenan zet kebon penan nen nep ku zenzeyelen keyepmti nâmtemtem mti ku atan kotnup.”

⁴⁷ Zeme Palisi eknanan pigok diindowien, “In egan kenin kegogak myungup mene wa kapi?

⁴⁸ In ekme sâpe sâpe bumbu ekngalen an nenan ma Palisi an ninmagengatnan notnan eknanan egat zetnan nen nâmkinpeme ekbien? ⁴⁹ Am ek mâti tapmaip eknen ke Mosesiyelen zii zet kapi

ku weyaŋ manâmâtâlîp keyepmti am ekŋen ke maneti bamgat Kawawaŋaŋ indawalebe.”

50-51 Âpme Palisi an ekŋengat tungupwinangatnaŋ an ŋen kwitnaŋ Nikodimas. An keyaŋ itnaŋaŋ tambuyet moti Zisasmak zapat mbun. Ek keyaŋ notnane ekŋengat pigok zeye, “In nin an ŋen yomaŋmak ma yek keyet yaŋaŋaŋ nânâpiŋ belak etaŋ gakikiyet zetnaŋ zemdelan zenzeyet zetnaŋ ŋen zii zelen meluwaŋ mimiŋaŋ ŋen ku tazin.”

52 Zeme notnane sambe ekŋenaŋ pigok dunduwen, “Geŋmak ek msalit Galili kwepgapmti m angalaŋ pemti tazenik? Geŋ Kawawaŋgalen zet meluwaŋ itnaŋaŋ mimiŋaŋ ke weyaŋ maiŋti keyet nânâ mulup omba mbegen An Kawawaŋaŋ ombempaye ke sokbembeyet zenzenaŋ ke Galili msalen kapi ku sokbembeyet zenzenaŋ ekbek.”

53 [Mti ondedagen zet mmot mtot mti belak kalaŋti ekŋenaŋ mkaŋinan mekopme Zisasiyaŋ Olip Kalaŋaŋ mowege.

8

Imbi set kileŋ mamaŋaŋ ŋen wati Zisasmagen mebien

1-2 Zisasiyaŋ Olip Kalaŋaŋ ke mopmanepeme msame toti sesewat mka temanen mowepme am sambe penanaŋ ek ekti ekmagen met pende pende tapmme egaŋ ke totati Kawawaŋgalen zet zapat dolakŋaŋ tadiindome ³ kan keyet Palisi ma an zii zet zikat indanda an ekŋenaŋ imbi ŋen set kileŋ mame ekti wati met am tunguwinan

onzempemti Zisasiyet zewien, ⁴ “An zikat indanda, imbi kapi apman pemti met set kilen manepeme ekti wati gâlen kotnup. ⁵⁻⁶ Imbi eknen kabon kapi nin nanzan timti indomann gakikiyet Mosesiyan zii zelen zemâtâtndaye.” Eknenan, “Nin yankwesimann Zisasiyan zet zigok nen zeme ekti wati zelen met pesenup,” zemti pigok yankwesiwen, “Amobotnan imbi kapi zigok msasenup ze zemanê nâne?”

Zeme Zisasiyan kusum tati betnan yuyan msalen baen meluwan takumange. ⁷ Âpme eknenan yankwesim gingin penan mme egan nâmtage tageyan yek bemenjut ten zem wat indikti pigok diindoye, “Inmagengatnan an nen yomepin kwetetepman penan main egan yanbemti imbi kapi nanzanan kuknangat kumenjut in sambeyan kummeti kume gakisem.” ⁸ Zemindamti egan ewe kusum toti msalen baen betnan yuyan meluwan takumange.

⁹ Âpme eknenan ilinak pe an kwiyan yanbem kume ekti kusenup zemti meek koek mbienan yek beme an penan penan nenan yanbemti pakpak kwep kwep toti kwawet mme eyetnan am notnan eknenan tapmetne metne peme delan zemâge. Âpme imbi kemak Zismak ilidak etan tabun. ¹⁰ Âpme Zisasiyan ten zem wati ekme imbi piwan igak tapme ekti zeye, “Am gosâgât kot tapmmo eknen pi wan de melo? An nenan tati gen ku gonak?”

¹¹ Zeme imbiyan pigok zeye, “Amobotnan, am pi kunzun mepme delan zep.”

Âpme Zisasiyan zeye, “Nej kegogak yomdangat dopman njen ku zemgonjyolen. Gej mepmamti set kilenj mama manik ke pemane tabe.”]

Zisasiyan ikhangat yanyan zemkawan bemin-daye

¹² Âpme kan njangat Zisasiyan sesewat mka teman kenan tati am zet njen pigok diindoye, “Nej msat sambe bekapiyelen tanam keyepmti am njenan nej napmâti mamambe beme egan tambusosok kenan ku mambe. Ek nâlen busatnanan mbusatnan bempeme egan ekmâtâti mama dolaknan mambe.”

¹³ Kegok zeme Palisi ekjenan pigok dun-duwien, “Pi gitiyegak yanyandi dinndonik kapi nâmann penan ku bein.”

¹⁴ Zeme Zisasiyan pigok diindoye, “Nej nanangat yany zeyap kapi penanepin ku bein. Nej deyetnan koban ma maneti naman deeset mehap e nâmâtâtati tazeyap. Âpme in ke ku nâmti belak kilenj tazeip. ¹⁵ In nej zet zeya keyepmti ilinangalen nânâninan ma mama mimiñin mamimkwali ke nâmti keyet katan zet muluwen neip. Âpme nej am zet muluwen nenak ku pepeyelen. ¹⁶ Nej kwileki nenyet am njangat zetnan zemdelan zesâti esemten penan zemdelan zempewak. Nej am zet muluwen indendeyet mulup e nenak etan ku mamiyap. Bien zemneme koban egan napmukulem mnemenjut nilisakwep nep mimiyele. ¹⁷ Ilinangalen zii zelinan zetgat yanyan kapigok tazin,

‘An zulan an nenyet yanꝋan kok kok main zemalu
amnan nâme penan mambein.’ (Zii Zet
17:6; 19:15)

¹⁸ Âpme nenmak Bipm zemneme toban nit nilisak-
wep nâgât yanꝋan bandim mti manzemkawanbein
keyepmti nen nanangat zema zetn penan mam-
bein.”

¹⁹ Zet kekok diindome eknenan pigok
yanꝋwesiwien, “Bipdi pe deset tapme tazenik?”

Zeme pigok diindoye, “In nâgât yanꝋan ku
maekmâtâlíp keyepmti Bipm kekokak ku
manâmâtâpeip. In nâgât nâmâtâbiek ze Bipm
kekokak nâmâtâpewiek.”

²⁰ Zisasiyan Kawawangat tewalan mânep be-
mbe bongis matatan mka kenan keyet kenan
tati am zet zapat dolaknan tadiindometneti zet
kapi zeye. Keyepmti am eknenan ek wati mka
katiknan met pesât nâmbienangut Kawawanꝋan
egat kanan beye e ewe ku beye keyepmti atatayet
belin nuknan beye.

In nen Bienmagangatnan koban ke in ku nâip

²¹ Mti Zisasiyan ewe pigok tusumti diindoye,
“Nen indemti mepma in natimapme yek beme
bekananin msekpen gakiwembep. Nen meti
mambap ke in nep ku kobep.”

²² Kekok zeme Zuda am eknenan zewien,
“‘Nen mekap ke in ku kobep,’ kekok ke yanꝋan
kwilekiyet nâmti tazein? Iknan seknan waleti
gakisâgât mene nâmtazein?”

²³ Âpme Zisasiyan pigok diindoye, “In msat
kapiyelen am. Âpme nen kululun gwaengatanꝋan
wan nen msat kapiyetnan yek. ²⁴ Keyepmti

neñ eweñanak pigok diindoya in yomin melesin maneti gakiwep. In neñ Kilais mayap ke ku nâmkijpewnep beme in maneti yomin sekpen gakiwembep.”

²⁵ Zeme nâmti pigok yañkwesiwien, “Âpme gen kwi? Ze zemanê nâne.”

Zisasiyan pigok diindoye, “Neñ ilak yañ zemkawan bemindama nâmâlo kemak. ²⁶ Neñ ingalen nukñan sambe weme ekti ñep zemindondoyelen yañgut belak ekpemtî mamayap. An zemneme toban egañ keyet zet esemten zemti dopmañ mutumindawe. Âpme neñ belak zetnañ zeme eknâm mban ke etañ msalen kapi mamti am sambe kapiyet sosok manzemkawan bemin-dayap.”

²⁷ Zisasiyan Bipmañgat zapatnañ kegok diindome amobotnañ ekñenañ ku weyañ nâmâtâbien. ²⁸ Keyepmti Zisasiyan tusumti ewe pigok diindoye, “In Angat Nemunañ neñ tewen nâmti mwat onzemnemtingut neñ Kilais keyet yañan weyañ ekmâtâbep. Neñ wa mulup mamiyap kapi nanañgat windeyet mamiyap yek. Bienañ zet zemâtâtneñge keyet katan zet am manzemâtâtindayap. ²⁹ An zemneme toban ek neñmak mamain. Âpme neñ mulup sambe zemti mma egañ manigoin keyepmti egañ ku manemezin.”

³⁰ Zet kegok zeme am sambeyan zetnañ ke nâme penañ beme nâmkijpewien.

An ñenañ bekanan mbe beme keyet kandañan meti mambe

³¹ Âpme Zuda am Zisas nâmkinpewien eknen keyet pigok diindoye, “In neñ zet diindoyap keyet katnanen mamti nemunambanne penañ bewep.

³² In nâlen zet ke mâti keyet katan mame keyañ bekanangalen kikitek ke elangemindeme neñmak tusumti belak lala mambep.”

³³ Âpme am notnañ Zisasiyet ku nâmkinpewien eknenañ zet ke nâmti zet dopmañ pigok dunduwien, “Nin Abalaamgat nemunambañane nin an kwiyañ ndangalanñti kandañan ndeme matatnupgapmti geñ ningat, ‘In kikitekñin e kwalet indema belak lala mambep.’ Pi zenik?”

³⁴ Zeme Zisasiyañ pigok diindoye, “Neñ penañ sukwep pigok diindoma nâit. An ñen yom mami-mambe beme an ke yomgat kandañan meti egat sisiliñ muluwetan mamimambe. ³⁵ Sisiliñ an egañ amobotnañ egalen mkaen kwesiñ matazin keyangut nemuñañ yek. An keyet nemuñañ penañ kelak ikañgat nemuñañ. ³⁶ Keyepmti Kawawañgat Nemuñañ neñ yomgalen kikitek keñan mamti sisiliñ mulup mamip ke kalutindewap beme in belak lala penañ mambep. ³⁷ In Abalaamgat inñsokñane e neñ nâmindeyap. Keyepmti neñ zet diindoma zetnnañ belak ingat sekninan mot kumti gwalalañ kumti matozin keyepmti in neñ nosât manzeip. ³⁸ Neñ Bienañ kwitnañ kwitnañ zikat name ekban keyet zapañnañ mandiindoyap. Âpme in biwineyañ kwitnañ kwitnañ zikat indawien ke mamip.”

³⁹ Zeme pigok dunduwien, “Ningat bipm Abalaam.”

Zeme Zisasiyan pigok diindoye, “In Abalaam-gat nemunambañane penañ mambiek ze Abalaaman Kawawangat zetnañ kandañan mamamtan keyet sepem mamambiek. ⁴⁰ Neñ Kawawangalen zet penañan kapi mandiindoma in naman nâme dâsuki beme nosât mamip. Abalaaman muluwan bekanan kebon ke ñen ku mge. ⁴¹ In biwinangalen set mâti mamip.”

Âpme ekñenañ pigok zewien, “Nin an ñenmagengatnañ ku sokbewenn; Kawawan ek ningat Bipm penañ.”

⁴² Zeme Zisasiyan pigok zeye, “In Biwin Kawawan ze in Egan neñ zemneme toban keyepmti in neñ ñep notn mnewiek wa neñ nanangat keñnañ galak etan ku toban Kawawangañ ikñañ zemneme toban. ⁴³ In zigogat penangapm keñ katik mmame neñ zetn zema keñinan ku matowezin? Ma zigogat neñ zet zema wakñin ku mambeip? ⁴⁴ In biwin Sadan keyepmti egan zemâtâtindame egalen nânâen mulup mamip. An ke eweñan am indawalelet mulup mgeyan ewe mamimkwazin. Egan Kawawangalen zet bamkumpeye keyepmti egat keñanen zet penañ zenze ke ñen ku matazin. Ek zet dâsuki zenze keyañ mama mimiñañ beyeyepm ek an dâsukitoñ ma zet dâsuki zenze ke bipmañ ek. ⁴⁵ In egat kandañan meti mamaip keyepmti neñ Kawawangalen zet penañ kapi diindoma in ke nâmti zetn ke ku manâmkinpeip. ⁴⁶ Inmagen an ñenañ nâlen yomm ñen zemkawan bemname nâsap? Neñ an teñ penañ mamayawan zet zapat dolakñañ

kapi diindoma in kwilekiyet penañ zetn ku manâmkinpeip? ⁴⁷ Am Kawawaṅgat zapaṭ mamaip ekṇenaṅ Kawawaṅgat zetnaṅ manâip. Âpme in Kawawaṅgat zapaṭ ku mamaip keyepmti in zetnaṅgat wisat mamip.”

Abalaamak Zisasiyet zet zenzenaṅ

⁴⁸ Zeme Zuda am ekṇenaṅ zet dopmaṅ pigok gilik zemti sawien, “Nin kegogapmti manzenup Samalia an geṅ kapi we bekaṇaṅ keṇḁan tapme zet kileṅ kileṅ tazenik.”

⁴⁹ Zeme Zisasiyaṅ pigok diindoye, “Neṅ we bekaṇaṅ keṅḁ ku mimyunguin. Neṅ Bipm Kawawaṅgat kwitnaṅ mamwapeyap. Âpme ingulak neṅ niktalati selaṅ nime belakṇaṅ penañ mambeyap. ⁵⁰ Wa neṅ nanaṅgat kwizapatn temaṅ bembeyet nâmti mulupmaṅ ku mamiyap. Nâgât kwizet buṅamm mwati zenze mulup ke An ṇenaṅ mbe. An ke zemdelan zenze anaṅ mbe. ⁵¹ Neṅ zet penañ pigok diindoma nâit, An ṇenaṅ nâlen zet gawepumti mim mambe beme ek gakikiyelen set ku aikbe.”

⁵² Kegok zeme Zuda am ekṇenaṅ pigok zewien, “We bekaṇaṅ keṇanen tazin zet e penañ tazenup! Abalaam gakiye ma golaṅ zenze an ekṇen sambe kegogak gakimâbien. Âpme geṅ na zet pigok tazenik, ‘An ṇenaṅ nâlen zet kapi gawepumti mambe beme egaṅ ku gakiwe.’

⁵³ Bipm Abalaam temaṅ bepiwan gakiye. Âpme geṅ bukapiyaṅ ek sebempesâgât zenik? Golaṅ zenze an sambe bepi kegogak gakime delan

zemâge. Âpme geŋ ziboŋ penanŋapm kok zemti gitanŋat sekdi omba penanŋ mmodik?”

⁵⁴ Zeme Zisasiyan pigok diindoye, “Neŋ nananŋat sekŋ mmopma ɲep penanŋ ku benak. Bipm in egat, ‘Kawawanŋ,’ manzeip eganŋut nâgât kwizet buŋamm mamwazin. ⁵⁵ In ek ke ku maweyanŋ nâmâtâpeip âpme nenŋut ek manâmâtâpeyap. Neŋ zigok dâsuki ke ek ku nâmpeyap zesap e mtilak in nemboŋ an dâsukitoŋ besapŋat. Neŋ egat yanŋanŋ nâmâtâtî keyepmti zetnanŋ maŋgawepuyap. ⁵⁶ Biwin Abalaam ke neŋ kopma niknikŋat keŋanŋ seŋme muluk kaik matatan. Yanŋ nen koban kapiyet belak sesepmanŋ Kawawanŋanŋ zikat same ekti keŋ oloŋen penanŋ nânge.”

⁵⁷ Zeme Zuda am ekŋenanŋ zewien, “Geŋ ewe anemba nup kandi 50 bembepinŋ bukapiyanŋ Abalaam zigoset ekbanan?”

⁵⁸ Zeme Zisasiyan pigok zeye, “Neŋ penanŋ pigok zema nâit, neŋ Abalaam ewe sokbembepinŋ tapme mambananŋ ewe mamamkwalap.”

⁵⁹ Kegok zeme ekŋenanŋ ɲenŋin zime nanzanŋ timti kusât mme egaŋ buzak am keŋan keŋanŋset sesewat mka temanŋ pemti zupman toweti mege.

9

Zisasiyan an ɲen zikatnanŋ beŋanŋ mamkenŋ sokbembenanŋ weyanŋpeye

¹ Zisasiyan kunzunŋ toti nembanane ndatime nsakwep selen tapmetneti selen ke an ɲen zikatnanŋ beŋanŋ mamkenŋ keboŋ sokbembenanŋ aikbenn. ² Aikti nin Zisas pigok yanŋkwesiwenn, “An

zikat indanda, an kapi kwiyele yomgat zikatnan beŋaŋ kapi mamkeŋ sokbeye mamaŋ bipmaŋ egetgalen yomgat ma namba kapi iŋaŋgalen yomgapmti kapiŋok sokbeye?”

³ Zemann Zisasiyaŋ pigok dinndoye, “Wa ke mamaŋ bipmaŋgalen yomgat ma iŋaŋgalen yomgapmti keŋok ku sokbeye. Kawawaŋgalen winde ke ekmagen sokbemkawaŋ bembeyet ek keboŋ sokbeye. ⁴ Nin an zemneme koban egalen mulup ewe kasup tapme kapiyet tapm-mambanup. Yaŋ kan ŋeniyet msat tambuwe beme ilak mulup mimiyet setnaŋ yek bewe. Zet kapiyet yaŋaŋ pigok zemâtâpma nâit: Nin ewe alik mamti kan kapiyet An zemneme toban egalen mulup mbanup. Maneti gakiwanup beme egalen mulup ŋen ku mimiyelen. ⁵ Neŋ msatgalen busatnaŋgapmti neŋ msalen kapi mamamti am mambusatnaŋ bemindeyap keŋok mti am ŋoktikŋin mkawaŋ bema ekŋenaŋ Kawawaŋgat yaŋaŋ manâmâtâlîp.”

⁶ Keŋok zemti zawagaŋ msat wasekpeṃti lelimâpme bakŋaŋ beme mkwati zikat sâkŋanen witiŋiwaŋ zulutpeṃti pigok zempaye, ⁷ “Geŋ meti Siloam lemuŋan ke zimosedan witiŋip kapi zulupmane kwawesem.” (Siloam zet keyet yaŋaŋ Zempeṃe mege). Âpme an piwan meti zimoseṃnaŋ tuyen zuluti zikatnaŋ dolakŋaŋ beme mkaŋaŋ gilik zemti kopme ⁸ am notnane ma am notnaŋ mânep milawatgat mawekumindame ektemien ekŋenaŋ ekti ilinak dopmaŋ yaŋkwesim yaŋkwesim mti zewien, “An kapi selen totati nin mânep milawatgat mawekumndain wan an

kapi?”

⁹ Âpme am notnañ ekñenañ zewien, “An ikñañ kapimak,” zeme notnañ, “Yegat,” zemti,

“An kapimak ñenmak egat sepemit kwepgat.”

Kegok zeme an ikñañ keyañ pigok zeye, “Nenen mânep milawatgat mawekumindayap kemak.”

¹⁰ Zeme pigok yañkwesiwien, “Geñ zigok mti zikadi ekdak?”

¹¹ Yañkwesime pigok diindoye, “An ñen kwitnañ Zisas an keyañ zawakñañmak msatmak lumañti zikatn sâkñañ gwaen kaput nemti pigok dinop, ‘Geñ Siloam tu lemuñan meti witiлип zulupmane melak’ zemnep. Âpme neñ meti zikatn sâkñañ witiлип kaputnep ke zulupma mepme zikatn pemañ beme ega.”

¹² Kegok zeme pigok yañkwesiwien, “An ke deset tazin ke geñ nânik?”

Yañkwesime zeye, “An ke pe deset tazin ke neñ ku nâyap.”

¹³ Âpme am ekñenañ an zikatnañ ege ke Palisimagen wati mebien. ¹⁴ Zisasiyañ an zikatnañ zawakñañmak msatmak lumañti zikatnañ weyañpeye ke Sabat tagoñgo kanen mge keyepmti wati mebien. ¹⁵ Mepme Palisi an ekñenañ ewe pigok yañkwesiwien, “Geñ zikadi pe zigok mti ekdak?”

Yañkwesime pigok diindoye, “Neñ msalañ zikatnañ zulutneme met tuyen zuluti zikatn ega.”

¹⁶ Zeme Palisi ekñenmagangatnañ an notnañ pigok zewien, “An zikadi weyañpeye ek Kawawañgalen mulup an yek. Keyepmti nin

Sabat tagonŋo kanen ke tapmann egan tagonŋo sutnan penaŋ mulup mip.”

Zeme notnaŋaŋ pigok zewien, “Ek a yomton mamanan ze egan mulup keboŋ ke zigok mnak?” Kegok zemti ilinak zet mmot mtot mbien.

¹⁷ Mti an zikatnaŋ beŋaŋ weyaŋpeye ek sek tuk ewe pigok yaŋkwesiwien, “An zikadi weyaŋgep an keyet geŋ zigok nâmpenik?”

Yaŋkwesime egan pigok zeye, “An ke nen nâmpema golaŋ zenze an ŋen bein.”

¹⁸ Âpme Zuda amobotnaŋ ekŋenaŋ an kapi pe zikatnaŋ beŋaŋ kapuk sokbeye. Zemti keŋ zut mbienan yek beme mamaŋ bipman idazemtetime kopmalu pigok idayaŋkwesiwien, ¹⁹ “Nemuŋit kapi ilak penaŋ zikatnaŋ beŋaŋ sokbeye? Ek zigok mti zikatnaŋ egap ke it bugan nâlup?”

²⁰ Idayaŋkwesime mambipmanelan pigok zewun, “Ek nigat nemunit penaŋ okakŋanak zikatnaŋ beŋaŋ sokbeye e nit ŋep nâlup. ²¹ Yaŋgut naman zigok mti zikatnaŋ egap ma an kwiyaŋ zikatnaŋ weyaŋpep ke nit ku nâlup. Ek ilak an temaŋ kwitnaŋ kwitnaŋ iŋaŋ nâmâtâtâtnaŋmak keyet iŋaŋ weyaŋ yaŋkwesime diindome nâit!” ²²⁻²³ Zuda amobotnaŋ ekŋenaŋ zet kapigok zemkatik bewien. An ŋenaŋ Zisasiyet Kilais zewe beme ek mâpman paset zupman belakŋan mebe zewien keyepmti mamaŋ bipman egelan Zuda amobotnaŋ ekŋengat kiŋgati zet pigok zewun, “Ek ilak semem delaŋ zenzenaŋgat iŋaŋ yaŋkwesime yaŋaŋaŋ diindome nâit!”

²⁴ Zemalu ekñenaj an zikatnaj bekanaj weyanpeye ke ewe zeme kopme pigok dunduwien, “Geñ Kawawangat zikatnan zapadi penaj penajak zemane nâne. Nin an weyanpep keyet yanaj nânup an ke an yomtonj.”

²⁵ Zeme an keyaj pigok diindoye, “An ke an yomtonj ma yek ke neñ yanaj ku nâmâtâlap. Yanjut neñ ewenaj zikatn beñaj mamtemanaj eñaj mme zikatn ekman e penaj nâmtalap.”

²⁶ Zeme ewe pigok yankwesiwien, “Pe sepem zigok penaj mti zikadi mme ekmanan?”

²⁷ Yankwesime pigok diindoye, “Neñ zet elak diindoma nâyo e ewe ku nâmâtâlo. Eneyet zet ewe ikñaj keyegak diindoma nânâyet tatnayankwesip? In egat kandanaj meti egat nembanane bembeyet nâmti tatnayankwesip?”

²⁸ Zeme kwelatnaj kumti zewien, “Egat nemunaj elak geñ kapimak ningut Mosesiyet nembanane. ²⁹ Moses ek Kawawanaj zet dunduye e nin nâmtatnup. Âpme an ke deeset sokbemti mulupmaj tapm kozin ke nin ku nâmpenup.”

³⁰ Zeme an keyaj zet pigok gilik zemindaye, “In an zikatn weyanpep egat sokbembenangaj kanda zenze mulup mme neñ nâmtemtem penaj mimindeyap. ³¹ Kawawanaj am yomtonj ekñengalen dundundunjin ku manâin ke nin nânup. Eñaj am kwizet buñamanj mamopeip ekñen etaj manâmindein. Eñaj ikñangalen nânâñaj ke amñaj mimiyet nâmbiliwege. ³² Nin msat kululun sokbembenangatnan alak pi tatnup pi an ñenaj am zikatnaj beñaj ñen weyanpepenaj keyet zapatnaj ñen ku

manânup yek penañ. ³³ Keyepmti an ke Kawawañmagengatnañ ku kodak ze mulup kegok ke igak zigoset mnak?”

³⁴ Zeme pigok dunduwien, “An bekanañ yomdi-mak mamkwabananañ ewe mamanik geñ buk-abonañ nin kapi set zikat ndasât tazenik?” Kegok zemti sesewat mkaengatnan zempeme zupman toti mege.

³⁵ Zempeme paset zupman mege zapat ke amnañ ilinak zenâ zenâ tapmmepme Zisasiyañ wak kambu nânge. Keyepmti an ke selen aikti pigok yañkwesiye, “Geñ Angat Nemunañ egat nâmkijpenik ma yek?”

³⁶ Âpme an keyañ zeye, “Amobotnañ, geñ zenik ke an kwi ze zikat namane ekti ñep nâmkijpempewi!”

³⁷ Zeme Zisasiyañ pigok dunduye, “Neñ zet tadingoma tatniknik an elak neñ kapimak.”

³⁸ Zeme an keyañ zeye, “Amobotnañ, neñ penañ nâmkijpemgeyap.” Kegok zemti tot pedondom samti sesewatpeye.

³⁹ Âpme Zisasiyañ pigok zeye, “Neñ am yañañin mimsokbembeyet msalen toban keyepmti am notnañ zikalin beñañ ekñañ zikalin dolakñañ ekbep. Âpme am zikalin ekti mamaip ekñañ zikalin naman beñañ bewe.”

⁴⁰ Kegok zeme Palisi am ekmak ilinsakwep tabien ekñañ zet ke nâmti pigok zewien, “Zeme nin mee kogok zikatn beñañ nâmndenik?”

⁴¹ Zeme Zisasiyañ pigok diindoye, “In an zikalin beñañ mamambiek ze in yominpiñ mamambiek.

In ilinangat, ‘Nin an zikatn benan yek,’ manzeip keyepmti in yominmak mamaip.”

10

Zisas ek sipsip damuŋ dolakŋaŋ

¹ Zisasiyaŋ zet ŋen pigok zeye, “Neŋ zet penan sukwep pigok diindoma nâit, An ŋenan sip-sip ekŋengalen kimbaleŋ towesâgât egaŋ set penan tapme kimbat dukŋaŋ belakŋaset aŋgosomti towebe beme an ke kambutoŋ ma an sage kuku toŋaŋ kegok zewanup. ² An ŋenan set tokwak-waleset meti sipsip ekŋenmagen mebe beme an ke sipsip toŋaŋ penanaŋ moweziŋ nâmpewanup. ³ Mopme setokwakwat damuŋ egaŋ ek sipsip toŋaŋ penan e ekmâtâti kwalet peme moti sip-sip kwilinan kwilinan indakumtetime toŋinangat bim ŋandaŋaŋ nâmti ekmagen kopme indatimti zupman baen matoweziŋ. ⁴ Ikŋaŋgat zapat ke indatimti zupman toti mepme ekŋenaŋ bim ŋandaŋaŋ nâmti ekmâti mamâmelip. ⁵ Ekŋenaŋ an bimŋandaŋin mamanamaŋ ekŋen ku maindamâti melip. Ekŋenaŋ bimŋandaŋin sepemaŋ igak ke nâmti makingakunzuŋip.”

⁶ Zisasiyaŋ am ningat nâmti bemzenze zet sip-sip palen bemti zeme am ekŋenaŋ pe bemzenze zet kapi yaŋaŋ kwilekiyet zein ke ku nâmatâbien.

⁷ Keyepmti Zisasiyaŋ bemzenze zet kapiyet yaŋaŋ kapigok zeye, “Neŋ penan sukwep penan diindoma nâit, sipsip ekŋengalen setokwakwat e neŋ. ⁸ Neŋ ewe sokbembepiŋ tapma am tetimaemae ŋenaŋ sokbemti inmagen kobien ekŋen an kambu titinok mamti zet dâsuki,

‘Nen Kawawaŋan an zempeme kosât zetik mge nen kapi,’ zemti mambien keyepmti nâlen am ekŋenan zelin ku mâbien. ⁹ Âpme nen amgalen sekekek keyepmti am ŋenan nen nâmkijpemneinen ek angalan pewap. Nen ekŋen indikdamuŋ mimindema mamambep. ¹⁰ Âpme an kambu titi ekŋenan belak buzakset moti kwitnan kwitnan kumsagat mti sipsip mee kilen indomkumti notnan buzak kambu indatimti mesâgât makolip. Yangut nen sipsip ekŋen indadamuŋ dolakŋan mimindema ekŋenan kakanemuŋ mamti mamobep.

¹¹ Âpme nen sipsip toŋan penan keyepmti ekŋenmagen kwileki ŋen sokbeme ekŋengapmti ŋep gakiwap. ¹² Mme sipsip damuŋ belak tosayelak etan nâmti mamin ek toŋan penan yek keyepmti mulup wisat palen tapneti ekme tam zupman ŋenan sipsip indim nsât kwindiŋ kwapme ekti sipsipgat yayan mimipiŋ ketalat indemti yayanangat kunzuŋme tam zupmanan kwati indimâpme makalan mekolip. ¹³ Ek sipsip damuŋ penan yek keyepmti egan sipsip ekŋengat yayan mimipiŋ kiŋgati makunzuŋzin. ¹⁴⁻¹⁵ Nen sipsip ekŋengat toŋin penan mamayap keyepmti Bienan nâgât mama miminnangat yaŋan dolakŋan nâmnein mme nen kegogak egat nâmatâpeyap. Sepem kegogak nenmak sipsip manŋanne nin dopman nâm dopman nâm mti manŋa kwep mamanuŋ. Keyepmti kwileki ŋen sipsipmagen sokbeme nen sipsip ekŋengapmti maman ŋep ketalasiwak. ¹⁶ Âpme nen sipsip manŋanne notnan ewe maip wa ekŋen kimbat

kapiyet kenangatnaŋ yek. Neŋ ekŋen ke eyo indakakalima kot neŋmak kapi mamti bimŋanden nâme delaŋ zeme sipsiwaŋ maŋga kwep tapme nenn kwep indadamuŋ mbap.

¹⁷ Neŋ maman ketalasimti gakiwap ya naman gilik zem wati maman ke naman tiwap keyepmti Bien Kawawaŋaŋ nâgât nâmneme dolakŋaŋ penan mambein. ¹⁸ An ŋenaŋ nânâŋak neŋ kileŋ nome ku gakiwap neŋ nen nâmâtâtati mamann ketalasiwap. Ya naman gilik zemti wawagalen winde ke tatnain. Bipmnaŋ neŋ kekok mimiyet nâmnenge.”

¹⁹ Zisasiyaŋ zet kekok zeme nâmti Zuda am ekŋenaŋ nâme ŋep ku beme ilinaŋgat bet wanok zet mmot mtot mbien. ²⁰ Mti am sambe penanaŋ pigok zewien, “An kapi we bekananaŋ keŋaŋ mme yuŋgume zet kileŋ kileŋ tapmme in eneyet momtati zetnaŋ taweyaŋ nâip?”

²¹ Âpme naman am notnaŋaŋ pigok zewien, “An ŋen we bekananaŋ keŋaŋ tapme zet dolak dolakŋaŋ kabon kapi ŋep ku zenak. Ma an zikatnaŋ beŋaŋ mee ŋep ku weyaŋpenak.”

Zuda am notnaŋaŋ Zisas ek Kilais ku nâmkinpewien

²² Zelusalem sesewat mka kambuk mme belakŋaŋ bembenaŋaŋ Omzuluti mme kambuk bembenaŋgalen Kendo ke nup kan kataŋ matakwa-temien. Yaŋ nup kan kataŋ Kendo ke mawalam keŋaŋ masokbein. ²³⁻²⁴ Âpme Zisasiyaŋ sesewat mka temaŋ keyet keŋaŋ ŋen Solomon zeme keyet setokwakwalen ke mebe kokot tapmme Zuda am ekŋenaŋ tokwat bembuluŋ tati pigok

yaŋkwesiwien, “Geŋ eneyet yaŋaŋdi sosok penan zemkawan bembepiŋ mmane nin gâgât weyaŋ ku manâmâtâtnup? Geŋ penan Kilais, an Kawawaŋaŋ ombemgengeŋaŋ beme yaŋaŋdi weyaŋ zemâtâtndamane nâne!”

²⁵ Âpme Zisasiyaŋ pigok diindoye, “Neŋ nananġat yaŋaŋ diindoma in ku manâmkinpemneip. Neŋ Bipmnanġalen windeyet mulup dolak dolakŋaŋ mamiyap keyaŋ nananġat yaŋaŋ Kawawaŋaŋ iġŋaŋ zemneme toban ke mammsokbemnain. ²⁶ Âpme in nâlen sipsip maŋganne penan bemti ku mamaip keyepmti zetn ku manâmkinpeip. ²⁷ Âpme am nâlen sipsip maŋga bemti mamaip ekŋenaŋ bimŋanden nâmti neŋ manamâpmaip. ²⁸ Keyepmti neŋ mama kanzizit indama walelepiŋ kwesiŋ kwesiŋ mameti mamambep. Ekŋen ke nâlen belengatnan am ŋenaŋ ku indamenzemtiti mebe yek penan. ²⁹ Am ekŋen ke Bipmnan iġŋaŋ nâlen belen mamayet naŋgeyepmti mame iġŋaŋ maindadamuŋ min. Ek windenaŋ igagen penan keyepmti am ekŋen ke an ŋenaŋ nâlen belengatnan ku indamenzem tiwe. ³⁰ Bienmak nit keŋ kwep penan bemti mulup mamilup.”

³¹ Kegok zeme Zuda am ekŋenaŋ nâme ŋep ku beme nanzaŋ ambepelet timti kusât mbien. ³² Mme Zisasiyaŋ pigok diindoye, “Neŋ mulup dolak dolakŋaŋ sambe penan Biengalen windeen mamima egip. Âpme in mulup mamiyap ke mulup ziboŋ ke ekme bekaŋaŋ beme nanzaŋ timti nosât tapmip?”

³³ Zeme Zuda am ekŋenaŋ zewien, “Wa geŋ

mulup dolakñañ maminik keyet mti gosât ku tap-minup. Giti zet mobotnañ mti gen am nin nem-boñak yangut, ‘Neñ Kawawañ,’ tazenik keyepmti gosât pi tapmnup!”

³⁴⁻³⁶ Kegok zeme Zisasiyañ pigok diindoye, “Kawawañgalen Zet Itnañanen pigok zenzenañ tazin, Kawawañ an zemdelañ zenze an mamkwabien ekñengat pigok zeye, ‘In mulup kegok mamip enenogat in Kawawañ nemboñ.’ Kawawañgalen zet sambе ke tapmezin ke anañ nin ku omenzanpepeyelen yek penañ. Âpme neñ Kawawañañ ikñañ mulup dolakñañ mimiyet zemdelañ zemneme msalen kapi toban keyepmti neñ Kawawañgat Nemunañ zema in eneyet egañ set ku mimiñ mti Kawawañ mtopemti sek mmobot zet tazein manzeip. ³⁷ In mulup mamiyap kapi ekme Bipmnañgalen katan ku mambein beme zetn kapi bamkumpeme ñep bewe. ³⁸ Âk ekme mulupm Kawawañañ mnak keyet katan mamiyap wa zet manzeyap etañ yek. Mulupm mamima egip keeset eyo ekti Bienmak nit keñ kwep bemti mulup mamilup e ndik mââtâbep.”

³⁹ Kegok diindome ekñenañ ñeñin penañ zime wati mka katikñañ pene zeminepeme yumbemindemti toti mege.

⁴⁰ Meti Zodañ tu nembet daen Zânañ am tu itnañañ manzulutindemtanan ke meti mamtan.

⁴¹ Ke meti mame am sambeyañ ekmagen koti pigok zewien, “Zânañ menok ñen ku mme ekbenn. Âpme Zânañ an ikñañ kapiyet nâmti zet sambе zemâge ke an kapimagen penañañmak

etan tasokbemâzin.” ⁴² Zemti am sambeyan egat nâmkinpembâbien.

11

Lasalus gakime bewien

¹ Betani mka msalen ke an n'en mamtan kwitnan Lasalus ek zawat teman penan mti tapme ipmanet Maliamak Mata egelan ke tati mamomtatemun. ² Lasalusiyet ipman Malia kapiyan maneti bam Amobotnan Zisas gakikinangalen kan bududuk beme wet kelaknan sesiknan dolaknan penan piyan ek setnanen zulutpempti noksinnan kaput pewe. ³ Lasalusiyet ipmanet zut keyan iwitdangat yayan mti Zisasmagen zet pigok bemalu mege: “Amobotnan, nodi penan Lasalus piwan zawat teman tapm weingat kot eksenik.”

⁴ Âpme Zisasiyan zet ke nâmti pigok zeye, “Zawat keyet penanan wa gakiki sokbembeyet yek. Kawawangat Nemunan egalen kwizet bunaman msalen pien palaknan beme Kawawangat kwizet bunaman mwat onzempepeyet kegok sokbein.”

⁵ Zisasiyan Lasalus ipmanet Matamak Malia eknen kemak notn notn dolaknan mti mamtemien. ⁶ Âpme Zisasiyan zapat ke nâmpempti mka keyegak kasup zut pi ewe tage. ⁷ Yan msame wati Zisasiyan nembanane ningat pigok zeye, “Kame naman Zudia mkaenak gilik zemti metne.”

⁸ Zeme nin pigok dunduwenn, “An zikat indanda, geŋ alagati kanda manepemane nanzanŋ gosâgât mme kunzunŋi kotn yanaman keyegak gilik zemti mesâgât tazenik?”

⁹ Yanŋkwesimann pigok dinndoye, “Pi ewe tambunanak mulup mimiyelen kan ewe teepman tazin. An ŋen kasupgat zikatnanŋ ekmâtâti mepme kwileki ŋenanŋ sekŋanŋ ŋen ku mawalezin.

¹⁰ An ŋenanŋ tambuyet mamezin beme egaŋ busatanŋ ku tazingapmti tambusosokgat pumpem pumpem olat metiŋgut tep palen ma nanzan palen mee sekŋanŋ mawalezin.”

¹¹ Kegok zemti zet ŋen ewe pigok tusumti ningat zeye, “Notn Lasalus ek zawat mti muluk tawein yaŋ neŋ meti butema wasem.”

¹² Zeme nembanane nin pigok zewenn, “Amobotnanŋ, egaŋ zawat mti muluk tawen beme iŋanŋ ŋep alik bemti wabe.”

¹³ Zisasiyan Lasalus penanŋ gakiye ke met mme wawagat nâmti zeye. Âpme nempa nin nâmann zawat mti muluk tawenanŋ met buteme wasem kok nâmti zewenn. ¹⁴ Âpme Zisasiyan naman pigok weyaŋ zemkawaŋ bemndaye, “Lasalus ek tambumbu tuk wenŋe yaŋ neŋ meti butema ewe wasem. ¹⁵ Neŋ zawat zapatnanŋ nâmban yangut kapiyegak mamann gakiyan. Âpme neŋ ekmagen mulup mma in ekti nâmkinpepe kaliŋanŋ aikbep keyepmti nâma dolakŋanŋ penanŋ bein. Ele kame nin ilak ek eksât metne.”

¹⁶ Âpme ninmagangatnanŋ nempa ŋen kwitnanŋ Tomas kwitnanŋ ŋen Glik zeleset Didimas makumtemien ke ningalen zeleset nempa pepet

kok zewanek. Egan nin pigok dinndoye, “Kame nin sambe bepi nsakwep ekmak mepmann ndome gakimâbanup.”

Zisas ek gakikiengatnan wawat ma mama keyet tonan

¹⁷ Zisasmak nin ewe kainde maman Lasalus met beme kasup zulak zulak pi sumen weme egan bam mege. Keyepmti kwapatan zemann am eknenan zewien, “Lasalus ilak tugan bewen.”

¹⁸ Betani mka ke benan penan yek; Zelusalem mka teman keyet soknanik. (Mail zut mee kegok mamekotemien.) ¹⁹ Keyepmti Zuda am sambe eknenan Matamak Malia iwit gakime ambembesi mimidesât mepmâbien.

²⁰ Âpme Matayan Zisasmak nin kotnup zeme nâmti wenenan ke tapme egan windembem toti selen meti ndaige. ²¹ Kegok mti Zisasiyet pigok dunduye, “Amobotnan, gen kapi mambek ze ipm ku gakinak. ²² Yangut alak pigogat gen kwileki neniyet nâmti bipdi dundum samane egan keyet penanan nep mamgain.”

²³ Zeme Zisasiyan pigok dunduye, “Gen yayan ku mi, ipdi Lasalus ek nep gilik zemti wasem.”

²⁴ Zeme nâmti Matayan pigok zeye, “Maneti bam kan temanen gilik zemti wabe e nep nâyap.”

²⁵ Zeme Zisasiyan pigok zeye, “Gakikiengatnan wawat ma mama keyet noteknan nen keyepmti am nenan nen nâmkinpemnewe beme gakiwe yangut nen nep mamanan ewe gilik zemsawap. ²⁶ Ma am nen ewe seknan melesin mamti nen nâmkinpemnewe beme egan gakikipin

mamambe. Geŋ neŋ zet zeyap kapi ɲep nâmkɲipenik?”

²⁷ Zeme Matayan zeye, “Amobotnaŋ, geŋ Kilais, Kawawangat Nemunŋ, msalen kapi totogat buŋam zapaŋnaŋ zenzenŋ elak geŋ kapi e penan nâmkɲipemgeyap.”

²⁸ Zet kegok zemti met wenenŋ Maliayet zeme kopme igak buzak pigok dunduye, “An zikat indanda ilak kotati gâgât tazein.” ²⁹ Zeme Maliayan nânâŋak wati sakwep Zisasmak nin tabenen mege. ³⁰ Nin mka set biman baen tati Mata zempeme kwapme ewe keyegak to-tapmambenn. ³¹ Zeme nâmti Maliayan mka keŋangatnaŋ sakwep wawatnaŋ toti mepme Zuda am ekmak ambembesien tapmambien ekŋenaŋ wa sumen daen susât mezin mene zemti mâti kwatopmâbien.

³² Âpme Maliayan windembemti mka set biman baen toti ndikme tapmmann Zisas pedondom samti pigok zeye, “Amobotnaŋ, geŋ kapi tabek ze ipm ɲep ku gakinak.”

³³ Zemti sume Zuda am ek mâti mebien ekŋenaŋ ek mukulem mti ambembesi teman mbien. Tapmme Zisasiyan indikti keŋaŋ bekanan penan beme siyan biman soye. ³⁴ Some pigok indayanŋkweŋsiye, “In sekŋaŋ pe denen bemien?”

Indayanŋkwesime ekŋenaŋ zewien, “Amobotnaŋ, kopmane meti suman zikat gaman ekbak.”

³⁵ Met zikat same ekti Zisasiyan siap ulu alep timti suye.

³⁶ Sume Zuda am ekñenaj ekti zewien, “An pi an kapimak notn notn penaj mti mamalup keyepmti egat tasuin egip.”

³⁷ Âpme notnaj ekñenaj zewien, “An kapi an ñen zikatnaj beñaj ñen weyanpeye keyet zap-atnaj mekopme nâmbenn. Kogogapm an kapi sakwep kodak ze Lasalus kapi ñep weyanpeme alik tadak.”

³⁸ Âpme Zisasiyan kenaj ewe bekanaj penaj beme sum sokñan penaj mebenn. Lasalus gakime sekñaj mti met miña kenaj wepemti nanzaj teman ñen wilili peme met einzunaj bekek tage. ³⁹ Keyet mti Zisasiyan sumpemti pigok zeye, “In nanzaj teman kapi kwanzepeme kainjan melak.”

Zeme an gakiye keyet mâñanaj pigok zeye, “Amobotnaj, tambumbu zulak zulak ilak sumen tapme tozin yalak pi sek sesikñaj tapein pi zigogat nanzaj kwanzempepeyet tazenik.”

⁴⁰ Zeme Zisasiyan pigok dunduye, “Neñ zet daen ñingoya e nâmane betetnaj bein. Geñ belak nâmkinpem nemane neñ Kawawangalen winde keyet penanaj mma sokbeme eksenik.”

⁴¹⁻⁴² Âpme am notnaj ekñenaj nanzaj teman bepiwan kwanzepeme mepme Zisasiyan zikatnaj kululunjen gwaen ekme mopme pigok dunduye, “Bien, geñ dundundun kan katan nâmti manamukulem mnik keyepmti wisikñ ñingoyap. Neñ am manje sambe talip ekñen kapiyan neñ giti penaj zemnemanen koban keyet yanaj ekmâtâtâtgat mulup msât tati ñingoyap.” ⁴³ Kegok zemti kwizet teman pigok

kuye, “Lasalus, gen pien kwatot!” ⁴⁴ Zeme am gakikiŋaŋ piwan banisiyaŋ setnaŋ betnaŋ kwasim pepeŋaŋ ma ŋokŋaŋ sangum meselem zempewien melesin kwatopme Zisasiyaŋ zeye, “In banisiyaŋ betetak temaŋ mpepeŋaŋ e kwalet pemti peme melak.” Zeme kwalet pewien.

Zuda an ŋeŋaŋ ekŋeŋaŋ Zisas kume gakikiyet zemdelan zempewien

⁴⁵ Âpme Zuda am sambe Maliayet ipmangāt siyet kobien ekŋenmagengātnaŋ am sambe notnaŋaŋ Zisasiyaŋ muluwaŋ mamananam mme ekti nâmkinpempewien. ⁴⁶ Âpme notnaŋaŋ belak Palisi ekŋenmagen meti Zisasiyaŋ Lasalus gakikiengātnaŋ mme watage keyet zet zapatnaŋ mimindawien. ⁴⁷ Minindame nâmti sâpe sâpe bumbu an ŋeŋaŋ temaŋ ma Palisi egat kandaŋaŋ mambien ekŋeŋaŋ an ŋeŋaŋ bembe notnaŋ indazemtetime kot ondekme pigok diindowien, “An kapi muluwaŋ mamananam omba penan am sutnaŋ tapmmezinaŋ kapi zigok msawanup?” ⁴⁸ Nin nâmti belak nâmpemti mamann am sambe bepī ekmagen met tūsumâpme delan zeme Loma amobotnaŋ manndadamun min egaŋ ekme ŋep ku beme ningalen sesewat mka temaŋ pi kumasek yaloŋti aminne eyo indom yalom bepī!”

⁴⁹ Ekŋengāt tūŋguwinaŋgātnaŋ an ŋen kwitnaŋ Kaipas ek kan keyet sâpe sâpe bumbu sambe ekŋengāt ŋeŋaŋin mamtan. An keyaŋ pigok diindoye, “In sambe bekapi keŋinpin penan!” ⁵⁰ Nin am sambe bekapi waleletgāt zapaŋ etan bemâpmann ŋep ku bewe keyepmti an kwewaŋ ningāt dopm gakimti am sambe pi ma nin mee

eyo ndamukulem mbe.” ⁵¹ Zet ke belak iknangāt kenangalak ku zeye. Kawawangān zet ke kenanen beme zemkawang beye. Nup kan keyet egan sâpe sâpe bumbu sambē ekngat njanin mamtan keyepmti kwitnan kwitnan bam sokbewe keyet zetnan zemkawang beye. Zisas ek penan Zuda am nin yomengatnan gilik zemti ndatitiyet gakikiyet zenzenan. ⁵² Wa ke Zuda am eknen etan indamukulem mimiyet etan ku gakiwe. Egan gakimti am Kawawangalen mange msat katan mammanup nin bepi ondekndeme manga kwep bemti mammanup.

⁵³ Âpme Zuda an njan eknenan kan keyet yanbemti Zisas kume gakikiyet zetnan mbien.

⁵⁴ Âpme Zisas Zuda amobotnan eknenan mineti gakikinān teman ewe tapme sutnateman kume gakinakmagangapmti Zuda msalen sosok penan ku mange egan nin msat tungupman keyet ganzenan mka nen kwitnan Epalaim zeme ke met mamtemenn.

⁵⁵ Zuda am ekngalen Angalalan Kendonin ke soknan beme mka isisiknan am sambē eknenan Zelusalem mka teman yominangāt nâmti Kawawangāt sâpe sâpe busâgât ewenānak njan mepmâbien. ⁵⁶ Meti Zuda am eknenan sesewat mka temanen motati Zisas zimosetnan timati ilinak met zenâm kot zenâm mti zewien, “An kapi pe Angalalan Kendoyet kapi kopme eksenup manze weyan zeme nâne.” ⁵⁷ Zeme Palisi an ma sâpe sâpe bumbu njan eknenan zet pigok am zemkabem indawien, “Zisas kopme ekti ningat kot sakwep zemsokbemndaseip. Mme nin an ke wati met mka katiknan pesenup.”

12

Lasalusiyet wenenan Malia egan Zisas wet sesik dolaknanan zulutpeye

¹ Angalalan Kendo tatagalen kasup 6 ewe tapme Zisasmak nin Betani mkaen mebenn. Nin mka ke Lasalus gakikiengatnan mme wage keyet motabenn. ² Zisasmak nin mepmann ekti notnane eknenan tu meu weyan bume mopme ambepoleti met Matayelen mkaen tapme am zeme moti Zisasmak nin Lasalusmak totapmann Matayan tu meu timti kalop bem ndame nimbenn. ³ Ke tati tatnimann Maliayan wet sesiknan dolaknan penan tosanen mobotnan penan makwitimtemien ke nuknanan teman pi mkoti keyan Zisasiyet setnan mulapme topme zulutpenti njoksinanan kapupeye. Âpme mka kenan tapmambenn bee wet sesik dolaknan bepian pimpemti tage. ⁴ Âpme nembanane ningat tungupmnangatan Zudas ek Iskaliot mkaengatan nempa keyan maneti Zisas bam zemkuwe. ⁵ Egan nâmti pigok zeye, “Wet kelaknan sesiknan dolaknan penan kabon kapi belak mti met bermann amnan 300 Kina ndame mti am bekopsat eknen indawenek ze njep benak!” ⁶ Egan wa mânep ke timti am bekopsat penan indasât nâmti ku zeye. Egan ningalen mânep ele nemun ke mmamti mânep ndame mwatpenti mânep butnan buzak kambu matim makumkwitim nimtan keyepmti ndame wanok kok mbak nâmti zeye.

⁷ Âpme Zisasiyan pigok zeye, “In imbi kapiyet zet sambe zenzepin. Egan wet sesiknan dolaknan ke nen sekj kapi zulutneinen maneti gakima

nabembeyet nâmti kwitimti beme matazin yan alak kapi zulutnein. ⁸ Am bekopsat sambe ekñen bepi inmak msalen kapi kan teepman ewe mamabep mme neñ inmak kan teepman ewe ku mambap.”

⁹ Âpme Zisasiyan Betani mkaen ke met Lasalusmak mame Zuda am ekñenap zapatnan nâmti Zisasmak Lasalus an Zisasiyan gakikiengatan mme wage an ke eyo ilisakwep idiksâgât kobien. ¹⁰⁻¹¹ Zuda am ekñenap Lasalusmageset sâpe sâpe bumbu an ekñen bamkum indemti Zisas mâti mepmâbien. Keyepmti sâpe sâpe bumbu an ñenap ekñenap Zisasmak Lasalus ilisakwep idome gakikiyet zetnan zewien.

Zisas Zelusalem mka teman mowepme kwizet buñaman mwabien

(Matiyu 21:1-11; Mak 11:1-11; Luk 19:28-40)

¹² Msat msame am sambe penap ekñenap Angalalan Kendo tasâgât Zelusalem mka kopmâbien ekñenap zet pigok nâmbien: Zisas ewe selen baen takozin zeme nâmti ¹³ ekñenap niwet sinap mee pi mutum timti Zisasmak nin selen baen ndaiksâgât mepmâbien. Met ndaikti kwizet buñaman mwati kwizet pigok kumbien,

“An kapi Amobotnap Kawawanap ikñap zempeme kozingat Kawawangat kwizet buñaman mwati sesewatpenel Kawawanap ikñap Islael am ningalen Amobotnap kapi ken sewakñap mpen.”
(Sam 118:25)

¹⁴ Keyet Kawawaŋgalen Zet Itnaŋanen kapigok zenzenaŋ keyet katan Zisasiyaŋ doŋki nembaŋaŋ ŋen aikti keyet dukŋan totati moge.

¹⁵ “Am Zaion mka temaŋ talip in ku kingalit. Amobotnaŋin ilak kozin. Egaŋ doŋki nembaŋaŋ ŋeniyet dukŋan mot totati ingalen kozin.” *(Zekaraia 9:9)*

¹⁶ Nembaŋane nin kwitnaŋ kwitnaŋ sokbeye ke ekbennaŋgut yaŋaŋ ku nâmâtâbenn. Yaŋ bam Zisasiyaŋ gakimti kululuŋen mundumaŋ saŋga songaŋaŋmak keyet keŋan ewe mowepme nin Kawawaŋgalen Zet Itnaŋanen zet keyet yaŋaŋ eknâmâtâti pigok otnâmbenn, “O, an pi sesewatpewenn ke meluwaŋ pi mimiŋaŋ keyet katan penaŋ msawenn.”

¹⁷ Zisasiyaŋ Lasalus gakikiengatnan mme wapme am sambe tati ekbien ekŋenaŋ meti am notnaŋ zet zapat mimindame ¹⁸ am sambe penaŋ ekŋenaŋ zapat ke nâme delaŋ zeye keyepmti ekŋenaŋ selen meti Zisas aikbien. ¹⁹ Aiksâgât selen mepmâpme Palisi ekŋenaŋ indikti ilinak zenâ zenâ mti zewien, “Nin belak zet mulup etaŋ tapmmann am sambe bepi ilak ekmagen met tusume delaŋ zemâzin!”

Glik am notnaŋ ekŋenaŋ Zisas eksâgât mebien

²⁰ Zuda am Anŋalalaŋ Kendoyet Zelusalem mka teman Kawawaŋ sesewatsasât mopmâbien kan keyet Glik am notnaŋaŋ kegogak Kawawaŋ sesewatsasâgât koti tapmambien. ²¹ Yaŋ an ekŋen keyaŋ Pilip Galili msat keyet mka ŋen Betsaida keyetnaŋ ekmagen meti zewien, “An notn, nin Zisas eksâgât nâmti kotnup.”

²² Zeme Piliwan met Enduluyet zeme wati il-isakwep Zisasmagen meti “Glik am notnan giksât kolip,”

²³ zemalu Zisasiyan nâmti zeye, “Kawawan Angat Nemunan kwizet bunaman mwat peme amnan eegalen teman ilak dangoin. ²⁴ Neŋ zet penan pigok zema nâit, nin sanjom alik kwewetan sumunti kasinen bemann e iknan kwep keyak matazin. Yan msalen met ondemann moti penan bilimak sambe mapein. ²⁵ Âpme an nenan msalen kapi mamti nâgât kwizet bunamnan gapmti manan ketalasiwe beme bam mama kanzizit tiwe. Âpme am nenan nâgât kwizapatn nan gat mti manan ketalat ku pewe beme bam an ke walelet aikbe. ²⁶ Am nenan nâlen sisiliŋ nemba besât nâmba beme neŋ mambawenak napmâpmeti mulupm mti mambe. Am nenan nâlen mulup mti mambe beme Bienan kwizet bunaman mwapewe.

Zisasiyan gakikin angat yan an zemkawan beye

²⁷ Pi gakikiyelen kan soknan penan kopme nâmti keŋ sindem penan bein. We, ne pe zigok msap? ‘Bien, geŋ kan bewanan kapi seabem neneyelen zesap ma zigok?’ Wa kekok yek, sindem kekok ke titiyet msalen kapi toban. ²⁸ Keyepmti Bien, geŋ nepgat nuknan beke peme nâgât palen mopme keyan gâgât kwizet bunamdi mwabe!”

Zeme kululun engatnan zet pigok sokbeye, “Geŋ mmane nâgât kwizet bunamm msalen ke palaknan beyeyan ewe mmane omba penan palaknan bem mekobe.”

²⁹ Âpme am sambe ninmak tapmambenn ekñenaj kwisak ke nâmti zewien, “Kululun kwisak kun.”

Zeme am notnanaj zewien, “Kawawangalen ensel ñenaj Zisas zet tadunduin.”

³⁰ Zeme Zisasiyan zet ke nâmti pigok zeye, “Wa zet ke nâgât mti ku zep. Ingat mti kululungatnanj zet ke sokbep. ³¹ Pi ilak msalen am Kawawangaj zelin nâmti keyet dopmanj mutumindandayelen kan bein. Keyepmti msalengalen mama mimi mgasik keyelen toñaj Sadañ ilak mkutupeme wembe. ³² Âpme neñ tep palen palak palak wema nomnemti mwatonzemnewep kan keyet msat sambe am ekñenaj zapatn ke nâmti neñmagen kot tusumti mambep.” ³³ Ke Zisasiyan gakiki zigok gakiwe keyet zetnanj zemkawanj be-mindaye.

³⁴ Zeme nâmti am tabien ekñenaj pigok dunduwien, “Nin Kawawangalen Zet Itnananen zet kapigok maeknup, Kilais ek msalen koti gakikipin kwesin kwesin mamambe. Âpme naman geñ eneyet pigok zenik, Angat Nemujanj ek tewen kumti mwatonzempewep. Geñ Angat Nemujanj ke pe an kwiyet penaj nâmti tazenik?”

³⁵ Yan kwesime Zisasiyan zet dopmanj pigok gilik zem diindoye, “Nâlen tanamm busatnanaj ingat tunguwinan kan isikñaj bugan busatnanj bemti tabe. Tapme in tanam sokñaset ke ekti mebep. Mineti in tambusosok temanaj indasumunme keyet keñan mebepmagengat ek titiwep. Geñ tambusosok kinñaj keñan mebegen set ñep

ekmâtâti ku mebek. ³⁶ Keyepmti tanamm busatnañ toñañ neñ ewe kapi yagak tapma in nâgât nâmkinpemtî nâgât nemunamban penañ bewep.” Zisasiyañ zet kegok dinndomti buzak pak zemti met enzilim mebenn.

Zuda am notnañ Zisas ku nâmkinpewien

³⁷ Zisasiyañ am zikalin palen penañ menok sepem igak igak mme ekbienangut am sambe penañ ku nâmkinpewien. ³⁸ Bee golan zenze an Aizayayañ eweñan baen zeye keyet katan amnan mbien. Egañ pigok zeye,

“Amobotnañ, am pe kwiyañ penañ ningalen zet nâmkinpewe? Ma Amobotnañ am pe kwi penañmagen menok mme windendi teman ke ekbep?” *(Aizaya 53:1)*

³⁹ Amnan Zisas ku nâmkinpewien keyet zetnañ eweñan golan zenze an Aizayayañ ikñañak zet ñen ewe pigok zeye,

⁴⁰ “Am ekñañ zet zapatn nâmti nâme belakñañ mambein keyepmti am ekñen keyañ kwitnañ kwitnañ ñen ekti yañ nâmâtâbiekmagengapmti Amobotnañ zikalin ma keñin mee pi mme bubep pemâge. Mineti ekñañ eknâmâtâti keñ gilik zenze aikme weyañindenakmagengapmti kegok mge.” *(Aizaya 6:10)*

⁴¹ Golan zenze an Aizayayañ zet zeye kapi egañ Zisasiyelen mulupmañgat windenañ bam kwabe beke ektati egat zetnañ kapi zeye.

⁴² Âpme an ñeñañ bembe notnañ ekñañ Zisas nâmkinpewien. Yañgut nâmkinpepenn sosok

zemkawan bemann Palisi ekñenaj ndiksokbemi paset zupman ndamâpme towebanupmagen zemti buzak mamtemien. ⁴³ Ma am ekñenaj zapatn nâmti mme kwizapatn tototnaj bewemagen zemti nâme nukñaj beye. Mti ekñenaj Kawawan kwizet bunaman mwatpepeyet nâme tototnaj beye.

Zisasiyelen zetnanañ bam zemndowe

⁴⁴⁻⁴⁵ Zisasiyanañ zet pigok bekap penanañ zeye, “Am ñenaj neñ nikmâtâti nâmkijpemnewe beme wa neñ etanañ yek an zemneme toban ek eyo ekmâtâti nâmkijpempewe. ⁴⁶ Neñ kululungatnan msalen kapi am mbusatnanañ bemindesâgât toban. Âpme am ñenaj neñ nâmkijpemnewe beme egañ tambusosogengatnan nâlen busatnanen kwabe. ⁴⁷ Am ñenaj zetn nâmti wisat mti bamkumpewe yanğut neñ keyet dopmanañ ku sawap. Neñ wa am yominañgat dopmanañ indandayet msalen kapi ku toban am yomengatnan gilik zemti indatitijet toban. ⁴⁸ Âpme am ñenaj neñ bam kumnemti zetnanañgat wisat mbe beme bam zet mulup temanen tabe. Zet zema wisat mamin zet kapiyanañ ikañ kan delanañ zenzenañgat zet muluwen peme tati ekbe. ⁴⁹ Wa neñ zet kapi nanañgat kenanañgalak ku manzeyap. Bien zemneme toban egañ ikañ zenzeyet zemâtâtanañge keyet katan penanañ manzemkawan beyap. ⁵⁰ Neñ zetnanañ ikañ kapiyanañ am mama kanzizit maaikindain e nâmkijpemti keyepmti egalen zet ke ikañ zemâtâtanañgenok esemten manzemkawan beyap.”

13

Zisasiyan ningat setn zulutndeye

¹ Angalalan Kendo tatagalen kasup kwep ewe tapme Zisasiyan pigok nânge, “Olak, neñ msat kapi pempti Bipmmagen mobogalen kan ilak bududuk penañ bein,” nâmti ammak nin ek nâmkinpempti ekmak oloñkati oloñen palen mamtemenn keyepmti ningat kember temañ penañ nâmndeye.

² Zisas ma nembanane nin tambume tu meu nsâti mot ondektati tatnneti pemann Saimon-gat nemuñan Zudas Iskaliot mkaengatan ek Sadañan Zisas zemkukuyet zet kelakñan mp-eye. ³ Âpme Zisasiyan pigok nânge, “Bienañ kwitnañ kwitnañ sambe pi nâgât betnnan beye. Âpme neñ ikñanmagengatan toban yanaman ewe gilik zemti naman ikñanmagennak mowebap.” ⁴ Ke nâmtati egan meu nini mundumengatan wati kâlâpman teepman sakñangatnañ bee gulupeme weme taot mti pemanen kwasimpempti ⁵ tu pelewen kasime topme mti yañbemti nembanane nin sambe setn palakñan zulutndemti taot pemanen zampeye ke mti takaput ndemepmange. ⁶ Tapmmetneti Saimon Pitamagen koti setnañ zulupesâpme egan pigok zeye, “Amobotnañ, geñ eneyet neñ bukapiyet setn penañ pi zulutnesenik?”

⁷ Zeme Zisasiyan pigok dunduye, “Neñ muluwan tapmiyap kapiyet yañan penañ alak kapi ku nâmtâtâdik bamgegut o nâgâek piwan yañan pigogapmti tapmnemange e nâmtâtâbanik.”

⁸ Âpme Pitayan pigok zeye, “Yek penan, gen nâgât setn zululupin!”

Zeme Zisasiyan pigok zeye, “Neñ sedi ku zulut-gesap beme gen nenmak tususunit ewe ku tabe.”

⁹ Zeme Pitayan pigok dunduye, “Amobotnan, kekok beme setn etan yek, betn ma ñokñ mee temakwep zulutne!”

¹⁰ Zeme Zisasiyan pigok dunduye, “Amnan tu zuluti bam belaknik meti kot witolip selinan etan zuluti matalip. In sambe kapi yompin kwetetepman etan bemâbien. Âpme tunguwinanngatnan an kwewan kwetetepman penan ku mamain.”

¹¹ Egan an zemkuwe egat nâmti keyepmti pigok zeye, “In sambe kapi dolakñan etan yek; an kwep bekanan.”

¹² Setn zulut mepme delan zeme kot kâlâpman ewe mim mundun̄ti met munduman tot tagom tati pigok dinndoye, “In neñ selin zulutindeya kapiyet yan̄an ñep nâip? ¹³ In nâgât Amobotnan̄ ma An zikat indandan manzeip e ñep nânmemti manzeip. ¹⁴⁻¹⁵ Âpme neñ Amobotnan̄in ma An zikat indandan̄in manâmneip neñ alak selin zulutindema egip sepem kekokak in ilinak ñenan̄ ñengat setnan̄ zulutpem ñenan̄ ñengat setnan̄ zulutpem mammambep. ¹⁶ Neñ zet penan̄ pigok diindoma nâit, sisilin̄ nemba ñenan̄ Amobotnan̄an̄ sebempemti egan̄ mobotnan̄ ku mamain ma amobotnan̄ ñenan̄ nemba ñen mulup zet manzempeme mezin beme nemba mamezin keyan̄ an mulup zet masain ke ñep ku mamtopein. ¹⁷ In zet kapi dinndoma nâyo keyet katan̄

penañ mbep beme in set ke ekme dolakñañ beme oloñen mbep.

¹⁸ Neñ zet kapi zema in sambe ilinsakwep ku indati mâzin. Neñ in sambe kapi nenn nâmti indati mâban. Âpme kwep ñen bekanañ e nâmtiñgut waban keyepmti ekmagen Kawawangalen Zet Itnananen zet ñen pigok tazin ke katikñañ bewe, ‘An neñmak meu pelep kwep nilut egan neñ zemnowe.’ (Sam 41:9)

¹⁹ Kwitnañ kwitnañ kapi penañ ewe sokbem-bepiñ tapme neñ eweñanak diindoyap keyepmti kwitnañ kwitnañ nâgât palen tasokbeme ekti pigok nâmbep. ‘O, Amobotnañañ iññañ zeme nâmbenn wan penañañ ilak alak kapi sokbemsame eknupmak,’ nâmbep. ²⁰ Neñ zet penañ sukwep pigok zema nâit, am ñenañ neñ an ñen zem-pema kopme egan kwitnañ kwitnañ dolakñañ mimindawe beme wa eñen mimindanup zemti neñmak Bien zemneme koban nit eyo keñ taolet minndawe.”

Zisasiyañ nembañane eñenmagengatnañ ñenañ zemkuwe keyet zemkawañ bemindaye
(Matiyu 26:20-25; Mak 14:17-21; Luk 22:21-23)

²¹ Zisasiyañ zet kekok zeme delañ zeme Zudasiyañ alak zemnosem e nâmti keñañ bekanañ penañ beme nembañane nin pigok zem sokbemndaye, “Neñ penañ sukwep penañ zema nâit, ingat tunguwinangatnañ ñenañ neñ zemnosem.”

²² Zeme nâmti nembañane nin wenñ mepme nnak meek koek mti pe kwiyet nâmti zein zemti nâpemann mekwapme tabenn. ²³ Âpme nembaninmagengatnañ Zisasiyañ nâmpeme dolakñañ

penaŋ mambemtan nemba keyaŋ Zisasiyet solonan penaŋ totapmaŋge. ²⁴ Keyepmti Saimon Pitayaŋ nemba keyet zikat petaŋ mti zeye, “Kwiyet nâmti tazein ze belaknik yaŋkwesimane ningat zeme nâne.”

²⁵ Âpme neŋ ulunzemet Zisasiyet wakŋanen bemti pigok yaŋkwesiwan, “Amobotnaŋ, geŋ zet kapi ninmagengatnaŋ kwiyet nâmti tazenik? Ze zemane nâne.”

²⁶ Yaŋkwesima Zisasiyaŋ pigok dinoye, “Neŋ meu tuŋanen nupmamaŋ pema topme olek sama nsem an keyet nâmti tazeyap.” Kegok zemti nupmamaŋ peme topme mkwati Saimongaŋ nemuŋaŋ Zudas Iskaliot mkaengatnaŋ ke same mti niŋge. ²⁷ Nime nime keyegak Sadaŋaŋ keŋanen toti keŋaŋ mme yuŋgume delaŋ zeye. Âpme Zisasiyaŋ pigok dunduye, “Geŋ keŋdan kwileki msâgât tatnânik elak sakwep meti miya!” ²⁸ Zisasiyaŋ Zudas zet kegok tadundume nemba nin tabenn nin Zismak Zudas egelaŋ zet eneyet tazelup ke ku nâmbenn. ²⁹ Keyepmti nemba notnaŋaŋ pigok otnâmbien Zudas ek ningalen mânep egaŋ mandamuŋ min keyepmti Zisasiyaŋ Kendoyet meu nim tabanupgat nâmti meu met kwititiyet mene ma am bekopsat ŋen mânep met sasayet tazempein mene nâmti tapmambenn.

³⁰ Âpme nupmamaŋ Zisasiyaŋ Zudas olek same nim pemti keyegak tambu sutnan toti mege.

³¹ Zudasiyaŋ toti mepme mepme Zisasiyaŋ nembaŋane nin pigok dinndoye, “Angat Nemuŋaŋ neŋ alak nukŋaŋ palen mopma keyaŋ kwizet buŋamm temaŋ tisowap. Âpme nâgât

paleseti Kawawaŋgalen kwizet buŋaman kegogak teman bemesâpm. ³² Âpme Kawawaŋan An-gat Nemuaŋ neŋ kwizet buŋamm ammagen mpalakŋan beme neŋ egat kwitnaŋ kegogak mwat onzempewap. Kelak belaknik penaŋ kapi sokbeme eksâip. ³³ Nembanne, neŋ inmak kan isikŋan bugan kapi etaŋ tasâpmnup. Âpme bam-gat in neŋ tokwati natimapme bewe. Âpme neŋ zet Zuda an damuŋ diindowan keyegak naman ingat diindoma nâit, ‘Neŋ mebaŋ ke in nep ku kobep.’ ³⁴ Kegogapm neŋ zii zet alakŋan pigok di-indoma nâit: In ilinak nenan nengat gogot nenan nengat gogot mti gogot palenak mambep. Neŋ in gogot mimindemti indatimamkolap sepem kegok in ilinak mti mambep. ³⁵ In kegok mti dolakŋan mame am eknenan in nâgât nembanne mamaip e sosok nâmâtât indewep.”

Pitayan Zisas zemkandatpesem keyet zemkawaŋ beye

(Matiyu 26:31-35; Mak 14:27-31; Luk 22:31-34)

³⁶ Âpme Saimon Pitayan pigok yaŋkwesiye, “Amobotnaŋ, geŋ pe deset mebanik?”

Yaŋkwesime Zisasiyan pigok zeye, “Neŋ mebawen geŋ keyegak nep ku kobanik bamgulak nep kobanik.”

³⁷ Zeme Pitayan pigok zeye, “Amobotnaŋ, geŋ pigogat neŋ ku gapmât kokogat zenik? Neŋ gâgât mti geŋmak meti maman nep ketalasiwap nânik!”

³⁸ Âpme Zisasiyan pigok dunduye, “Geŋ nâgât mti nenmak meti sekdi ketalasi sâgât zenik? Neŋ

penaŋ sukwep pigok zema nâmbak, tambu sutnan sakokolok kwitnaŋ ewe kukupin tapme geŋ sek tuk zemkandat newanik.”

14

Zisasiyaŋ Kawawaŋmagen mebegalen set damuŋ bein

¹ Zisasiyaŋ nembaŋane nin pigok dinndoye, “In nâgât kemben temaŋ mti keŋinaŋ yayaŋ temaŋ ku mit in belak Kawawaŋmak nit nsakwep nâmkinpemndemti windemak talit. ² Bienaŋ mamainen gwaen mka sambe sambe penaŋ wemezin e ku tatnak ze neŋ met mkaŋin weyaŋpepeyet zetnaŋ kapi ku diindowak. ³ Neŋ pi meti mundumin beke weyaŋne weyaŋne pema delaŋ zemeŋgut naman gilik zemkoti indatima nsakwep meti neŋmak ke mamambanup. ⁴ Neŋ mebaŋ in mka set ke nâip.”

⁵ Zeme Tomasियाŋ pigok yaŋkwesiye, “Amobotnaŋ, geŋ pe deset mebanik? Nin zet tazenik kapi ku weyaŋ nâmatâtŋup keyepmti nin pe set zigoset gâlen ke kwabanup?”

⁶ Zeme Zisasiyaŋ pigok zeye, “Set ma zet penaŋ ma mama keyet toŋaŋ neŋ. Neŋ kandat nemti ŋenaŋ igak set belakŋaset Bienmagen ŋep ku mobogalen. ⁷ In eweŋanak baen mamkwabennen ke nâgât Kilais kegok nâmatât nembiek ze Bipmnaŋgat kegogak ŋep nâmatâpewiek. Yaŋ alak pi kwitnaŋ kwitnaŋ sambe nâgât palen kwapmâsâpm ke ekti Biengat yaŋaŋ ŋep ekmâtâsâip.”

⁸ Kegok zeme Piliwan pigok zeye, “Geñ Bipdi ke de ze zikat ndamane nin ekti nâmann delan zeme oloñen palen mambanup.”

⁹ Zeme Zisasiyan pigok dunduye, “Pilip, neñ kan teepman bepi inmak mamkwaban pi geñ ewe yanñ ku niknamâtâtnik? Am ñenan neñ maniknâmâtâzin beme egan Bien maekmâtâzin. Âpme geñ zigogat pigok nayan kwesinik, ‘Geñ Bipdi ke de tazin ze zikat ndamane ekne’?

¹⁰ Bienmak nit kwep mamamti napmukulem mme mulup mamiyap pi Pilip, geñ ewe ku mandikmâtâdik? Neñ zet sambe mandiindoyap ke wa nanangat kenñangalak ku manzeyap. Bienan neñmak mamti zet kenñan bemneme manzeyap.

¹¹ Bienmak nit kwep mamalup manzeyap. In zet ke penan nâmkijpewep. Neñ zelan etan zema nâme zet dâsukinok besemagengat mulup sambe mamiyap beke ekti penan nâmkijpemnembe.

¹² Neñ zet penan pigok diindoma nâit, am ñenan neñ nâmkijpemnewe beme egan neñ mulup mamiyap kabonñ ñep mbe. Ya wa ke etan yek egan neñ mamiyap ke sebempemti sambe mmebe. Neñ Bienmagen mobap keyepmti am ekñen ke winde indamti indamukulem mimin-dema ekñenan mulup kegok mbep. ¹³⁻¹⁴ In neñ nâmkijpemnemti nâgât kwitnnanen kwileki ñeniyet nâmti dundum name neñ keyet penanñ ñep maaikindamambap. Kegok mma Bienan nâgât paleset kwizet buñamanñ teman tiwe.

Zisasiyan Emetak Ten peme togot zetik mge

¹⁵ In nâgât gogot mti mamambep beme in nâlen zetn manzeyap kapi manğawepup. ¹⁶ Keyepmti

neŋ moti Bipmnangat zema egaŋ ingat mukulem mimiŋin ŋen peme toti inmak kwesiŋ kapi mamti maindamukulem mmambe. ¹⁷ Zet penangalen Emetak Teŋ kapi am msalen nâmkĩŋpepeŋinpiŋ belak kileŋ mamaip ekŋenaŋ ku tiwep. Ekŋenaŋ ek ku ekbien ma keyet yaŋaŋ ku nâip. Âpme ingut egat yaŋaŋ nâip keyet mti ingat keŋinan mame in egat yaŋaŋ nâmpaip.

¹⁸ Neŋ gakimti indemti mebet katikŋaŋ penan ku mebap; Neŋ bam ewe gilik zemti inmagen kobap. ¹⁹ Neŋ kan isikŋaŋ bugan kapi tapmoti gakimti naman wabap. Âpme am msalen belak kileŋ mamaip ekŋenaŋ ku nikbep. Âpme ingut ŋep nâmkĩŋpemnemti mamaip keyepmti nikbep. Neŋ mama kanzizit ke indama timti mambep. ²⁰ Neŋ gakikiengatnan wabap kan keyet Bienmak nit kwep penan bemti mambalup ma neŋ kegogak inmak kwep bemti mambanup. Keyet yaŋaŋ ŋep mamaŋinaŋ ekmâtâbep.

²¹ Am ŋenaŋ nâlen zeomkalili sambe kapi nâmti gawepumti nâgât kandaŋnnan meti nâgât gogot mimnewe beme Bipmnan an ke kegogak gogot mpewe. Âpme neŋ an ke gogot mpemti yaŋaŋ penan zemkawaŋ bem sama nâmtâtâtnembe.”

²² Kegok zeme nâmti Zudas Iskaliot mkaengatan keyet opmaŋaŋ pigok yaŋkwesiye, “Amobotnaŋ, geŋ kwilekiyet yaŋaŋdi am sambe bepi aŋgalaŋ indemti nin etaŋ kapi zemkawaŋ bem ndasâgât etaŋ pi zenik?”

²³ Yaŋkwesime Zisasiyaŋ zet dopmaŋ pigok gilik saye, “An ŋenaŋ neŋ gogot mnewe beme egaŋ nâlen zet nâmti ŋep gawepuwe. Âpme

Bipmnanj ek gogot penanj mpewe keyepmti Bienmak nit nsakwep ekmagen koti ekmak mamambalup. ²⁴ Âpme an nenanj nâgât wisat nâmnembe beme eganj zigoset zetn nâmti nep gawepuwe. Zet sambe mandiidomkwapma nâip ke wa nenangalen nòktiknanggat etanj yek. Bien zemneme toban ekmagengatnanj ke timti mandiindoyap.

²⁵ Nenn ewe inmak kapiyak mamti zet kapi mandiindoma nâip. ²⁶ Âpme nenj moti zema Bienanj mukulem mimiñin Emetak Tenj ke zempe me eganj toti nânâ dolakñanj sambe sambe zikat indamâbe. Mti nenj zet diindoma in notnanj kandapmâbien mee pi ewe mbutem indame nâmbep.

²⁷ Nenj indemti mesât tati betziññ kenj sewakñanj palen mama ke indayap wa ke am belakñanj nenanj mamimindaip keboñ yek nenangalen kenj sewakñanj penanj ke kenjinan be mindeyap. Keyepmti nenjmagen kwitnanj kwitnanj nukñanj sambe sokbeme ekti in kenjin yayanj temanj kwapme ku kingabep. ²⁸ Nenj nenanj pigok diindoma nâyo, ‘Nenj indemebawanj met maneti bam ewe inmagen gilik zemti kobap.’ In kenjin nenjmagen penanj bempemti mamambiek ze nenj Bien an windenanjbenj ekmagen mobap zema nâmti oloñen temanj mbiek. ²⁹ Pi ewe kwitnanj kwitnanj sokbembepiñ tapme ewenjanak tadiindoyap keyepmti in tati ekme kwitnanj kwitnanj nâgât palen ke sokbeme ekti zet tazema nâip kapi nâmkijpewep. ³⁰ Nenj zet sambe teepmanj ku diindosap msat kapiyelen damunj Sadanj ek ilak kokogalen bududuk penanj min. Eganj nenj nep ku mtot neneyelen. ³¹ Nenj Bienanj ikñanj

zemâtâtneye keyet katar Bien gogot msamti
zetnar gawepumti mulup sambe kapi mmeppa
msalen am sambe kapiyar nikmâtâpmâbep.
Keyet wapme ilak mka pi pempti metne.

15

Zisas ek wain tep yanar nembon

¹ Neŋ wain tep yanar ŋoteknar penar âpme
wain mulup keyet tonar Bienar iŋnar bein.

² Keyet mti mulupmar mmeti ekme betnar
nen neŋmagen om mebetnaranŋut penar
pepepiŋ tapme ekti maantimpeme mezin. Âpme
naman betnar nen ekme penar dolaknar
maelikzin beme egar weyar betnar bekanar
notnar elenŋem time topme tati penar sambe
maelikzin. ³ In neŋ zet diindoma zetn nâmti
nâmŋinŋempti ilak kwetetepmar bemti neŋmagen
tuseumâbien.

⁴ Keyet mti in neŋmak tususun
dolaknar mme neŋ inmak tususu kegogak
dolaknar mti mamambanup. Âpme wain tep
betnar nen pamanen daen tususupiŋ belak
igak tungupmar anzam tati penar igak nep
ku maelikzin. Egar tep penarmak daen tusum
tatiŋut penar maelikzin. Âpme in kegogak
neŋmak tususupiŋ mambep beme in penarin
dolaknar zigoset elikbe?

⁵ Wain tepmar bee neŋ mme sinar betnar
e in keyepmti am nen neŋmak tususunit kwep
tabe beme am kemagen penar omba elikmâbe.
In neŋ nemti ilinak etar anzam tati kwileki
nen pambenar ku aikbep. ⁶ An nen neŋmak
tususun tapme keyet penar ku sokbein

beme neŋ tususunit ke elenŋem pewe. Âpme wain betnaŋ elenŋem time towemti anŋasimti memun bem weme timti tewen time moti manzin ek sepem kegogak msawep. ⁷ In neŋmak tususun in kwep tapme zetn gawepumti mambep beme in kwileki ŋeniyet nâmti dundum nawep beme neŋ keyet penanŋ msokbewap. ⁸ In ammagen mulup mme am nâmkînpepemak sambe sokbemâbep beme set keyeset am ekŋenŋ in nâgât nemunnambanne penan mamti mulup mamip e indikmâtâti Kawawaŋgat kwizet buŋamaŋ omba penan mwabep. ⁹ Âpme in neŋmak tususun matazin keyepmti in am sambe gogot mami-mindeip keyepmti neŋ ingat gogot penan mami-mindeyap sepem kegogak Bien Kawawaŋan neŋ gogot penan mamnain. ¹⁰ Âpme neŋ Biengalen zet sambe bee gawepumti mamiap keyepmti Bi-enaŋ nâgât gogot penan mamnain. In sepem kegogak nâlen zetn sambe gawepumti mambep beme neŋ ingat gogot penan mimindewap.

¹¹ Âpme neŋ oloŋen palen mamayap keyepmti in neŋmak pepep bemamti kwitnaŋ kwitnaŋ zeya kapi kegogak mbep beme in neŋ mamayapnok keŋ oloŋen palen mamambep. ¹² Neŋ ingat zemâtâtât zet ŋen kapigok diindoma nâit, neŋ in gogot mamimindeyap sepem kegok in ilinak ŋenaŋ ŋengat gogot mti mamambep. ¹³ An ŋenaŋ am notnaneyet mti mamaŋan kileŋ ketalasiwe beme an keyet nâma amgat gogot omba penan mamimindein kegok nâmpewap. ¹⁴ In mulup zet diindoyap keyet katan mâtî mme neŋ indikma nâgât notne penan be-

wep. ¹⁵ Neŋ ingat sisiliŋ nembanne ewe ku zeyap neŋ ingat notnne penaŋ zeyap. Sisiliŋ an egaŋ amobotnaŋaŋgalen keŋanen zet zigok tazin ke ku manzeme nâinaŋgut Bienmagengatnaŋ zet sambe timti toban bee in sambe diindoma nâmâbien keyepmti neŋ ingat nâma notnne penaŋ mambemâzin. ¹⁶ In neŋ ku nabien; neŋ in neŋmak mamayet indati zemindema meti muluin dolakŋaŋ mme penaŋaŋ sambe sokbemt看i wemti kwesiŋ tatagalen keyet diindowan. Keyepmti in met mulup mimamambe kwileki ŋeniyet olati nâgât kwitnnanen Bien dundum same egaŋ indamukulem mimindewe. ¹⁷ Neŋ zemâtâtât zet ŋen pigok diindoma nâyo keyegak ewe zema nâit, in ilinak ŋenaŋ ŋeniyet gogot mti mamambep.

Zisas nembane ekŋen mulup mme sisipenŋen mimindewep

¹⁸ In mulup tapmim mepme am ekŋenaŋ indik talati mtoindewep beme in nenn mamimname egip keyet otnâmbep. ¹⁹ In am ekŋen kemak tusumti mambiek ze ekŋenaŋ kasa kasa ŋep ku mimindawiek. Neŋ in am kapiyet tunŋuwinangatnan indatimti set ŋen zikat indama ilinaŋgalen set itnaŋaŋ ke bamkumpemti nâlen mama mimi mâti mamip. Keyet mti indiktalati mtoindewep. ²⁰ In neŋ zet ŋen pigok diindowan e nâip, ‘Sisiliŋ nembayaŋ amobotnaŋaŋ sebempemti mobotnaŋ ŋep ku manak.’ Keyepmti am ekŋenaŋ neŋ sisipenŋen mimnawien sepem kegogak in mimindawep. Ma am notnaŋaŋ nâlen zet gawepuwien sepem kegogak am

notnanan ingalen zelin nep gawepuwep. ²¹ Am nâmkînpēpēpîj ekjen kapiyan neŋ Kawawanan ikjan zemneme toti mulup mamiap ke ekjenan ku nâmatâlip. Keyepmti ekjenan in neŋmak tusumti mamaip keyepmti in omba penan mtoidewep. ²² Neŋ msalen kapi toti am ekjen ke zet zapatn kapi ku diindowan ze zet kapiyan yomin sosok ku mkawan bem indenak. Pi zemkawan bewan keyepmti yomin sosok mamîmkawanbein. Kwileki nenan yomin ke nep ku angalanpepeyelen. ²³ An nenan neŋ niktalati mammtotnein beme egan Bien kegogak mammtopein. ²⁴ Neŋ am tunguwinan menok teman teman amnan ku mimiyele ke mamkolap ke ku mbak ze ekjenan nâgât nenzinziŋ mti yom teman ku aikbiek. Pi neŋ yomin mimsokbema yomin ke ekmâtâtîngut ekjenan naman nâgâek mtopenup zemti Bien kululunen main ek eyo mammtopeip. ²⁵ Kegok mme golan zenze an zet nen kapigok zenzenan ke penanan masokbein, 'Ekjenan yompîj belak tungupman penan nenzinziŋ msamti mammtopeip.' (Sam 35:19; 69:4)

²⁶ Neŋ mulupgat indamukulem mimiŋin Emetak Teŋ Bienmak mamain ke moti zempema toti egan Bien Kawawanmak nigat yanŋ weyan zemkawan bem indame nâmatât ndewep. ²⁷ Âpme neŋ in indatimti mulup yanbemti mkopma nikbien keyet zet zapatn am zemkawan bemindame nâmâbep.

16

¹ Mineti amnan kwitnan kwitnan nuknan nen

mimindame nâmkinpepeen suknaŋ bewepmagat zet eweŋanak tipman baen pigok diindowan. ² Am ekŋenaŋ in Zuda am ekŋengalen sesewat mkaen mebegat zemkulumindemti pase zupman indewep ma kan ŋen beme am ekŋenaŋ nin Kawawaŋgalen mulup penaŋ tapminup zemtati mamti in indome gakiwep. ³ Ekŋenaŋ Bienmak nigat yaŋŋ ku weyaŋ manâmâtâlîp keyepmti sepem kegok mimindawep. ⁴ Neŋ zet eweŋanak kapi tadiindomkwapma nâip keyepmti manepeme kwitnaŋ kwitnaŋ keboŋ sokbemindame ekti zewep. ‘O, Amobotnaŋŋ zet dindoye walak penaŋŋ piki sokbemndain,’ zewep. Zet kapi ilak kan teepmaŋ tipman baen mamkwabennen ke ku diindowan. Pilak Bienmagen mobogalen kann bududuk beme nâmti keyepm tadiindoyap.

Emetak Tenjalen mulup kapigok mam

⁵ Pi neŋ An zemneme toban ekmagen mobogalen kan bududuk penaŋ beme mosât tapmma inmagen ŋenaŋ pigok ku nayaŋkwesin, ‘Geŋ pe deset mebanik?’ ⁶ Neŋ indemesât zet kapi zema keyepmti in belak kembeŋaŋ keŋin bemisikme belak zelinpiŋ talip. ⁷ Neŋ zet penaŋ pigok zema nâit, neŋ mobap ke ingat mti mobap. Âk neŋ ku mobap beme mukulem mimiŋin ke ŋep ku todak keyepmti neŋ moti ek zempema tobe. ⁸ Âpme egaŋ koti am msalen kapi yominaŋgat yaŋŋ zikat indawe ma egaŋ mama mimi tej ke yaŋŋ zikat indawe ma yominaŋgat dopmaŋ zemindondo keyet yaŋŋ zikat indawe. ⁹ Âpme ekŋenaŋ

yominangat yaŋaŋ pigok ekbep ekŋenaŋ neŋ ku manâmkinpempneip keyaŋ yomin bein. ¹⁰ Ekŋenaŋ mimyungunŋuninangat nâme ŋep mambein. Kulekiyet neŋ Biengalen melap yaŋgut in ewe neŋ ŋep ku nikbep. ¹¹ Ekŋenaŋ Kawawaŋangalen yominangat dopmaŋ zemindondo keyet yaŋaŋ ku nâip. Kwilekiyet msalengalen damuŋ Sadan ek eweŋan zemkuye.

¹² Zet keboŋ keboŋ ke diindondoyelen sambe penaŋ timtalap yaŋgut alak kapigogat sambe diindoma zigok ambepeseip. ¹³ Emetak Teŋaŋ tobe kan keyet egaŋ Kawawaŋ an zet penaŋgat ŋotekŋaŋ keyet yaŋaŋ zemâtâtindamti mama mimi dolakŋaŋ keyelen set zikat indame nâmâtâbep. Egaŋ kwitnaŋ kwitnaŋ iŋŋaŋgat keŋanegak etaŋ ku zewe. Nen zemâtâtsama nâmŋi kwitnaŋ kwitnaŋ bam sokbemâbe keyet zapatnaŋ diindowe. ¹⁴ Zet ke nâgât keŋŋanangatnaŋ timŋi zemkawaŋ beme nâgât kwizet buŋamnaŋ msalen palakŋaŋ penaŋ bemŋi mekobe. ¹⁵ Bienmagen kwitnaŋ kwitnaŋ tazin keyet toŋaŋ neŋ keyepmŋi neŋ zet pigok eweŋan diindoya, Emetak Teŋaŋ nâlen keŋnanangatnaŋ zet timŋi in diindowe.

Zisasiyaŋ met maneti naman gilik zemŋi ndatisât kobe

¹⁶ Neŋ kan isikŋaŋ bugan tazin kapi delaŋ zeme mepma in neŋ natimati ilinak mame neŋ met belaknik bugan mamŋi naman gilik zemkopma nikbep.”

¹⁷ Kegok zeme nin nnak sek putuŋ pitin mŋi zewenn, “An kapi zet kapi pe yaŋaŋ zigogat

nâmti pigok pi zein? ‘Kan isikɲaŋ bugan tazin ke delan zeme mepma natimabep yaŋ met belaknik maneti naman ewe gilik zemti inmagen kopma nikbep.’ Naman zet ɲen pigok zep, ‘Neŋ Bienmagen mobap?’ ” ¹⁸ Kegok zemti ewe sakwalamti zewenn, “An kapi, ‘Pe kan isikɲaŋ bugan tazin,’ tazein kapi kwilekiyet nâmti tazeinaŋ? Ke nin yaŋaŋ ku nâmâtâtnup!”

¹⁹ Zem mbenan yek beme Zisas yaŋkwesisâgât tapmmann Zisasiyan ndik mâtâti zeye, “Neŋ kan isikɲaŋ bugan tazin ke beme mepma natimabep. Ya naman met kan isikɲaŋ bugan tati naman gilik zem kopma nikbep,’ zeya keyet in zenâmti nayaŋkwesisât tapmip? ” ²⁰ Neŋ zet penan pigok zema nâit, neŋ nome gakima in nâgât si kemben teman tapmme am nâmkinpepeninpin ekɲenaŋ keŋ oloŋen teman penan mbep. In kemben palen ke manepeme neŋ bam gilik zemti indatisât kopma nikti oloŋen teman mbep. ²¹ Imbi ekɲenaŋ nemba sokbesâpme sek sindem omba penan timti keŋin sindem mambein. Yaŋ bam nemba sokbeme nembaŋaŋ ke ekti sindem titiŋaŋ ke nâme betetnaŋ beme keŋ oloŋen teman mamip. ²² Âpme in sepem kegogak kan isikɲaŋ bugan kapi in si kemben mti mambein. Manepeme neŋ mamaen gilik zem wapma nikti naman keŋ oloŋen penan mbep. Keŋ oloŋen keboŋ ke am ɲenaŋ ku menzemme.

²³ Neŋ Bienmagen mobap kan keyet in kwileki ɲeniyet yaŋaŋ penan nâsâgât ɲen ku nayaŋkwesiwep. Neŋ penan sukwep pigok zema nâit, in kwileki ɲeniyet olati Bien dundum same

egan nâgât pmbenanngapmti kwilekiyet olati wekuwep ke indawe. ²⁴ Nenmak tusumti mamkwabien kan keyet in kwileki neniyet olati nâgât kwitnnanen Biengat ku yankwesiwien. Yan alak pi in nâgât kwitnnanen kwileki nengat olati Biengat yankwesime egan kwitnan kwitnan nep indame olalapij timamti olojen palenak mambep.

Zisasiyan Sadanğalen winde sambe kume topmoge

²⁵ Neñ zet sambe diindomkwaban ke belak bemzenze zet etan diindomkwaban. Maneti bamgat neñ bemzenze zet nen ewe ku diindowap neñ Biengat yanğ belak sosok zemkawan bemti zemâtâtindama nâmâbep. ²⁶ Kan keyet in nâlen bembenğ keyepmti nâgât kwitnnanen Biengat gwaen dundum same neñ ingat munduminan tati Biengat manzemtemanok ewe ku zewap. ²⁷ Neñ Kawawanğmagengatnan kwatoban e in nâmkinğpennemti nâgât gogot penanğ mamimneip keyepmti Bienanğ ingat sepem kegogak gogot penanğ mamimindein. ²⁸ Neñ Bien pemti msalen pien inmagen kwatoban yanğ pi naman in indemti kululunğ Bienmagen gilik zem mowebap.”

²⁹ Kegok zeme nin nâmti pigok dunduwenn, “Geñ alak pi bemzenze zet nen zenzepinğ sosok belak zemâtâtndamane nâmâtâtnup. ³⁰ Keyepmti nin gâgât pigok nâmgenup geñ an nenanğ gayanğwesisiğin mme geñ gitiyegak kwitnanğ kwitnanğ sambe beeyet yanğ manâmâtâpmane delanğ zein. Keyepmti geñ Kawawanğmagengatnan tobanan e nâmkinğpennengup.”

³¹ Zeme Zisasiyan pigok dinndoye, “Kapi zema in alakñatingut nâmkinpēmneip? ³² Kan belaknik penañ kapi in neñ nemti kunzunñi mkaninan me enzilim kot enzilim msâip. Ke nem mekopme neñ nenak etañ ku tabap Bienañ namukulem mti neñmak tabe. ³³ In neñmak tusumti mamaip keyepmti in keñ sewakñañ palen mamayet nâmti zet sambe bee diindomkwala. In msalen kasa kasa mimindame keyet keñañ nâmisim mamaip. Âpme nenn msalengalen kwitnañ kwitnañ bekanañ sambe kapiyelen windenñ mtopemâban.”

17

Zisasiyan nembajane ekñengat nâmti dunduye

¹ Zisasiyan zet kekok zemdelañ zemti zikanñ kululunñ gwaen ekme mopme pigok dunduye, “Bien, gakiki kann ilak bududuk penañ bein. Kan keyet geñ nâgât kwizet buñamm mwapmane neñ naman gâgât kwizet buñamdi mwabap. ² Kawawañ, geñ msalen am sambe bekapi ilindiñ neñ indadamuñ mimiyet nâgât kandañnnan yaloñ indemti indadamuñ mimiyet winde nawanan. Mti am geñ gitañgat zapat penañ ombem indewanan ekñen ke neñ mama kanzizit indawap. ³ Amnañ mama kanzizit ke yañañ kapigoset mti matip: geñ Kawawañ penañ mamani ma Zisas Kilais neñ nemane toban am ekñenñ yañnit kekok penañ nâmâtâtndemtingut mama kanzizit ñep tiwep. ⁴ Geñ mulup mimiyet zemneman tobanñ mulup bepi mmetne metne pema msalen kwizet buñamdañ palakñañ bemti

tazin. ⁵ Bien, msat kululun ewe ku sokbeme neŋ eweŋan geŋmak mamti kwizet buŋamm temaŋmak mamamteman. Sepem kegogak pi ewe gilik zemti geŋmagen kwapma kwizet buŋam ke ewe namane timti gâgât monzalamdanen mamambap.

⁶ Msalen am sambe penaŋ kapiyet keŋan am gitangat zapat ombemindewanan ekŋen ke nâlen belen beindewanan ekŋenmagen kwizapadi ilak zemkawaŋ bemindama nâmti mkatikbemâpme delaŋ zeye. ⁷ Mti ekŋenaŋ neŋ mulup kwitnaŋ kwitnaŋ sambe mamiyap ekŋen kapi winde geŋmagengatnaŋetaŋ matimiyap elak ekŋen sambayaŋ eknâme delaŋ penaŋ zemâzin. ⁸ Zet sambe nawanan e diindoma delaŋ zeye. Ekŋenaŋ penaŋ nâmkînpeip neŋ geŋmagengatnan koban. Ma geŋ nemane koban.

⁹ Keyepmti neŋ geŋ am gitangat zapat ekŋen ke nâgât belen bewanan ekŋen keyet etaŋ nâmti pigok dundum gayap. ¹⁰ Am sambe geŋ nâlen belen bemane maindadamuŋ miap pi toŋaŋ nilizuzut belup ya am ekŋen kapiyaŋ nâgât kwizet buŋamm ŋep mwatnewep. ¹¹ Âpme neŋ msalen pien kwesiŋ penaŋ ku mambap ilak geŋmagen kwakwagalen kan bududuk bein. Âpme amdine ekŋen bekakan nâlen belen bemane maindadamuŋ mkwalap pi ewe msalen kapi kwesiŋ mamambep. Keyepmti Bien, An teŋ mamaniŋ, geŋ kwileki ŋenaŋ mto indeweyet indadamuŋ dolakŋaŋ mimindemane mambep. Âpme ekŋenaŋ gâlen winde ke sosok ekmâtâti keŋ kwep bemti kume kwaopme

mambep. Nit ken kwep bemti mamalup sepem kegogak ¹² neŋ ekŋenmak mamayap. Kan kapiyet neŋ gâlen windeen zet zapadi dolakŋaŋ kapi zemti mkatikŋaŋ bemindewan keyepmti ekŋen sambe penan ku walebien. Kawawangalen Zet Itnaŋanen zet tazin ke katikŋaŋ bembeyet an kwewetaŋaŋ set tetakŋaŋ palakŋaŋ beme mmetneti mme pilik zeme teziŋ ŋandaŋgat zapat beye. ¹³ Neŋ ilak geŋmagen kokogat kann bududuk beme keyepmti neŋ ekŋengat yayaŋ mimindemti dundum gayap. Geŋ indamukulem mimindemane oloŋen palen mambep nen mamayap sepem kegogak. ¹⁴ Âpme neŋ zedi zemâtâtndama ekŋenaŋ ke nâmti neŋmak tusume mamakup keyepmti am ninmak tusumti ku mamaip ekŋenaŋ nsakwep ŋenzinziŋ minndamti mamtot ndeip. ¹⁵ Wa neŋ geŋ msalen kapiyetnan indatimti mobogat nâmti ku dundum gayap. Mneti Sadaŋgalen windeyaŋ mtoidewemagengapmti geŋ indapmukulem mimindemane mamayet nâmti dundum gayap. ¹⁶ Neŋ msat kapiyet zapat ku mamayap sepem kegogak ekŋen kapiyaŋ msat kapiyet zapat ku mamaip. ¹⁷ Geŋ gitaŋgat zedi penan sukwep penan keyaŋ keŋin mmane kwetetepmaŋ penan beme ekŋenaŋ yomgalen mama mimi bekanan ke bamkumpemti gâgât zapaletaŋ mamambep. ¹⁸ Geŋ neŋ msalen pien zedi penan sukwep penan ke zempalakŋaŋ bembeyet zemneman totu mamiyap kegogak ekŋen bekakan kapi neŋ zemindema msalen kapi ammagen zedi ke tim mebep. ¹⁹ Neŋ ekŋenaŋ gâlen zedi teŋ penan

kapi nâmti gâgât kandan dan penan kokogat nâmti indamukulem mimiyet kenj temanj penan matazin.

²⁰ Ya wan neŋ ekŋengat etan nâmti ku dundum gayap ekŋenan kapi mamti zedi timepme am notnanan zelin nâmti nâgât nâmkinpemnemti mam-bep ekŋengat eyo nâmti dundum gayap. ²¹ Bien, neŋmak geŋmak ken kwep bemti gogot palen mamalup sepem kegogak ekŋenan nitmak tusumti ilinak ken kwep bemti gogot palen mame am notnan gâlen zet zapat dolakŋan bamkumpemti mamaip ekŋenan geŋ giti neŋ zemnemanetoban ke penan nâmkinpemnewep zemti dundum gayap.

²² Geŋmak nit ken kwep bemti mamalup sepem kegogak ekŋenan ilinak ken kwep bemti mamambep. Geŋ neŋ nigomti kwizet buŋamm temanj nambanan sepem kegogak neŋ ekŋen kegogak indikgomti kwizet buŋamin mamwalap. ²³ Geŋmak nit ken kwep bemti mamalup sepem kegogak neŋ ekŋenmak ken kwep bemti mammanup. Kegogak ekŋenan ilinak ken kwep penan bemti mam-bep. Sepem kegok mti mame am gâlen zet bamkumpemti mamaip ekŋenan mama miminjin dolakŋan ke ekti penan geŋ giti zemnemanetoban ma geŋ gogot mnemti ekŋen eyo gogot mamimindanik e nâmâtâbep.

²⁴ Bien, geŋ am indamakumti nâgât betnnan bewanan. Keyepmti ekŋenan neŋ kwabap keyegak kwabep. Mti ekŋenan geŋ msat kululun ewe sokbembepin tapme geŋ nâgât gogot penan mnemti kwizet buŋamm temanj nawanan kwizet buŋamm temanj ke ekmâtâbep. ²⁵ Bien, An teŋ penan mammanik, am sambe msalen pi

wemelip ekñen bepiyañ gâgât yañdi eweñañ ku nâmbien neñ kwep gâgât yañdi nâmgeyap. Keyepmti geñ am ekñen ke nânânjin mkawañ bemane ekñenañ neñ geñmagengatnañ toban e nâmâtâtnewep. ²⁶ Neñ am ekñen kema-gen zet zapadi zemâtâtindawan yañ pi ewe manzemâtâtindamelap. Keyet geñ nâgât gogot mamimnenik sepem kegogak ekñengat gogot mi-mindewanik.”

18

Kasayañ Zisas met atawien

¹ Zisasiyañ dundundu kegok dundumepme delañ zeme wati nin ndatime mka pem toti met Kidolon tu somti tu nembet daen olip mulup temañ matatanen ke mobenn. ² Mulup keyet keñañ Zisasiyañ ninmak kan katan ke meti maon-daktemenn keyepmti Zudasियाñ mulup set ke nâme delañ zein. ³ Keyepmti ekñenañ ke mepme Zudasियाñ meti zeme sâpe sâpe bumbu an ñeñañ ma Palisi ekñenañ an kasa kuku ma sesewat mkayelen an tipdakutum mee pi zemindeme Zudas Zisasiyañ iññañ nembrañañ wati mamtan egañ iññañ ñeñañ bemti indatime ñelip sage timti tambuyet tañam koñti koñti piyañ Zisas wasâgât kopmâbien. ⁴ Âpme Zisasiyañ am kasayañ koti kwitnañ kwitnañ sambe mnamâseip e nâme delañ zeye keyepmti ekñenañ takopme kopme egañ keeselak ekñenmagen sokñañ meti pigok zeye,” In an pe kwiyet tatimalip?”

⁵ Zeme ekñenañ zewien,” Nin Zisas Nasalet mkaengatnañ ek tatimatnup.”

Zeme Zisasiyan pigok zeye, “Ne toka kapi talap.” ⁶ Zeme ekñenay wenin mepme tikande kande meti toindomâge. ⁷ Mme Zisasiyan ewe indayankwesiye, “In an pe kwiyet tatimalip?”

Indayankwesime zewien, “Nin Zisas Nasalet mkaengatnay egat tatimatnup.”

⁸ Zeme Zisasiyan pigok diindoye, “Neñ pi talap,” tazeyap pe tatnâip ma yek? In neñ tatnatimalip beme nembanne indondopin; nen kwep natamti napmelit. ⁹ Sepem kekok sokbeme Zisasiyan ekñengat dunduyeen keyet penayan sokbem katik beye, “Nemba akum namane maindadamuñ mkwalap ekñenmagengatnay ñenan ku walege.”

¹⁰ Âpme Saimon Pitayan Zisasiyepmti gombo pitakñanen yunmamange pi sakwep senkwati sâpe sâpe bumbu an ñenan egalen sisilin nemba ñen kwitnay Malakas zeme ke ek wakñay penaset sâmpeme mege. ¹¹ Kegok mme Zisasiyan Pita pigok dunduye,” Geñ gembondi sakwep mti mkanan wepe. Bienan neñ sindem teman kapi titiyet zemneñge pi alak geñ naman bekek nesât tapmnik?”

Zisas wati Anas egalen mkaen mebien

¹² Zemti tapme am ek wati kosât mebien ekñenay Zisas atamti betnay tegan zampemti wati mebien. ¹³ Ekñenay ñenan Kaipasiyet tatnay Anas ekmagen wati mebien. Kaipas egan nup kan keyet sâpe sâpe bumbu an sambe ekñengat ñenanin teman mamayet ombempeme mamtan. ¹⁴ Kaipas an keyan Zuda am ekñengalen ondedagen tati zet kapigok zeye, “Zisasiyan tapme nin

nuknaŋ teman aikbanupgat nin ek kwep kumann gakime dolaknaŋ mambanup.”

Pitayan Zisas zemkandat peye

¹⁵ Saimon Pitamak notnaŋ kwep ŋenmak Zisas zet muluwen wati mepme mâti eksât mekun. Nemba ŋen ke sâpe sâpe bumbu an sambe ekŋengalen ŋeŋaŋin teman keyaŋ egat nâmpain keyepmti Zisas wati egalen mka keŋan mopme mâti keyegak mowege. ¹⁶⁻¹⁷ Âpme Pitayangut igak paset zupman baen tati notnaŋ mekun ke sâpe sâpe bumbu an sambe ekŋengalen ŋeŋaŋin teman egaŋ nâmpain keyepmti egaŋ nâmtalati met imbi sekekek damuŋ keyet zeme nâmti Pita set kwalet peme keŋan kwapme imbi keyaŋ Pita sepemaŋ ekti yaŋkwesiye, “Geŋ kapi an kadayet nembanaŋ ŋen tagigap.”

Yaŋkwesime Pitayan yaŋti zeye, “Geŋ pe kwiyet tazenik ne pi ka yegat.”

¹⁸ Kegok zempemti mulup an ma kasa kuku an ekŋenaŋ tâgâyet mti tep bume zime bembuluŋti kât tapmambienen ke mot wanzaŋgum tati tep kât tapmaŋge.

Sâpe sâpe bumbu an sambe ekŋengalen ŋeŋaŋin temanaŋ Zisas yaŋkwesisi sambe tayaŋkwesimaŋge

¹⁹ Âpme sâpe sâpe bumbu an sambe ekŋengalen ŋeŋaŋin teman keyaŋ Zisasiyet nembanaŋe nin zigoset indatiye ma egaŋ zet ziboŋ zikat indammge pe zigok penaŋ manzein keboŋ keboŋ keyet yaŋaŋ nâsâgât tayaŋkwesimaŋge. ²⁰ Âpme Zisasiyaŋ pigok dunduye, “Neŋ am sambe ekŋengat tuŋguwinan ma Zuda am nnaŋgalen

sesewat mka temanen ma am ondedakñin tema temanen sosok belak zetn zemzikat mti mkawan bemeban. ²¹ Âpme geñ nâgât pi eneyet tatnayankwesinik? Am sambe zet mandiindoma nâip ekñen ke indayankwesimane zet pe zigok mandiindoyap e ekñenan zeme nâmbak.”

²² Kegok zeme an tipdakutum damuñ mti tap-mambien ekñenmagangatnañ ñenan bepalsat nangumañ somti zeye, “Geñ sâpe sâpe bumbu an sambe ekñengalen ñenanin temañ kapi zet kebon ke eneyet dundunik?”

²³ Zeme Zisasiyan an ke ekti pigok zeye, “Neñ zet bekanan ma pembenan zeya ze yanñ weyan zeman nâmti tapmangut nowek. Geñ belak kilen etañ eneyet nonik?”

²⁴ Zeme Anasiyan sâpe sâpe bumbu an sambe ekñengalen ñenanin mulupmañ temañ delañ zeme belak pemti mamtan keyepmti Zisas betnañ ewe zapeñ ke tapme zempeme sâpe sâpe bumbu an sambe ekñengalen ñenanin alakñañ tatnañ Kaipas ekmagen wati mebegat zemindeye.

Pitayan Zisasiyet sek ñen ewe ku nâmpeyap zeye

²⁵ Âpme Pitayan ewe tep ke kâpmambe tapme am notnañan ekti yankwesiwien, “Geñ kapi pe an kandayet nembane ekñengat tunguwinangatnañ ñen geñ kapi ma zem tatnânup?”

Âpme egañ zeye, “Neñ yek penañ.”

²⁶ Zeme Pitayan sâpe sâpe bumbu ñenangat mulup anañ ñen wakñañ sâmpaye keyet notnañan ekti zeye, “Geñ sañenen ekmak ilinsakwep muluwen daen mamane gikman pi.”

²⁷ Zeme Pitayan yaŋti zeye, “Neŋ penan egat ku nâypap.” Zeme zeme keyegak pepup apmanan yaŋbemti kâkâkââk kuye.

Zisas wati naman amobotnan Pailetmagen me-bien

²⁸ Tambuyet pi Kaipasiyelen mkaen ke zet mulup mti tapmetnepeme msame watoti naman Loma amobotnan Pailet Zelusalem mkaen matatan ekmagen wati meti ilin penan amobotnan Pailet egalen mkaen ku mobien. Eknenan puk nâmti mbien, “Nin Angalalan Kendoyen tu meu niniyelen kan soknanik bein kapi egalen mkaen mopmann nep ku besem.” Kegok nâmti zupman baenak kot tabien. ²⁹ Eknenan wakoti belak tambangumen baen tapme indikti Pailelan mka kenangatnan toti pigok indayankwesiye, “In an ke pe yom zigok mme wati kotalip?”

³⁰ Indayankwesime eknenan zewien, “An kapi bekanan ku mnak ze nin wati genmagen kapi ku kobenek.”

³¹ Zeme amobotnan Pailelan pigok diindoye, “In ilinangalen zii zelin tazin keyet katan nâmtati zetnan zemdelan zempeit.”

Zeme Zuda am eknenan zewien, “Nin am nen zetnan zemdelan zemti kumann gakikiyet ku nâmdendenan.” ³² Zuda am eknenan kegok zemti Zisas Loma amobotnangat betnan beme Zisasiyan maneti bam tep palen nomti masasoknewep zeye zet ke penan sokbeye.

³³ Âpme Pailelan mkanan kenan motati Zisas zemandame mopme pigok yankwesiye,” Gen penan

Zuda am ekñengalen Amobotnañ manze zemanen nâmbi?”

³⁴ Yañkwesime Zisasiyañ zeye, “Zet ke am notnañ zeme nâmti zenik ma gitañgat kenñañgalak nâmti tazenik?”

³⁵ Zeme Pailelañ zeye, “Neñ Zuda an keyepmti nâgât tatnayañkwesinik? Zet ke gitañgat amdine ma sâpe sâpe bumbu an ñeñañdine ekñenañ geñ zigok mmane gikti gati nâlen pi kolo?”

³⁶ Zeme Zisasiyañ zeye, “Wa neñ Amobotnañ msat kapiyetnañ yek. Neñ Amobotnañ kululuñen gwaengatnañ. Neñ msat kapiyelen Amobotnañ mambak ze neñ aminne zemindema ekñenañ nadamuñ katikñañ mtapme Zuda am ekñenañ ñep ku natamti kobiek.”

³⁷ Zeme nâmti Pailelañ zeye, “Âpme geñ Amobotnañ temañ ñen geñ bekapi?”

Yañkwesime Zisasiyañ pigok zeye, “Giti zenik kemak! Neñ zet penañ ñotekñañ kapi zemkawan bembeyet nâmti msalen kapi toti am mamaen sokbewan. Am zet penañ ñotekñañ kapiyet yañañ manâmatâlip ekñenañ nâlen zetn manâip.”

³⁸ Zeme Pailelañ nâmti pigok zeye, “Zet penañ ñotekñañ ke pe kwilekiyet nâmti tazenik?”

Kegok zemti ewe tambaŋgumen toti Zuda am pigok diindoye, “Neñ ankañgwayelen yomañ ñen ku aigap. ³⁹ Keyepmti neñ ilinañgalen set tazin keyet katan Angalalañ Kendo katan am mka katikñañen tatatnañ an ñen ilin zeme nâmpema zupman makwawezin keyet katan zeme neñ Zuda ilinañgalen Amobotnañin kapi belak zem-pema totogalen nâip?”

⁴⁰ Âpme ekñenanñ kwizet ñak ñak temanñ mti zewien, “Wa ek yek. Balabasingut belak zempe-mané tolak!” Balabas eganñ Loma gapman mtoindeme keyepmti ekñenanñ wati mka katikñanñ mepewien.

19

Amobotnanñ Pailelanñ Zisas gakikiyet zemdelanñ zempeye

¹ Amgat zeminggeyanñ yek beme gilik zem mka kenñan wapmoti Zisas kume gakikiyet zetnanñ zemdelanñ zemti kasa kuku an zemindeme sindiwanñ witikti ² sepmenñ mungunñi ñokñanen peme topme kâlâp teepmanñ ñamanñ piyanñ mundunpeme tapme ³ zimoseñnan met ondektati kwizet kalianñ temanñ msamti mbien ke pep mtiyepm zewien, “Geñ Zuda am ekñengalen Amobotnanñ kan teepmanñ telepgat penanñ mamambanik.” Zemti bepalaksat nenñuman taiwien.

⁴ Âpme Paillet eganñ Zuda am ekñenmagen ewe toweti zeye, “Neñ an kanğwa yomanñ penanñ timapma bemeyepmti watotindesât totdiindoyap. Keyepmti in ilin nâmti talip keyet katanñ msaseip.” ⁵ Zemti mot Zisas ek sepmenñ tekñanñ ñokñan kwasim pewien ma kâlâp ñamanñ teepmanñ mundunñ pewien mee bee melesinñ watoti Pailelanñ zikat indamti zeye, “In an bukapi ekti kembenñ bugan mip ma yek?”

⁶ Zeme sâpe sâpe bumbu an ñenanñ ekñen ma aminñine sambe ekñenanñ kwizet ñakñak mti zewien, “Tewen kume gakik! Tewen kume gakik!”

Kume Pailelan zet dopman pigok gilik zemti indaye, “Neñ yoman ñen ku aiga keyet in ilin nâipnok wati met tewen kume gakik!”

⁷ Âpme Zuda am ekñenan pigok zewien, “An keyan ikñangat, ‘Neñ Kawawangat Nemunan,’ zemti mobotnan mamm. Ma zii zetnnan an mobotnan kebon ke indome gakikiyet zenzenan. Keyepmti an Kawawangat zet mobotnan mamin kapi kume gakisem.”

⁸ Zeme Pailelan zet mobotnan mamm zewien ke nâmti kinğage. ⁹ Mti Zisas ewe mka keñan gilik zem wapmoti pigok yankwesiye, “Geñ pe mkandi ñotekñan pe deset?” Yankwesime Zisasiyan zetnan dopman gilik zemsasapin; ¹⁰ belak etan tapme Pailelan pigok dunduye, “Geñ zetn dopman ñen eneyet ku gilik zemti nanik? Neñmagen winde zemdelan zema tewengonğoyelen ma belak zengema mebegalen tatnain ke ku nâmnenik?”

¹¹ Zeme Zisasiyan pigok dunduye, “Geñ nâgât zetn zemdelan zenze keyet winde Kawawan kululunen gwaen mamain egan gaye keyepmti geñ nâgât zetn zemdelan zesâpmnik. Belak ze geñ nâgât zetn ñep ku zemdelan zewek. Mme am nati kot gâlen belen neyo ekñengalen yominan gâlen sebepein.”

¹² Pailelan zet ke nâmti set ñen aikti Zisas belak zempeme kwaweweget zeme Zuda am ekñenan kwizet kaliañ kumti zewien, “Geñ an ke belak zempemane mesem beme damunđi teman Sisa ekmak Loma mka ñotakñan tazin ekmak tususundi ku tabe. An ñenan amobotnan nen

kwep zemti amobotnañ Sisa mimtopewe beme Sisayañ ekmak kasa kasa mbe.”

¹³ Pailelan zet ke nâmti egañ Zisas wati zupman baen toti egañ zemdelan zenze munduman mototage. Mundum ke nanzañ weyañti kwetetepmañ mpepeñ keyepmti Ibulu zeleset Gabata makumtemien. ¹⁴ Kan ke ilak Angalalan Kendo sañen ñokñan tatagalen beye keyepmti zet mulup ke tapmimetnepeme tinsutnan peñan beme Pailelan Zuda am pigok diindoye, “In Amobotnañin wa piyet egit!”

¹⁵ Zeme ekñenañ kwizet kaliañ temañ kumti zewien, “An ke kumeñ gakik, kumeñ gakik, tewen kumasaokpeit!”

Âpme Pailelan zet dopmañ pigok diindoye, “Ilinagalen Amobotnañin kapi neñ tewen kumasaokpepeyet nâmti tazeip?”

Zeme sâpe sâpe bumbu an ñeñañ ekñenañ Pailetgat pigok zewien, “Wa nin amobotnañ zutmak yek. Nin amobotnañ Sisa kwewetan.”

¹⁶ Am sambeyañ zet sambe ke mme ekti Pailelan nâme ñep kumbeme Zisas nâmisimti tewen kumasaokpepeyet zemdelan zempeye.

Zisas tewen kumasaokpewien

¹⁷ Zemdelan zempeme kasa kuku an ekñenañ Zisas tep palen bemkukuyelen tepmañ bee ikñañ mesame pumti Golgata kalañan mowebien. “Golgata” ke Ibulu ekñengalen zeleset makuip âpme ningalen zeleset ñokaset Kalañ kuwanek. ¹⁸ Ke wapmoti tewen kumasaok pewien. Zisas tungupman kumpemti an zut nembet nembet

gakikiyet kogogak kumindewien. ¹⁹ Âpme Pailelan zeme Zisas kuwien tep keyet dukñanen gwaen meluwan kapigok kumpewien,

“ZISAS NASALET MKAENGATNAN ZUDA AM
EKNENGALAN AMOBOTNAN.”

²⁰ Zisas kumpewien msat keyet sokñan bee Zelusalem mka nñande teman ke matatan. Âpme Amobotnan Pailelan zeme meluwan ke Ibulu ekñengalen zeleset ma Glik ma Latin zeleset kumpeme tage. Âpme amnan setemamen mekoti zet ke mainñambien. ²¹ Keyepmti sâpe sâpe bumbu an nñan ekñenan ekme nñep ku beme Pailatgat pigok dunduwien, “Geñ, ‘Zuda am ekñengalen Amobotnan kegok eneyet kumpenak.’ Yegat, asekti naman pigok kumpe, ‘An kapiyan ikñangtat pigok manzein, “Neñ Zuda ekñengalen Amobotnan.” ’ ”

²² Zeme Pailelan pigok zeye, “Neñ zet ilak kumpeya ewe asekti naman sepem nñen ewe ku kusap.”

²³⁻²⁴ Âpme an kasa kuku ekñenan Zisas tewen kumpeme tapme sekñanen kwitnan kwitnan gulum m timti mange zulak zulak beme tapme ikñangtat ikñangtat tonan tonan tiwien. Âpme kâlâpman kenangatan teepman kengut ku selilinan keyepmti pigok zewien, “Pi mineti mendelepman kilen besemagangat kopme nin nanzan guluk gilik mti an kwiyan nñan kwasem beme egan kâlâp ke mti mesem zemti kegok mbien.” Sepem kegok mme Kawawangalen Zet Itnananen meluwan pigok miminan tazin keyet katanak beye,

“Ekñenan sekñanen kwitnan kwitnan gulum m
timti toñan toñan tiwien. Âpme kâlâp teep-
man kenangatan ke nanzan guluk gilik
mti an ñenan kwage egan mge.” (Sam
22:18)

²⁵ Zisas tewen kumpeme tapme Zisas ikñangat
maman ma mawenenan Malia Kolopasiyet
imbiñan ma Malia Makdala mkaengatan
imbi ekñen keyan Zisasiyet kember nâmti
met tep mwatonzempewien kandan tati
ekpeme mopme tapmambien. ²⁶ Tapmann
Zisasiyan nâgât gogot penan mamtan kegoapm
mamanmak nit tapmalu ndikti mamangat zeye,
“Mange, nemundi kemak mamambalup.”

²⁷ Zemti nen nikti zeye, “Geñ mamdi talup kapi-
mak mamambanik.” Âpme ke tatneti kwawesâti
nen Zisasiyet maman wati mkannanen meti ek-
damuñ mpema mamantan.

Zisas tewen anzamtapmetneti gakiye

²⁸ Zisasiyan tewen ke anzam tati gakikiyan
keñan minzilim kopme nâmti pigok nânge.
Mulup msalen mkoban ewan ilak alak delan
zein. Zemti Kawawangalen Zet Itnananen zet nen
kapigok tazin ke penanan bembeyet zet pigok
zeye, “Nen tuyet penan miyapgat tu nen omti
name nimbi.”

²⁹ Âpme ekñenan menzim nen wain tu akñan
penan pi kasim pepenan ke ekti yembem notnan
timti takaset dukñan gwaen tegan ñeliwen zam-
pemti peme menzim keñan ke towepme mkwati
peme mane mane dembusekñan mot olanme ke
ululuk ninge. ³⁰ Wain tu akñan penan ke nimti

zeye, “Ilak msalen mulup mimin delan zein.”
Kegok zemti gakimti noknanan gwak zemtoge.

³¹ Kan ke Anggalan Kendo tatagat kan soknanik penan beye keyepmti Zuda am eknenan Paillet-gat pigok zewien, “Sanenen tagonngo kanen am seknan eknenan tep duknanak ku tabep.” Zeme Pailelan an kasa kuku eknenan am eknen ke met selin kasetnan kume etume anzam tati gakime sekjin timti met indabembeyet nâmindeye. ³²⁻³³ Âpme kasa kuku an eknenan meti an zut bekanan mimi Zisasmak idowien. Eget ke met nen setnan kasetnan kume etume met nen setnan kasetnan kume etume Zisasmagen koti ekbienalak ek ilak gakim wengeyepmti setnan kasetnan ku kume etuye. ³⁴ Belak kasa kuku an nenan neliwan gatnaneset omti nelip senkwapme sipmak tumak luman tobun. ³⁵ Nen soknan ke tati ekma kwitnan kwitnan ke nanangat zikatn palen sokbeme ekban keyepmti zet kapi kumti indayap. In zet kapi nâme penan sukwep penan bewe. ³⁶ Kwitnan kwitnan kapi Kawawangalen Zet Itnananen zet nen kapigok tazin ke penanangmak bembeyet nâmti sokbemmâge,

“Eknenan kanzinan nen ku kume etuwe.” (*Sam 34:20*)

³⁷ Naman zet itnananen keyegak zet nen pigok tazin,

“Eknenan neliwan omti senme amnan zikalin gwalalan ek ekbep.” (*Zekaraia 12:10*)

Zisas seknan mâtâpmtoti met sumen bewien

³⁸ Âpme Zosep Alimatia mkaengatnan an ke Zisasiyelen manje yangut sosok sokbemti mama Zuda amobotnan eknenan nikmâtâti mka katiknan met newepmagen zem meti buzak enzilim mamtan. An keyan Zisas seknan mti met bembeyet Paillet yangwesime nep bembeyet nâmpeme met Zisas seknan mâtâtosât mege. ³⁹ Met mâtâtoti tobeme tapme Nikodimas an tambuyet buzak moti Zisasmak zet zenâmbun an keyan bam mâti mege. Egan mesâti wet am sekjin mme sesiknan dolaknan mapein ma keyan am sekjin mme sambumbupin kwesin matazin ke mti mege keyet nuknanan 50 kilo mee kegok. ⁴⁰ Meti Zosep mukulem mme egelan Zisas seknan Zuda ilin am gakime sekjin miak indemti maindabemtemien keyet katan wet sesiknan dolaknan zulutpenti sâk satnanan weyan sumunpemalu tapme besât luanzamti mebun. ⁴¹ Zisas kuwien msat keyet nembet daeset tep belak mulup nen matatan ke nanzan teman nen ewenan am bembeyet nâmti kakalimpepenan ke am nen ku indabembenan belak etan matatan. ⁴² Âpme Zuda am eknen ilak tagonjo kan tatagat kan bududuk penan beye keyepmti egelan Zisasiyet seknan sakwep mâtâpmti soknan ke met bempemti kobun.

20

Zisasiyan gakikiengatnan gilik zemti wage

¹ Sonda tambunan penan msat ewe sasat takume Malia Makdala mkaengatnan keyan Zisas seknan eksâgât meti ekme an zulan nanzan

teman n̄en wilili pemalu met enzun bekek tage e naman wililipeme kainan met tage. ² Kegok ekti egan wenan mepme windembem mane mane Saimon Pitamak neŋ Zisasiyan nâgât gogot mam-tan ninmagen meti zeye, “An zut, Amobotnan seknan piwan ewande n̄en mmelo mme neŋ sumen daen meti ekma yek bep!”

³ Kegok zeme Pitamak neŋmak nâmti am sumen daen eksât mebelin. ⁴ Windembem mane mane Pita ewe sewak sewak tapmepme neŋ sakwep windembem met sumen patan zewan. ⁵ Meti kenan baen ku towewan. Belak zupman baen tati bim kekesimti sangum satnan etan baen tapme ekban. ⁶ Âpme Pitayan bam met patan zemti kenan keim toweti sangum satnan kwasimpewien kwep weme ege. ⁷ Ma ŋoknanen sâk kwasim pepeŋan e kegogak weyan mutumti igak bempepeŋan tapme ege. ⁸ Âpme neŋ kegogak kenan toweti nilisakwep kwitnan kwitnan sambe ke ekmâti pigok nâmkinpewan. Zisasiyan iknan wasât zeme nâmban walek penan kapi wati melep. ⁹ Mme nemba notnan eknenan Kawawangalen Zet Itnananen Zisasiyan gakikien-gatnan wawagat zetnan meluwan mimiŋan ke eknenan ku nâmbien. ¹⁰ Ke ekti egelan belak wenit mepme am zaimengatnan kwakwadak mkaen mebun.

Zisasiyan Malia Makdala mkaengatnan sokbemsaye

¹¹⁻¹² Âpme Malia Makdala mkaengatnan keyan naman met sum ganzenan ganzenan ke tok-wat sumti mgeyan yek beme met bimkekes-

imti zikatnan sum kenan baen ekpeme mepme Kawawaŋgalen ensel zut kâlâwit satnan satnanan miakpewun piyan Zisas peme wengeen ke nenan setnanan wengeeset nenan noknanan wengeeset totapmambun. ¹³ Egelan imbi ke ekti zewun, “Imbi, geŋ pe kwilekiyet nâmti tasunik?”

Âpme egaŋ zeye, “Amobotnan nnaŋgalen seknaŋ pi ewande nen mmeppme munduman timappa beme tasuyap.”

¹⁴ Kegok zemti gilik zemti wa belaknan zem Zisas iknaŋ ege yaŋgut kapi Zisas ke ku ekmâtâge.

¹⁵ Âpme Zisasiyan pigok yaŋkwesiye, “Imbi, geŋ pe kwilekiyet tasunik?”

Zeme imbi keyaŋ wa mulup kapiyet damuŋan nenan mene tazin zemti pigok dunduye, “An sum damuŋ, geŋ mene an seknaŋ kapi mti ewande nen met benak beme zeman nâmti met mkobi.”

¹⁶ Zeme Zisasiyan Malia pigok dunduye, “Malia!”

Zeme nâmti Maliayaŋ eleŋ zem kwat Zisas ekti Zuda zeleset pigok zeye, “Laboni!” (Zet keyet yaŋaŋ An Zikat Indanda.)

¹⁷ Zemti endilipemti atasât mme Zisasiyan pigok dunduye, “Geŋ kot sekŋ timakmakpiŋ! Neŋ Bienmagen ewe mobopiŋ talapgat! Geŋ notnne eknenmagen meti pigok diindo, ‘Neŋ nin sambeyet Bipmmagen ma nin sambeyet Kawawaŋmagen mowebap.’ ”

¹⁸ Zeme nâmti Malia Makdala mkaengatan keyaŋ sakwep windembemti Zisas iknaŋgat nembaŋane ninmagen meti pigok dinndoye, “Neŋ

Amobotnan̄ ekti kolap!” Zemti zet dunduye ke dinndomâge.

Nemba ekñen̄ mka keñan̄ ondek tatnepeme Amobotnan̄an̄ sokbemindaye

¹⁹⁻²⁰ Âpme Sonda tambuyet nin mka kwep ñeniyet mot ondek tati Zuda amobotnan̄ ekñengat kiñgati setn kili kili penan̄ kekti tapmann Zisasiyan̄ belak tungupmnan̄ ke petak zem kwatati pigok dinndoye, “Inmagen keñ sewakñan̄an̄ wembe.” Kegok zemti betnan̄ zembeñan̄ nembet nembet ma gatnanen zembeñan̄ ke zikat ndaye. Âpme nin Zisas ekti keñ dolakñan̄ penan̄ beme tabenn. ²¹ Âpme ewe pigok dinndoye, “Inmagen keñ sewakñan̄an̄ wembe. Bienan̄ neñ zemneme toti inmagen mulup mban kegogak neñ in muluwen mebegat zemindeyap.” ²² Kegok zemti indakumbumti zeye, “In Emetak Ten̄ tit. ²³ In am yomin zemzulutindewep beme yomin penan̄ yek bewe. Âk am notnan̄gat yoman̄ tatagat nâmpewep beme yoman̄ ke kaliñan̄ tabe.”

Tomasiyan̄ Zisas ege

²⁴ Âpme Zisas nemban̄ane 12 ninmagengatnan̄ nemba ñen kwitnan̄ Tomas ek keyet kwitnan̄ ñen Didimas manzemtemenn, ningalen zeleset, nemba pepet kegok zewanek. Egan̄ ewande ñen mame Zisasiyan̄ nemba notnan̄ etan̄ sokbemindaye. ²⁵ Keyepmti nemba notnan̄ nin Zisas sokbemndame ekbenn nin zewenn, “Nin Amobotnan̄ sokbemndame ekñ.”

Zemann Tomasian pigok dinndoye, “Nen nen penan betnan palaknan gwilim zemberan ke ma gatnanen nelip zemberan ke betnan atam ektigut zelin kapi nâma penan bewe.”

²⁶ Zemti mamotnepeme Sonda nen beme naman Tomasmak nsakwep mka kenan ngat ondekti mka wanok setnan kenaset kili kili kekpemti tapmambenn. Tatnepemann Zisasiyan ewe tungupmnan patan zem kwatati pigok zeye, “Ken sewaknan inmagen wembe.” ²⁷ Zemti Tomas pigok dunduye, “Gen zewanangat betn zemberan pi timak ekbak ma betdan daen pe-man mepme nelip zemberan timak nâmbak. Mti ken zut ewe mimipin; penan nâmkinpemne.”

²⁸ Zeme Tomasian atam ekti zeye, “Gen penan Amobotnanan ma Kawawan!”

²⁹ Zeme Zisasiyan pigok dunduye, “Gen nati-mak ekti keyepmti nâmkinpemnenigat. Âpme am nen sepem eekpin belak manâmkinpemneip am eknen ke Kawawanan indamukulem mimindeme olojen palen penan mamambep!”

³⁰ Zisasiyan ewe msalen pien mamti menok sepeman igak igak sambe penan nembajane ningat zikatnnan mamimkwapme ektemenn. Sambe bee papiaen pi ku kuma delan zemâge.

³¹ Bugar pi kumpeperan pi ilak kapigogapmti kukunan. In sambayan mainnâmti Zisas ek Kilais ek Kawawangat Nemunan penan ke nâmkinppepyet bugan kapi kumpewan. Keyepmti an nenan zet kapi mainnâmti egat nâmkinpewe beme egan mama kanzizit aikbe.

21

Zisasiyan nembajane 7 sokbemindaye

¹⁻³ Mamoti Zisas nembajane 7 ke nin kapigok: Saimon Pita, Tomas kwitnanj nèn Nemba pepet, Natanael Galili mkaengatnanj ma Zebediyet nemulatnenet ma nembajane zut nit ewe Taibilias tundua ganzenan met ondek tapmman Saimon Pitayanj nin pigok dinndoye, “Nen angalayet timasât tapmiap.” Zeme nin nsakwep meti wanğaen moti meti tambu tetak pi mulup teman mti angala nèn ku atawenn.

⁴ Ke tapmimetnepemann ilak msaye. Âpme Zisasiyan gambibik palen daen tapmame ekbenn. Yangut nin an ke Zisas ke ku nâmâtâpewenn.

⁵ Mme Zisasiyan ndikti kwizet pigok kuye, “An eknen da, in angala nèn mandayo ma yek?”

Ndayanjkwesime nin zewenn, “Yek, nèn ku mandann.”

⁶ Zeme pigok dinndoye, “In elengolamin mti naman wanğa ganzenan bet penaset peme topme angala omba mandait.” Zeme nin elengolam mti wanğa nembeleset pemann towepme angalayanj totne totne elengolam bepi gak zem tapme elengolam mandamann kwasâgât tenjen penanj siwenn.

⁷ Âpme nen Zisasiyan nâmneme dolaknanj mambemtan keyanj Pitayet pigok zewan, “Pita, an kanda ilak Amobotnananj iknanj tazin nânîk.” Zeme Saimon Pitayanj nânânjak kâlâpmanj mti bi-man kaikti tuyen palam toti tukutumti tu paleset zelesanj mege. ⁸⁻⁹ Âpme wanğa bugan nembu sutnanik daen 100 mita mee kegok tage keyepmti

nemba notnaŋ nin waŋga mme kainan mopmann elenŋolam aŋgala melesin mandapemann kainanik motapme gambibik palen gwaen moti ekmann tep kwetnanen aŋgala ma meu mee piyaŋ tazimaŋge.

¹⁰ Âpme Zisasiyaŋ dinndoye, “In aŋgala tiyo e notnaŋ pienen mti kolit.”

¹¹ Zeme Saimon Pitayaŋ waŋgaen moti elenŋolam teknaŋ pi kwaleti elenŋolam aŋgala melesin mandamti katiknaŋ mot peme wenŋe. Kenanen bee aŋgala temaŋ temaŋ penaŋ 153 bekapiyaŋ tabien yangut elenŋolam teknaŋ ku etiye. ¹² Mme Zisasiyaŋ pigok dinndoye, “In aŋgala ke tapme pien kot meu timti nit.”

Zeme nin ilak Amobotnaŋ elak nâmpewenn keyepmti nin, “Geŋ pe an kwi?” kegok ke ku yaŋkwesiwenn. ¹³ Âpme Zisasiyaŋ kot totati aŋgalamak meu tewen tapmaŋge ke timti kalaŋ ndame nimbenn.

¹⁴ Zisasiyaŋ gakikiengatnan wati nin sek zut ilak sokbemndaye yalak kan piyet sokbemndame sek tuk bein.

Zisasiyaŋ Saimon Pita sek tuk kapi yaŋkwesiye

¹⁵ Nin meu ke ndame nimann delaŋ zeme Zisasiyaŋ Saimon Pita pigok yaŋkwesiye, “Saimon, Zângat nemuŋaŋ, nodine eknenaŋ nâgât kenin temaŋ penaŋ bemti gogot mamimneip. Âpme geŋ nâgât zigok penaŋ manâmnenik?”

Zeme Pitayaŋ zeye, “Amobotnaŋ, neŋ gâgât gogot omba penaŋ mamiyap elak nep nâmnenik.”

Zeme Zisasiyaŋ zeye, “Geŋ nâlen sipsip maŋge maindadamuŋ mmambanik.” ¹⁶ Kegok

zemti ewe keyegak sakwalamti zeye, “Saimon, Zângat nemuñan, geñ penañ nâgât gogot penañ maminik?”

Zeme Pitayan zeye, “Amobotnan, neñ gâgât gogot penañ mamimgeyap e nâmnênik.”

Zeme Zisasiyan zeye, “Geñ sipsip manñanne maindikdamuñ mmambanik.”

¹⁷ Zeme Zisasiyan ewe sakwalamti pigok yañkwesiye, “Saimon, Zângat nemuñan, geñ penañ nâgât gogot mamimnênik?”

Egañ zet sepemañ kwep ke yañkwesime sek tuk beme Pitayan nâmti keñan bekanan penañ beme zeye, “Amobotnan, geñ kwitnan kwitnan sambeyet yañan nâmane delañ manzein. Neñ gâgât gogot mamimgeyap e kegogak nâmnênik.”

Zeme Zisasiyan zeye, “Geñ sipsip manñanne kapi maindikdamuñ mmambanik. ¹⁸ Neñ penañ sukwep penañ pigok dingoma nâmbak, geñ nembraengatan mamkwabanan yañ ewe mamobanik pi bitimdi giti zamti set deset ma deset mesâti giti nâmtati mamepmambanik. Yañ maneti an penañ bewanik kan keyet geñ bedi etañ mwapmane am notnan ekñenan bitimdi zamgemti geñ mesât ku nâmbanigen ke gaik mebep.” ¹⁹ Zisasiyan kegok zemti Pitayan zigok gakiwe keyet zet bimbim zet zeye gakikiñan sepe-man igak keyan Kawawañgat kwizet buñaman mim wawagat zeye. Zet kegok dundumâti pigok dunduye, “Geñ nâlen nempa penañ kwati mamambanik.”

²⁰ Âpme Pitayan gilik zemti ekme Zisasiyan neñ nempa ektikñan mampemtan keyan egegat bami-dan penañ mepma nikbun. Neñ Anğalalan Ken-

doen meu tatnimambenn kan keyet neñ Zisasiyet wakñan bemti pigok yañkwesiwan, “Amobotnañ, pe kwiyañ geñ zemgowe?”

²¹ Neñ bamidan taidamâtmepma Pitayañ nikti Zisas pigok yañkwesiye, “Amobotnañ, nemba kapi bam amnañ zigok msame gakiwe?”

²² Yañkwesime Zisasiyañ pigok dunduye, “Egañ ewe alik mame neñ gilik zemti kobap ma gakime kobap e nen nâyap. Âpme geñ zet keyet eneyet tatnayañkwesinik? Geñ nâlen nemba penañ kwati mamambanik.”

²³ Âpme am Zisas nâmkinpemti mamtemien notnañ eknenañ zet ke nâmti Zângat pigok zemyunguwien, “Nemba kapi ku gakiwe.” Wa Zisasiyañ ek gakikipiñ telepgat mamambe keyet nâmti ku zeye.

Pitayañ yañkwesime keyepmti Zisasiyañ pigok zeye, “Egañ ewe alik mame neñ gilik zemti kobap ma gakime kobap e nen nâyap. Âpme geñ zet keyet eneyet tatnayañkwesinik?”

²⁴ Neñ kwitnañ kwitnañ sambe ke eknâm mima delañ zemâge keyepmti zet sambe beke papiaen kapi weyañ zemâtâti kumâti peyap. Keyepmti nin zet meluwañ kumpeye kapiyet nâmann penañ penañak bein.

Zânañ zet kapigok zemdelañ zeye

²⁵ Âpme Zisasiyañ kwitnañ kwitnañ mkwage sambe bee ilindiñ papiaen kuma topmâdak ze papia ñotekñañ sambe penañ sokbemâdak.

Kawawangalen Tâtâ Alakṇan
The New Testament in the Nabak Language of Papua
New Guinea
Nupela Testamen long tokples Nabak long Niugini

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

ea68a902-358a-5c72-82de-a583fc4809e7